

O LE EKALEZIA A IESU KERISO O LE AU PAIA O ASO E GATA AI • MATI 2013

O Le Liahona

**Auala e Tausia
ai Fanau ia
Maufetuunai, i. 10**

**O le a le Taimi Sa’o e
Faaipoipo Ai? i. 38**

**O Tagata Amio Lelei
Latou te le Faaogaina
ni Ufimata, i. 48**

**Gaoioiga o le Eseta: Ia
Manatua Iesu Keriso, i. 68**



*“Tatou te le
usiusitai ona
faapea ua tatou
tauasoa, tatou
te usiusitai ona
ua mafai ona
tatou vaai.”*

Peresitene Boyd K. Packer,
Peresitene o le Korama a
Aposetolo e Toasefululua,
“Agency and Control,”
Ensign, Me 1983, 66.

Tagai foi “Ua E Saoloto”
i le itulau e 16



O SAVALI

4 Savali a le Au Peresitene Sili: Filemu, Filemu
 Saunia e Peresitene Thomas S. Monson

7 Savali a Faiaoga Asiasi: Faatoaagaina Mai

TALA FAAALIA

10 Tausiga o Fanau ia Maufetuuna'i
 Saunia e Lyle J. Burrup
E manaomia e fanau le malosi o ia lava e faatoilalolina ai faafitauli. O nisi nei o auala, e mafai ai e matua ona fesoasoani i fanau e atiina ae lenei uiga taua.

16 Ua E Saoloto
 Saunia e Elder D. Todd Christofferson
O la tatou filifiliga i lenei olaga, o le filifili lea po o ai le taitai o le a tuu atu i ai lo tatou usiusitai: o le Atua po o Satani.

20 O Le Ola Ai i Mataupu Faavae o le Faalagolago o le Tagata ia te la Lava
 Saunia e Larry Hiller ma Kathryn H. Olson
O le ola faalagolago o le tagata ia te ia lava e taua tele, e le gata i taimi o le vavao, ae faapea foi i taimi o le filemu.

22 O Le Mana o le Afioga a le Atua
 Saunia e Elder Michael John U. Teh
O le suesue i tusitusiga paia i aso taitasi, o le a fesoasoani ia i tatou e fausia ai le malosiaga faaleagaga, ma aveesea le ufimata o mea taufaasese a le tiapolo.

26 O Faamanuiga o le Sefuluai
 E toalima tagata o le Ekalesia ua faasoa mai le molimau ua latou maua mai le totogiina o le sefuluui.

30 O Le Fausiaina o Tu ma Aga o le Eseta e Totonugalemu ia Keriso
 Saunia e Diane L. Mangum
O le Togiola, o le aano lea o le Eseta; o tu ma aga amiotonu, o le a fesoasoani ia i tatou e taulai atu i lenei meaalofo mai le Faaola.

MATAGALUEGA

8 Tusigāmanatu Konafesi Oketopa

33 Aoao Atu Mo Le Malosi o le Autalavou: O Le Taua o le Aiga

34 O Leo o le Au Paia o Aso e Gata Ai

74 Tala Fou o le Ekalesia

80 Seia Tatou Toe Feiloai: O Le Laveai i Lua Maina
 Saunia e Russell Westergard

I LE FAAVAA

Luma: Ata na saunia e Cody Bell. Tua: Ata na saunia e Craig Dimond. Faavaa totonu i luma: Atapue o Heceta Head Lighthouse i Oregon, ISA, saunia e Royce Bair © Getty Images.

AUTALAVOU MATUTUA



38

38 O Le Taimi Sa'o e Faaipoipo Ai

Saunia e Alissa Strong

Pe afai o le tagata sa'o ma le nofo-aga sa'o, o lona uiga o le taimi sa'o lena.



Vaai pe mafai ona e mauaina le Liahona o loo natia i le lomiga lenei. Fesoasoaniga: Aua le luea le vaa.



48

AUTALAVOU

42 Tuusao i le Mataupu

44 O Le A Le Mea e Tupu pe a Tatou Oti?

O i ai ni au fesili e uiga i le lalolagi o agaga po o le toetu? O nisi nei o tali.

48 Aua le Faia ni Ufimata

Saunia e Elder Quentin L. Cook

O tagata amiotonu, e manaomia lo latou lē faaaogaina o ufimata e nanā ai o latou foliga moni.

51 Na Talitonu ia te Au Lo'u Uso

Saunia e David Dickson

Pe ana taufaalili Tanu ia te a'u, atonu o le a ia faamautinoaina lo'u le magagana, atonu mo le olaga atoa.

52 Mo Le Malosi o le Autalavou: E I Ai Sa'u Molimau e uiga i le Aiga

Saunia e Ann M. Dibb

54 O Mea Matautia ua Natia


Saunia e Joshua J. Perkey

Ua lē taofia e poloaiga la tatou faitalia —latou te tuuina mai lo tatou avanoa sili ona lelei mo le fiafia ma le manuia.

57 Mai le Misiona: Ootia i se Molimau

Saunia e Michael Harken

TAMAITI



70

58 I le Auala: O Le Mea na Lolomi ai le Tusi a Mamona

Saunia e Jan Pinborough

60 O Le Tusi Fou a Riki

Saunia e Laura Byrd

O le a le mea atonu e mafai e Riki ona faia e fesoasoani ai ia Tuafafine Bird, lea e tiga ona lima pe a taumafai e uuina tusitusiga paia?

62 O Tamai Mamoe a Megan

Saunia e Julina K. Mills

Ua maua e Megan se auuala poto e tausi ai ana tamai mamoe, ma atiina ae se faauoga.

64 Molimau Faapitoa: Aisea e matuai taua ai Iesu Keriso ia i tatou?

Saunia e Elder Dallin H. Oaks

65 Aua o Loo Soifua o Ia

Saunia e Marivic Pasigay ma Marissa Widdison

Ua maua e Watoy se avanoa e faa-soa atu ai lana molimau ia Iesu Keriso i lona faiaoga i le aoga.

66 Aumaia o le Peraimeri i le Fale: O Iesu Keriso O Lo Tatou Faola

68 Vaai Faalemafaufau i le Eseta

O le faasolosolo atu i le Eseta, e ala i le faaaogaina o le paso lenei.

70 Mo Tamaiti Laiti

81 Atatosi o le Perofeta: Ioane Teila

MATI 2013 VOL. 37 NU. 3
O LE LIAHONA 10783 890

O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Shayne M. Bowen, Bradley D. Foster, Christoffel Golden Jr., Anthony D. Perkins

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr,

LaRene Porter Gaunt

Lagolago o Lomiga: Melissa Zenteno

Au Tusitusi ma Faatonutonu: Susan Barrett, David Dickson, David A. Edwards, Matthew D. Flitton, Mindy Raye Friedman Garry H. Garff, Jennifer Grace Jones, Hikari Loftus, Michael R. Morris, Richard M. Romney, Paul VanDenBerghe, Julia Woodbury

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus,

C. Kimball Bott, Thomas Child, Kerry Lynn C. Herrin, Colleen Hincley, Eric P. Johnsen, Scott M. Mooy, Brad Teare

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Howard G. Brown,

Julie Burdett, Bryan W. Gygi, Kathleen Howard, Denise Kirby, Ginny J. Nilson, Ty Pilcher, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Evan Larsen

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) I i le kopi. Totogi mo le Tausauga Atoa \$6.60 (Samoa).

Auina atu tusitusiga ma faafesili i luga o le initoneti i le liahona.lds.org: pe meli mai i le Liahona, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonuuala") e lomai i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Iglisi, Esitonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Latvia, Lituania, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafaigofieina), Silovenia, Sipaniolo, Suetena, Tagaloka, Tahiti, Tai, Toga, Iukureini, ma Urutu, ma Viatename. (E eseese lava gagana.)

© 2013 Puletaofia e le Intellectual Reserve, Inc. Ua taofia aia tatau uma. Lomia i le lunaite Setete o Amerika.

E mafai ona kopi tala ma ata o le *Liahona* mo le toe faaagaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufatuga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

March 2013 Vol. 37 No. 3. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Manatu mo Afiati Faaleaiga

O leni lomiga e aofia ai tusiga ma gaoioiga e mafai ona faaoga mo afiati faaleaiga. O nai faataitaiga nei.



ATA NA TUSIA E CODY BEL © IRI

“O Le Mana o le Afioga a le Atua,” itulau

22: Mafaufau e faitau faatasi ma lou aiga “O Le Tulaga Paia o le Upu,” o se vaega i totonu o le tusiga, ma talanoa le auala e mafai ai e tusitusiga paia ona avea ma ou ai uamea. Valaaulia tagata o le aiga e faasoa mai se aafiaga, na latou lagonaina ai le mana o tusitusiga paia. Po o le, mo fanau laiti, faasoa atu i ai se tala musuia mai tusitusiga paia. Mafaufau e faasoa atu le lu’i a Elder Teh e suesue tusitusiga paia i aso taitasi.

“O Le A Le Mea e Tupu pe a Tatou Oti?”

itulau 44: Mafaufau e talanoaina fesili o loo lisi atu i le tusiga ma faamanuiaga e oo mai i le iloaina o le oti e le o le iuga lea o lo tatou olaga. Atonu e te manao e fesili atu

pe faapefea e leni malamalama ona avea ai a tatou faaiuga taitasi o se tulaga taua. Faaiu e ala i le tuuina atu o lau molimau e uiga i le ata o le faaolataga.

“O Tama’i Mamoe a Megan,” itulau

62: Faitau le tala ia Megan ma ana tama’i mamoe, ma talanoaina le mafuaaga na matua fiafia ai Megan i le faaiuga. Atonu e te manao e faitau foi le Mosaea 2:17–18 ma talanoa i faamanuiaga tatou te maua mai le auuina atu. Mafaufau e talanoaina auala e mafai ai e tagata o le aiga ona auuina le tasi i le isi, faapea isi tagata. Atonu e mafai ona e faaiuina i le usuina o se pese e uiga i le auuina atu, e pei o le “E Vave Ona Ou Usitai” (*Tuspese a Tamaiti*, 71).

I LAU GAGANA

O loo maua le *Liahona* ma isi tusi a le Ekalesia i le tele o gagana i le languages.lds.org.

AUTU I LENEI LOMIGA

E ta’u mai e numera le itulau muamua o le tusiga.

Agalelei, 60

Aiga, 9, 10, 33, 34, 38, 51, 52

Ala o faasalalauga, 48

Amio Sa’o, 48

Aoao atu, 33

Auauna atu, 36, 62

Eseta, 30, 68, 70, 73

Faaiipoipoga, 38

Faalagolago o le tagata ia te ia lava, 20

Faamanuiaga, 26, 35

Faatoagaina Mai, 7, 80

Faauo, 62

Faitalia, 16

Filemu, 4

Galuega faafaifeautalai, 34, 57

Iesu Keriso, 16, 64, 65, 66, 68, 70, 73

Konafesi aoao, 8

Lalolagi o agaga, 44

Maliu, 44

Maufetuunai, 10

Molimau, 65

Musumusuga, 36

Olioli, 8

Ponokalafi, 48

Sefuluai, 26, 35, 37

Suesue i tusitusiga paia, 22

Taleni, 51

Teila, Ioane, 81

Toetu, 30, 44

Togiola, 16, 30

Tulaga faamatua, 10

Tusi a Mamona, 22, 58

Usiuitai, 16, 36, 54



Saunia e Peresitene
Thomas S. Monson

Filemu, FILEMU

se tasi aso, i nai tausaga ua mavae, ina ua mae'a galuega i le ofisa, na ou lagonaina ai se uunaiga malosi ina ia asia se tina ua maliu lana tane, o le sa avea ma se tagata mai i se nofoaga autu mo le tausaiaina o tagata matutua i le Aai o Sate Leki. Na ou alu sa'o lava iina.

Ina ua ou alu atu i lona potu, sa ou iloa ai e le o i ai o ia. Na ou fesili i se tagata faigaluega e uiga i le mea o i ai o ia, ma sa faasino a'u i se potu malolo. O iina na ou maua ai lenei tina ua maliu lana tane, o talatalanoa ma lona uso ma se tasi uo. Sa manaia la matou talatalanoaga faatasi ma i latou.

A o matou talatalanoa, na sau se alii i le faitotoa o le potu ina ia mafai ona maua se apainu mai le masini. Sa ia vaai mai ia te a'u ma faapea mai, "Ei, o oe o Tom Monson."

"Toe," o la'u tali atu lea. "E pei lava oe o se Hemingway."

Na ia faailoa mai faapea o ia o Setefano Hemingway, le atalii o Alfred Eugene Hemingway, o lē na avea o se tasi o o'u fesoasoani, a o avea a'u ma se epikopo i le tele o tausaga talu ai, ma o lē sa ou valaauina ia Gene. Na ta'u mai e Setefano ia te a'u faapea o lona tama, o loo i ai foi i le fale lava lea e tasi, ma ua latalata ona oti. Sa faapea ona tauvalaau Gene i lo'u igoa, ma sa mananao le aiga e faafesootai a'u, ae sa le mafai ona maua se numera o la'u telefoni.

Na vave ona ou faamavae ma ma o atu faatasi ma Setefano i le potu o lē sa avea muamua ma o'u fesoasoani, i le mea na faapotopoto ai isi o lana fanau, a o lona toalua na maliu i nai tausaga na muamua atu. Na manatu tagata o le aiga i le ma feiloaiga ma Setefano i le potu malolo, o se tali mai lo tatou Tama Faalelagi i lo latou mana'oga sili, ina ia ou vaai i lo latou tama a o le'i maliu o ia ma tali atu i lana valaau. Sa ou lagonaina foi o le tulaga lena, aua ana le alu atu Setefano i totonu o le potu, lea sa ou i ai, i le taimi tonu lea na ia oo atu ai, semanu o le a ou le iloina o loo i ai foi Gene i lena fale.

Na ma tuuina atu ia te ia se faamanuiaga. O se agaga o le filemu na i ai i lena taimi. Na matou maua se talatalanoaga matagofie, ina ua mae'a, ona ou tuumuli lea.

O le taeao na sosoo ai, na faailoa mai ai i se valaau i luga o le telefoni faapea o Gene Hemingway ua maliu—i le 20 minute talu ona mae'a ona ia maua le faamanuiaga mai ia i maua ma lona atalii.

Na ou faia se tatalo le leoa o le faafetai i le Tama Faalelagi mo Lana taitaiga mamana, lea na faaosofia ai la'u asiasiga i le nofoaga autu mo le tausaga o e matutua, ma taitai atu ai a'u i le la'u uo pele o Alfred Eugene Hemingway.

Ou te fia mana'o e mafaufau faapea o manatu o Gene Hemingway i lena afiafi—ina



ua matou lagonaina le Agaga, auai faatasi i le tatalo faamaualalo, ma tuuina atu se faamanu-iaga faaleperisitua—na faamautuina ai upu ua taua i le viiga “Matai e, Ua Sou le Vasa”:

*Le Faaola e, auua ne’i!
Toe tuua na’o a’u,
Ou te maua ai le fiafia
I lou maota paia.*

Ou te fiafia pea lava i lena viiga, ma moli-mau atu i le mafanafana na te aumaia:

*Matagi ma galu, malu ia oe
Sou, po o fili, po o tagata,
Leai o se sami na te malua, Le vaa e tofa ai
Le Pule o lalo nei ma luga.
E usitai ia oe, Iesu:
Filemu, filemu!*

E ala i loimata ma tofotofoga, e ala i popolega ma faanoanoaga, e ala i le lotomafatia ma le tuua toatasi ona o le maliliu ai o e pele ia i tatou, o loo i ai le faamautinoaga faapea e faavavau le olaga. O lo tatou Alii ma le Faaola o le molimau ola o lena mea.² Ua lava Ana afioga ua tuuina mai i tusitusiga paia: “Ina soia, ma ia iloa o a’u lava o le Atua” (Salamo 46:10). Ou te molimau atu ai i lenei upumoni. ■

FAAMATALAGA

1. “Matai e, Ua Sou le Vasa,” *Viiga*, nu. 58.
2. Tagai i le Richard L. Evans, “So Let Us Live to Live Forever,” *New Era*, July 1971, 18.

AOAO ATU MAI LENEI SAVALI

O lenei savali e mafai ona faamafanafana ai i latou o e ua misia se tasi e pele ona o le maliu, po o i latou o e o loo tauivi ma se tofotofoga. I le faaopoopo atu ai i le savali a Peresitene Monson, mafaufau e faasoa atu se tasi o mau nei, e faalagolago i manaoga o i latou o loo e aoaoina: lopus 19:25–26; 1 Korinito 15:19–22; Mosaea 24:13–15; Mataupu Faavae ma Feagaiga 122:7–9. Pe a uunaia ai, atonu e te manao e molimau atu e uiga i le filemu na tuuina atu e le Faaola ia te oe, i taimi o ou tofotofoga.

Faamolemole, Faamalolo Lo’u Fatu

Saunia e Kelsey LeDoux

I le faamanatuina o le tausaga talu le maliu o lo’u uso, na ou toe tomanatu ai i lo’u olaga talu ona maliu o ia. Na le gata ina ou manatuaina le ogaoga o le tiga na ou lagonaina, ae o faamanuiaga na tuuina mai e le Atua ia te a’u.

Sa le’i mafai ona ou malamalama i le mafai ona faapea mai o tagata, o le oti o sē e pele, e mafai ona aumai ai faamanuiaga. Sa faigata ona ou malamalama i le auala e mafai ai ona ou maua le olioli ma le agaga faafetai, mo se mea e sili ona tuia ai a’u. Peitai ane, sa i ai se tasi o po, na suia ai atoatoa la’u vaaiga faalemafaufau o mea.

Na ou ala a’e i luga i le vaeluaga o le po, ma se lagona sili ona mamafa i lo’u fatu ou te le’i o’o i ai muamua. O le tiga na tau uma ai la’u manava. Na ou tootuli ifo i o’u tulivae ma augani atu i se tatalo i lo’u Tama

Faalelagi. I lo’u olaga atoa, na aoaoina a’u e uiga i le Togiola ma le mana faamalolo a Iesu Keriso. O lenei la, ua tofotofoina lo’u faatuatua. Pe sa ou talitonu moni ea? Na ou talosaga atu i lo’u Tama i le Lagi, faamolemole faamalolo lo’u fatu. O le tiga, sa matuā tele naua e le mafai ona ou tatalia na o au.

Ona oo mai lea o se lagona o le filemu, mafanafana, ma le alofa, i lo’u tino atoa. Na ou lagonaina ua pei ua opoopoina e le Atua a’u i Ona aao, ma ua la puipuia a’u mai le tiga matautia na ou lagonaina. O loo ou misia pea lava lo’u uso, ae na mafai ona ou vaai atu i ni mata ua ese. Na matua tele naua mea ou te aoaoina mai lenei aafiaga.

Ou te iloa, o loo i ai le alofa ma le filemu o le Alii mo i tatou. Na pau le mea tatou te manaomia, o le faaaogaina.

O Kelsey LeDoux e nofo i Minnesota, ISA.



Filifili e Filemu

Ua saunoa mai Peresitene Monson faapea, pe a tatou fifilemu ma migao, e mafai ona tatou lagonaina le filemu, ma maua se molimau malosi atu i lo tatou Tama Faalelagi. Ma o le a mafai e le Agaga Paia ona sili atu lona uunaia o i tatou i auala e mafai ai ona tatou fesoasoani i isi.

O fea o tamaiti o i lalo, o loo nonofo filemu?



Tusi i lalo pe talanoa ma ou matua i se auala se tasi e mafai ai ona e nofo filemu. Ona faалу lea o se taimi i lenei vaiaso e faatino ai. A uma ona e faia, e mafai ona e tusia i lau api talaaga lagona ma uunaiga na e maua.

Suesue ma le agaga tatalo i mea nei, ma pe a talafeagai ai, ia talanoaina ma tuafafine e te asia. Faaoga fesili e fesoasoani ai ia te oe e faamalositia ai ou uso ma avea ai le Aualofa ma se vaega ola o lou lava olaga. Mo nisi faamatalaga, alu i le reliefsociety.lds.org.

Faatoaagaina Mai

O lo tatou perofeta, o Peresitene Thomas S. Monson, ua uunaia i tatou e “aapa atu e laveai i latou, o e o manaomia la tatou fesoasoani ma siitia i latou i le alatele maualuga atu ma le ala sili atu ona lelei. . . . O le galuega a le Alii, ma pe a tatou i ai i le feau a le Alii, . . . ua tatou agavaa mo le fesoasoani a le Alii.”¹

I le tele o tausaga talu ai, na asia ai e LaVene Call ma lana soa o faiaoga asiasi se uso ua le toaga mai. Na la tuitui i le faitotoa, ma iloa ai se tina talavou o loo ofu lona ofu talaloa. Na foliga ma’i o ia, ae na vave ona laua iloa o lona faafitauli o le ava malosi. Na nonofo i lalo faiaoga asiasi ma tala-talanoa ma le tina talavou o loo tauivi ma le faafitauli.

Ina ua la tuua le fale, na faapea la laua tala, “O ia o se afafine o le Atua. Ua ia i taula se tiutetauave e fesoasoani ia te ia.” O le mea lea na la asiasi soo atu ai ia te ia. O taimi taitasi, na mafai ona la lagonaina se suiga mo le lelei. Na la talosagaina le uso ina ia auai atu i le Aualofa. E ui ina sa musu o ia, ae na iu lava ina auai soo i sauniga. I le mavae ai o faamalositiauga, na auai o ia ma lona toalua ma la laua tama teine i sauniga lotu. Na lagonaina e le tane



le Agaga Paia. Na ia faapea mai, “O le a ou faia le mea ua fautuaina mai e le epikopo.” O le taimi nei, ua malolosi lava i latou i le Ekalesia, ma ua mae’a ona faamauina i latou i le malumalu.²

Mai Tusitusiga Paia

3 Nifae 18:32; Mataupu Faavae ma Feagaiga 84:106; 138:56

FAAMATALAGA

1. Thomas S. Monson, “O Le Valaau Paia e Auauna Atu,” *Liahona*, Me 2005, 54.
2. Tusi i le au peresitene aoao o le Aualofa mai le tama teine a LaVene Call.
3. Polika Iaga, i le *O Afafine i Lo’u Malo: O Le Talafaasolopito ma le Galuega a le Aualofa (2011)*, 24.
4. Eliza R. Snow, i le *O Afafine i Lo’u Malo*, 116.



Faatuatua, Aiga, Toomaga

Mai Lo Tatou Talafaasolopito

O le fesoasoani ia i latou, o e ua se ese ina ia toe foi mai i le talalelei a Iesu Keriso, ua avea pea lava ma vaega o le avea ai ma Au Paia o Aso e Gata Ai, ma se sui auai o le Aualofa. Na saunoa Peresitene Polika Iaga (1801–77) faapea, “Se i o tatou alolofa le tasi i le isi, . . . ma ia avea i latou o e o mafai ona pupula, e taitaia lē ua tauaso seia mafai ona latou vaaia le ala mo i latou lava.”³

O Eliza R. Snow, le peresitene aoao lona lua o le Aualofa, na faailoaina mai ma le agaga faafetai taumafaiga a uso i Ogden, Iuta, ISA, ina ia faamalositia e le tasi le isi. “Ua ou malamalama lelei faapea, o le tele o le taimi ma taumafaiga ua foai [i le tulaga o le auauna atu] lea e le mafai lava ona faamauina,” na ia saunoa ai. Peitai, i le iloa ai o loo tausia se tusi faalelagi o galuega a tamaitai, a o latou aapa atu ia i latou ua maalili o latou loto, na ia fai mai ai: “Na saunoa Peresitene Iosefa Samita o lenei sosaiete na faatulagaina ina ia faaolaina agaga. . . . O loo i ai se tasi tusi o loo tausia o lo outou faatuatua, lo outou aga-lelei, a outou galuega lelei, ma upu. . . . E leai se mea o misi”⁴

O Le a se Mea e Mafai Ona Ou Faia?

1. O ia te a’u ea le lototele e fai atu ai i se uso le toaga, ma te o i se fonotaga a le Aualofa?
2. O i ai ea i uso o loo ou vaavaaia le lagona mafanafana e tuuina mai ai ia te au fesili e uiga i le talalelei?

TUSIGĀMANATU KONAFESI OKETOPA

“O le mea ua fai atu ai A’u o le Alii, ua Ou fai atu ai; . . . pe i lo’u lava leo po o i le leo o a’u auaua, ua tutusa lava” (MF&F 1:38).

A o e suesueina le konafesi aoao ia Oketopa 2012, e mafai ona e faaaogaina nei itulau (ma Tusigāmanatu o le Konafesi i lomiga i le lumanai) e fesoasoani ai ia te oe e suesue ma faaaoga aoaoga talu ai nei a perofeta soifua ma aposetolo ma isi taitai o le Ekalesia.

TALA MAI LE KONAFESI

Olioli i le Taimi Nei

O maua ma lo’u toalua o Harriet, e fiafia lava e tietie i a ma uila vilivae. O se mea maoae le o ese atu ma olioli i le matagofie o le natura. E i ai ni a ma auala patino ma te fiafia e tietie i ai, ae ma te le gauai tele atu i le mamao ma te o ai, po o le saosasoa ma te o ai, e faatusatusa i isi tagata tietie.

Peitai, mai lea taimi i lea taimi, ou te manatu ai e tatau ona fai si a ma tauvaga laititi. Ou te manatu sa mafai ona maua se ma taimi sili atu, po o le tietie foi i se saosasoa tele atu, pe afai lena ma te uunaia atili i ma’ua lava. O nisi taimi ou te faia ai se mea sese tele o le ta’u atu o lea manatu i lo’u toalua lelei.

O lana tali masani lava i a’u fautuaga o sea ituaiga, e agalelei tele, manino, ma tuusa’o i taimi uma. E ataata o ia ma faapea mai, “Dieter, e le o se tuuga; o se malaga. Olioli i le taimi nei.”

E sa’o lava o ia!

O nisi taimi i le olaga tatou te soona taulai atu ai i le tini ae ua tatou le maua ai le olioli i le malaga. Ou te

le o alu e tietie uila ma lo’u toalua ona ou te fiafia e uiga i le tini taunuu. Ou te alu ona o le aafiaga o le i ai faatasi ma ia, e suamalie ma faafiafiaina.

Pe le foliga mai ea e faavalevatea le faaleagaina o aafiaga suamalie ma faafiafiaina ona o lo tatou mafaufau pea i le taimi o le a mae’a ai?

Pe tatou te faalogologo ea i musika malie, a o faatalitali mo le nota mulimuli e mou atu, ae tatou te le’i faatagaina i tatou lava ia olioli moni ai? Leai. Tatou te faalogologo ma fesootai atu i fesuisuiaiga o le fati, pa’ō, ma faigaleo i le musika atoa.

Pe tatou te faia ea a tatou tatalo i le na o le fai atu “amene” po o le faaiuga i le mafaufau? E leai. Tatou te tatalo ina ia tatou latalata atu i lo tatou Tama Faalelagi, ina ia maua Lona Agaga ma lagonaina Lona alofa.

E le tatau ona tatou faatalitali ina ia fiafia seia tatou oo atu i se vaega i le lumanai, ae tei ua iloa sa avanoa lava le fiafia, i taimi uma—! E le tali-sapaiaina le olaga i le tau ina na ona mafaufau i mea ua tuanai. “O le aso lenei na faia e Ieova . . .,” sa tusia ai e

le Fai-Salamo. “E olioli ma fiafia i ai.” [Salamo 118:24.]

Peresitene Dieter F. Uchtdorf, Fesoasoani Lua i le Au Peresitene Sili, “E Uiga i Faanoanoaga ma Filifiliga,” Liahona, Nov. 2012, 23–24.

Fesili e Manatunatu Loloto I Ai

- E mafai faapefea ona e maua le olioli i lau faigamalaga o le olaga?
- E mafai faapefea ona e aumaia le olioli i olaga o i latou o loo siomia ai oe?
- O le a le sootaga i le va o le loto faafetai ma le olioli?

Mafaufau e tusi ou mafaufau i lau api talaaga pe talanoaina foi ma isi.

O punaoa faaopoopo faatatau i lenei atu: *Faamaoni i le Faatuatua* (2004), “Togiola a Iesu Keriso,” 180–187; “Agaga Faafetai,” “Fiafia,” ma le “Salamo” i Autu o le Talalelei i luga o le LDS.org; Richard G. Scott, “O Le Mauaina o le Olioli i le Olaga,” *Ensign*, May 1996, 24–26.

Ina ia faitau, matamata, pe faalogologo foi i lauga o le konafesi aoao, asiasi ane i le conference.lds.org.

Faatusatusaga: Faaipoipoga ma le Aiga



Onisi o autu taua ua laugaina e le sili atu i le tasi le failauga o le konafesi aoao. O mea nei na saunoa mai ai failauga e toafa e uiga i le faaipoipoga ma le aiga. Taumafai e vaavaai mo isi faatusatusaga, a o e suesueina lauga o le konafesi.

- “O le tuufaatasia o se alii ma se tamaitai ina ia faaipoipoina faale-malo ma faaletulafono, ua le gata o le tapenaga mo tupulaga o le lumanai e maufofi i le fogaeleele, ae e faapea foi ona aumaia ai le olioliga sili ma le faamalieina lea e mafai ona maua i lenei aafiaga i le olaga nei.”¹ —Elder L. Tom Perry o le Korama a Aposetolo e Toasefululua
- “E manaomia e fanau le malosiaga patino ma faalelagona lea e sau mai le tausiaina e matua e toalua, o e ua tutufaatasi i la laua faaipoipoga ma a laua sini.”² —Elder Dallin H. Oaks o le Korama a Aposetolo e Toasefululua

- “O le faavae o le agalelei ma le faaaloalo e amata i o tatou aiga. E le o se mea e faateia ai le faaitiitia o uiga faaalua o tagata lautele i le taimi lava e tasi e faamalepeina ai le aiga.”³ —Elder Quentin L. Cook o le Korama a Aposetolo e Toasefululua
- “E tele se galuega tatou te faia e faamalolosia ai faaipoipoga i malo ua faateleina ai le faatauaaina o faaipoipoga ma teena ai ona faamoemoega.”⁴ —Elder D. Todd Christofferson o le Korama a Aposetolo e Toasefululua

FAAMATALAGA

1. L. Tom Perry, “Avea ma ni Matua Lelei,” *Liahona*, Nov. 2012, 27.
2. Dallin H. Oaks, “Puipui le Fanau,” *Liahona*, Nov. 2012, 45.
3. Quentin L. Cook, “E Mafai Ea Ona Outou Lagonaina Nei?” *Liahona*, Nov. 2012, 7.
4. D. Todd Christofferson “Uso e, O Loo I Ai Se Tatou Galuega e Fai” *Liahona*, Nov. 2012, 49.

O LE A LE UIGA O LE AVEA MA SE KERISIANO?

1. “O se Kerisiano e faatuatua ia Iesu Keriso. . . .
2. “O se Kerisiano e talitonu o le alofa tunoa o le Atua . . . e mafai ai ona tatou salamo, faa-magalato atu i isi, tausi poloaiga, ma maua le ola e faavavau.
3. “O le upu *Kerisiano* ua faauiga-ina i le aveina i o tatou luga o le suafa o Keriso. Tatou te faia lenei mea, e ala i le papatiso ma le mauaina o le meaalofa o le Agaga Paia.
4. “O se Kerisiano na te iloina faapea . . . o perofeta a le Atua e molimau mai i taimi uma e uiga ia Iesu Keriso.”

O Elder Robert D. Hales o le Korama a Aposetolo e Toasefululua, “Avea o se Kerisiano Moni e Faapei o Keriso,” *Liahona*, Nov. 2012, 90.

Folafolaga Faaperofeta

“E mafai e le Faaola ona soloiesea o tatou loimata o le faanoanoa ma aveesea le avega o a tatou agasala. O Lana Togiola, ua mafai ai e i tatou ona tuua i tua le taimi ua tuana'i ma agai i luma ma lima mama, o se loto mama, ma se naunautai e faia le mea sili atu, ma, aemaise lava le avea ma tagata sili atu.”

Peresitene Dieter F. Uchtdorf, Fesoasoani Lua i le Au Peresitene Sili, “E Uiga I Faanoanoaga ma Filifiliga,” *Liahona*, Nov. 2012, 24.

TAUSIGA O Fanau ia Maufetuuna'i



*O le tulaga lelei e tali atu ai
fanau i faaletonu o le olaga,
e faalagolago tele lea i le
tulaga lelei e fesoasoani
ai o latou matua ia i latou
e atiina ae uiga ma tomai
o le maufetuuna'i.*

Saunia e Lyle J. Burrup

Tautua a le AAG mo Aiga

Ua tumu le olaga i tofotofoga. Ua fetalai mai le Alii faapea ua Ia filifilia i tatou mai “i le ogaumu o i ai le puapuaga” (Isaia 48:10), lea o le a “tofotofoina, e pei lava o Aperaamo” (MF&F 101:4), ma o le a faapea ai e le tiapolo “ona maua ai [e i tatou] le poto masani, ma o le a avea ma [o tatou] lelei” (MF&F 122:7). O lenei mea e foliga matuā taufaamata’u. Atonu tatou te fesili faapea, pe mafai ona tatou fiafia ma filelemu i taimi o tofotofoga? Ua aoao mai ia i tatou tusitusiga paia faapea e mafai (tagai i le 2 Korinito 12:10; Eperu 5:7–8; MF&F 127:2).

A o fautuaina ai faifeautalai i le nofoaga autu mo le aoaoina o faifeautalai (NAF) i Provo, Iuta, na ou iloaina ai faapea o le mafuaaga taatele sili o faafitauli faalelagona, o le leai lea o se loto talitonu e mafai ona toe faaleleia. Pe a tauivi se faifeautalai poto, ma talenia, lea e aunoa ma se talaaga o ni faafitauli faalelagona, e masani ona tuufesili taitai perisitua ma isi pe aisea. I le tele o tulaga, o le faifeautalai sa le’i aoaoina e ia le tulaga e taulimaina lelei ai faafitauli. E mafai e matua ona fesoasoani i a latou fanau ina ia foia ia ituaiga o faafitauli, e ala i le aoaoina o mataupu faavae ia e uunaia ai le saga maufetuuna’ia.

Uiga Faaalia o le Maufetuuna’i

O le faauigaga autu o le upu *maufetuuna’i* e faatatau lea i le gafatia e se mea ona toe maua lona foliga po o le tulaga, pe a uma ona faapi’o, faameme’i, pe faafeoma’i. O aso nei, ua tatou faaogaina tele le upu e faamatala ai lo tatou gafatia e toe tula’i mai i ni mafatiaga.

Ua tatou iloa mea e lua e uiga



i faigata ma le toe vave faaleleia: Muamua, e i ai le “faafeagai o mea uma” (2 Nifae 2:11). Lona Lua, i le mauaina o soo se mea e sili lona taua, e manaomia ai se osigataulaga sili.

Pe a faasolo ina maua e fanau le malosi e toe vave tulai mai ai, o le a latou malamalama ma talia nei mea moni e lua. Latou te vaai atu i le olaga o se tulaga e tumu i luitau ma fesuisuia’i soo, peitai ua latou talitonu e mafai ona latou taulimaina na luitau ma suiga. Latou te mafaufau i mea sese ma vaivaiga o ni avanoa e aoao mai ai, ma latou te taliaina faapea o le malolo, atonu e muamua mai i le manumalo.

A o atiina ae e fanau le maufetuuna’i, latou te talitonu e mafai ona latou uunaia ma e oo lava i le puleaina o taunuuga i o latou olaga e ala i taumafaiga, vaaiga faalemafau, malamalama, ma tomai. Faatasi ma lenei uiga, latou te tula’i atu ai i mea e *mafai* ona latou faia, nai lo mea e le mafai ona latou puleaina.

O se isi faailoga o le maufetuuna’i, o le vaai atu lea ma se faamoemoega ma se uiga sili o le olaga ma tagata. O le i ai o se manatu i le faamoemoega o se mea, o le a fesoasoani ai



i a tatou fanau e aloese mai le fiu gofie, e ui lava i tulaga faaletonu ma uunaiga malolosi e faia lea tulaga. A oo ina atili maufetuuna'i a tatou fanau, o le a latou atiina ae mea faatauaina loloto ia e taitaia ai i latou: o le alofa moni, mama, amiosa'o, faamaoni, galue malosi, ma le faatua-tua i le Atua. O le a latou faaauai i latou lava i mea o loo tutupu i o latou siosiomaga, ma mafaufau mo le tuuto atu

O Lesona o le Maufetuuna'i mai le Olaga Faatamaitiiti

Ao ou tamaitiiti, sa toatele tagata matutua i lo'u olaga—o matua, tuaoi, faiaoga, ma taitai o le Ekalesia—na aoaoina a'u ma lo'u uso ma tuafafine i lesona nei. O nei mataupu faavae e lima atonu e fesoasoani mo lau fanau:

1. *O le totogiina o le tau mo avanoa.*

Sa ou iloaina faapea, o le saolotoga e taaalo ai ma a'u uo i aso e sosoo ai, na faalagolago lea i lo'u sau i le fale i le taimi e tatau ai.

2. *O le tulafono o le seleselega.*

Afai ou te manao i se tupe, e tatau ona tilivaina nusipepa mo aiga sa tofia i ai a'u, ma aoina mai le tupe i masina taitasi.

3. *O le tali atu mo a'u lava ma le tiutetauave patino.*

Sa tatau ona ou faamae'aina au lava meaaoga, galuega faatino mo le faaaliga faasaeanisi, ma pine taualoa.

4. *O le tulafono o le toetotogi.*

Sa mafai ona ou faatoese ma toe faasa'oina le mea sese, mo se amioga le lelei sa ou faia. O nisi taimi na fautuaina ai a'u e o'u matua, ina ia ou faia nisi feau faaopoopo, e pei o le veleina o le vao.

5. *Aoao mai mea sese.*

Afai e le lelei le teuina o lo'u moega, le mamā le fufuluina o ipu, pe le lelei le veleina o le vao, sa faatonuina a'u ia toe faia nei feau ia sa'o lelei.

—Lyle J. Burrup

i mea faatauaina, nai lo le lagona o le faaesea ma aloese mai le faafitauli.

Ua aoao atu ma faamalosia e le talalelei nei mea faatauaina ma vaaiga.

O Le Manao ia Atoatoa e Faavaivaia ai le Maufetuuna'i

O le tasi tulaga e taofia ai le atinaega o le maufetuuna'i, o se malamalamaaga sesē lea e uiga i le poloaiga ina ia atoatoa (tagai i le Mataio 5:48). O lenei malamalamaaga sesē o le vaega sili ona taatele lea ua ou vaaia, lea e faavaivaia ai le maufetuuna'i o faifeutalai fou. Latou te mananao ina ia atoatoa i mea uma, ona latou te alofofa i le Tama Faalelagi ma Iesu Keriso, ma latou te le manana'o e faatiga ia i Latou. Ae latou te le iloaina o le Alii e galue e ala i auauna vaivai ma faatauvaa (tagai i le MF&F 1:19–23) ma, i le tauivi ai ia atoatoa, e le faapea o le a tatou le faia ai lava ni mea sesē, nai lo lena, tatou te avea ma tagata tuputupu a'e atoatoa e ala i le Togiola a Iesu Keriso, a o tatou tauivi e mulimuli ia te Ia (tagai i le Mataio 5:48, vaefaamatalaga e).

O lenei malamalamaaga sesē atonu e mafua mai foi mai mea o loo aoao atu e atunuu i a tatou talavou: faapea o lo latou taua e faalagolago i taleni ma le faatinoga. I a'oga ma nuu, o nisi taimi, e oo lava i le lotu po o le aiga, e vaaia ai e talavou a latou uo o amanaiaina, taliaina, faatagaina, ma viia mo le talenia i le faia o se mea. O le mea lena, latou te taumafai ai ina ia faia faapea. A o latou faia, e amata ona latou popole i le toilalo ma le faia o mea sese. Latou te filifili le mea e fai, e faalagolago i le tulaga faamanuiaina latou te manatu o le a latou o'o i ai. Latou te faatuutuu i le faia o se mea, pe a latou le lagonaina le lototele e fai ai. Latou te popole i manatu o isi, pe a latou faia mea sese. Latou te popole nei le toe taliaina i latou e a latou uo. Latou te vaai atu i la latou faatinoga, o se fua o lo latou taua. O lo latou manao ia atoatoa, ua avea ma se matai sau, ma faapea ona faavaivaia ai lo latou maufetuuna'ia.

Mo se faataitaiga, talu ai o faifeutalai i le NAF, e le mafai ona filifili le mea o le a latou faia, po o le mea e le tatau ona faia, o se vaega o la latou aoaoga, latou te faia ai mea sese a o latou aoao e tautatala i se gagana fou, aoao atu mataupu o le talalelei, ma faatino a latou galuega faafai-feutalai. Latou te faia nei mea sese i luma o ni tagata ese, ma afai latou te le'i mauaina se agaga ia maufetuuna'i, latou te lagonaina le faanoanoa ma le lofituina.

O Le Fesoasoani i Fanau e Atiina ae le Maufetuuna'ia

E faapefea la ona tatou fesoasoani i a tatou fanau e atiina ae le maufetuuna'i? Ua tuuina mai e lo tatou Tama Faalelagi se ata faataitai. (tagai i le Mose 1:39) ma lo tatou taua tele (tagai i le MF&F 18:10), ia ua faavae i luga o lo tatou tofi o se atalii po o se afafine. Ua Ia tuu mai ia i tatou tulafono, ina ia iloa ai le mea ua Ia faamoemoeina mai (tagai i le MF&F 107:84), faatagaina i tatou e faia filifiliga (tagai i le 2 Nifae 2:15–16), ma faamamaluina a tatou filifiliga (tagai MF&F 130:20). Na te faatagaina le aoaoina ma faatonuga e faasa'o ai mea sese (tagai MF&F 1:25–26) ma le salamo ma le toe totogiina e faasa'o ai le agasala (tagai MF&F 1:27–28).

O nisi nei o fautuaga mo le auala atonu tatou te faaaogaina ai nei mataupu faavae i o tatou aiga:

- Tatalo ia malamalama i malosiaga o a outou fanau, ma le auala e fesoasoani ai i o latou vaivaiga.
- Ia onosai ma ia iloa o fanau e manaomia se taimi e atiina ae ai le maufetuuna'i.
- Tauivi ia malamalama faapea o sesē ma tulaga toilalo, o ni avanoa ia e aoao mai ai.
- Faataga taunuuga faalenatura, ma talafeagai e ave ma tulaga e aoaia ai.
- Faaaloogia faaiuga a fanau, tusa lava pe o a latou filifiliga lē lelei o le a le maua ai avanoa.

A o atiina ae e fanau le maufetuuna'i, o le a latou talitonu e mafai ona latou uunaia taunuuga i o latou olaga e ala i le taumafai, mafaufau loloto, malamalama, ma le tomai. Latou te taulai atu i mea e mafai ona latou faia, nai lo mea e le mafai ona latou puleaina.

- Aloese mai le tuuina i lalo o fanau mo le solia o tulafono.
- Aua le faaleaogaina taumafaiga e ala i le soona faitioina.
- Nai lo le viiaina o mea ua ausia, uunaia ma viia taumafaiga.
- “Ia sili atu ona tele lau faamalo atu i lau fanau, nai lo le faasa’oina o i latou. Faamalo atu ia i latou e oo lava i mea aupito sili ona faatauvaavaa ua latou ausiaina” (Peresitene Ezra Taft Benson [1899–1994], “O Le Nofoga Faamamaluina o Tamaitai,” *Ensign*, Nov. 1981, 107).

A o tatou galulue ma le agaga tatalo i le galuega faigata o le tausia o fanau ia maufetuuna'i, o le a faamanuiaina i tatou e le Alii i le taitaiga ma musumusuga tatou te manaomia, e fesoasoani ai ia latou maua le malosiaga faalelagona ma le faaleagaga e taulima ai luitau o le olaga. ■



O Fautuaga mo le Tausiaina o Fanau ia Gafatia, ma Maufetuuna'i.

E ui o le tausiga faamatua e manaomia ai se taumafaiga patino mo tamaiti taitasi, o nisi o mataupu faavae e foliga mai e toetoe lava tutusa i le lalolagi atoa. O mataupu faavae nei ua faamaonia le aoga.



Nai Lo le Faia o Lenei . . .

Fai tulafono ma faasalaga e le taotasi, pe fuafua faatatau i se mea na tupu.

Tuu le avanoa i fanau e aloese mai ai i taunuuga o a latou filifiliga.

Ia matele i le faia o faasa'oga.

Ia le foliga o faia faatatau i se mafuaaga ma fesuisui ai pe a manaomia mai le usiusitai.

Faamalo atu mo na o taunuuga.

Auina atu le savali i fanau faapea o lo latou taua faale-tagata lava ia, e faalagolago i taunuuga.

Talanoa e uiga i toilalo po o faamanuiaga, i le fesootai ai ma le tulaga laki po o le taleni.

Taumafai e foia faafitauli a fanau e ala i le tuuina atu ia i latou tali uma.

O le faia o fanau ia manatu e valelea e ala i le faitioina o i latou, a latou taumafaiga, ma mea latou te ausia.

Fai Le Mea Lea . . .

Ma Maua le Taunuuga Lenei . . .

Talanoaina tulafono, ma fai faasalaga fetai ma talafeagai, e fesootei i amioga, ma faaaloaloga e le gata i matua ae faapea foi le tamaitiiti.

E tatau ona iloa e fanau mea o le a tutupu, ma aoao ia iloa o filifiliga e i ai o latou taunuuga.



Tuu le avanoa i fanau e aoao mai ai i taunuuga faalenatura ma fetai o a latou filifiliga.

E aoao mai e fanau le tulituliloaina ma le tiutetauave mo a latou filifiliga.

Ia matele i le tuina atu o le faamalo. Sami nai laa laiti i le itu sa'o.

E aoao e fanau mea e mananao ai matua. Latou te lagonaina le faamalosia-ina, faataua, ma le talisapaia.

Ia tutusa taimi uma i le ofoina atu o tau manaomia mo gaoioiga ma amioga atonu e te manao e faamalosia.

E aoao e fanau faapea, e le faapea e tatau ona latou mananao e faia mea faigata; pau lava le tulaga e i ai, o le faia lea.



Faamalo atu mo le taumafaiga, tusa lava pe o le a lona taunuuga.

E lagonaina e fanau le faamalosia-ina, mautinoa, ma sili atu le naunautai e taulimaina luitau.

Tau atu i fanau e i ai so latou taua na fananau mai ma i latou, ona o i latou o atalii ma afafine o le Atua, ma o loo i ai so latou gafatia paia.

O le taua o le tagata lava ia, o le a faapipii atu i le gafatia e faavavau o le tamaitiiti, nai lo le tulaga faamanuiaina po o le toilalo lē tumau.

Faauga le toilalo o se mea lē tumau, ma se avanoa e aoao mai ai. Faauga le faamanuiaina o se taunuuga o le galue malosia ma le ositaulaga.

O fanau ua itiiti le lotovaivai e ala i le, po o le fefe i mea faaletonu, ae ua sili atu le naunau ina ia filigā.

Fesoasoani i fanau (1) e saili le mea na tupu, (2) iloilo le mafuaaga o le taunuuga (3) saili le mea e mafai ona latou faia e aloese ai mai lenei faa-fitauli i le isi taimi oi luma.

E atiina ae e fanau vaaiga faalemafaufau o lo latou tulaga gafatia, o le a taulimaina ma foia a latou faa-fitauli, ma o le a iloa o lo o latou puleaina o latou lava olaga, ma mafai ona faatoilaloina luitau.

Faalogo atu, ma lagolagoina ma faamalosia, ina ia mananao ai lau fanau e toe o mai ia te oe mo se fesoasoani.

Ia sili ona fiafia le fanau e talanoaina ma oe a latou mea sese ma faa-fitauli.





**Saunia e Elder
D. Todd Christofferson**
O Le Korama a Aposetolo
e Toasefululua

Ua E Saoloto

*O le mea e manaomia e le Atua, o le ituaiga
tuutō lea na faaalua e Iesu.*

O le talalelei, na saunoa ai Peresitene Gordon B. Hinckley (1910–2008), “o se fuafuaga o le saolotoga lea e tuuina mai le lotopulea i le manao, ma le taitaiga i le amio.”¹ O lenei fuafuaga e taitaina atu ai i tatou i le malamalama faateleina ma le gafatia, alofa tunoa ma le malamalama faateleina. O le saolotoga e avea ai oe faapei o le tulaga e mafai, pe tatau ona avea ai oe. Peitai, ina ia atoatoa lou saolotoga, e ao ona e naunau e tuu ese au agasala uma (tagai i le Alema 22:18), o ou tuinanauga, o mausa e te fiafia i ai ae le lelei, atonu foi e oo lava i nisi o mea lelei ia e faalavelavea ai mea e silafia e le Atua e tatau mo oe.

O Le Siufofoga o le Matai

O le uso o lo’u tina o Adena Nell Gourley na faamatalaina se aafiaga mai le tele o tausaga ua mavae faatasi ma lona tama—lo’u tamamatua, o Helge V. Swenson, lea ua maliu—lea e faapupula ai le uiga o la’u faamatalaga. Na ia faamatalaina faapea:

“Na ma asiasi atu ma la’u tama teine i le fale o o’u matua. Pe tusa o le goto ifo o le la, na fesili mai ai lo’u tina pe ma te manao e o atu i le poletito i tua ma vaavaai ia Tama o valaau ana mamoe [e lima] e o mai i

totonu o le falemanu mo le po. O Tamā, . . . o se peteriaka o le siteki, ma . . . o se tagata ua i ai uiga uma lava e lelei ma agamalu ma faamaoni, e pei ona tatau ona i ai i se tagata o le Atua.

“ . . . Na savali atu Tamā i le faatausiusiuga o le fanua ma valaau, ‘O mai.’ I le taimi lava lena, e aunoa ma se toe faatali e lamuina meaai sa aia i lena taimi, na liliu uma mai lava ulu e lima agai i le mea o i ai o ia, ona amata lea ona tamomo’e mai mamoe seia latou taunuu mai i ona autafa, ma ia pai atu i ulu taitasi.

“Na faapea mai la’u tama teine laititi, ‘Auoi, Tinamatua, na faapefea ona mafai e Tamamatua ona aoao i latou e faia lea tulaga?’

“Na tali mai lo’u tina, ‘Ua iloa lelei e mamoe lona leo, ma, e alolofa i latou ia te ia.’ Ae e ao ona ou faatoese atu e lima mamoe na i ai i le fanua, ma e lima ulu na ea i luga ina ua ia valaau atu, ae na o le fa na tamomo’e atu ia Tamā. I se mamao, i le faatausiusiuga lava o le fanua, a o vaai sa’o atu ia Tama, na tutu ai se manufafine lapo’a. Na valaau atu Tamā ia te ia, ‘Sau ia.’ Sa na ona gaoioi pei o le a amata ona sau, ae e le’i sau. Ona amata lea ona savali atu Tamā i le fanua, ma valaau atu ia te ia, ‘Sau loa. E le o toe nonoaina oe’



Na laina uma atu i ona tua isi mamoe e fa ma mulimuli atu ia te ia.

“Ona faamatala mai lea e Tinā ia i maua faapea, i nai vaiaso ua mavae, na aumai ai e sa laua uo le [manufafine] lea ma tuu atu ia Tamā, faatasi ma le faamatalaga faapea ua ia le toe mana’o ai i le mamoe lea i lana lafu. Na fai mai le tamaloa lea, e segisegi ma ulavale, ma e na te taitaiina isi ana mamoe i taimi uma i fafo o le pa, ma tele ai ana faafitauli, o le mea lea ua ia manao ai e tia’i. Na taliaina ma le fiafia e Tamā le mamoe, ma, mo nai aso na sosoo ai, na ia nonoaina ai i totonu o le fanua, ina ia aua ne’i sola ese. Ona ia aoacoina lea ma le onosai le mamoe, ina ia alofa i ai faatasi ma isi mamoe. Ona sosoo lea, a o ia amata ona lagonaina le saogalemu i lona aiga fou, na tuu ai e Tamā se fasi maea puu-puu i lona ua, ae ua lē toe nonoaina.

“A o faamatalaina e Tina lenei tala ia i maua, ua toeitiiti lava oo Tamā ma ana mamoe i le [mamoe faifaiaga] i le faatau-siusiuga o le fanua, ma i le taaligoligoa na matou toe faalogo ai foi o ia valaau, ‘Sau loa. E le o toe nonoaina oe. Ua e saoloto.’

“Na ou lagonaina ua ou melotagi, a o ou vaai atu [i le mamoe] ua amata ona savali ma oo atu ai i autafa o Tamā. Ona sosoo lea, faatasi ma lona lima agaalofa i luga o lona ulu, na ia toe liliu mai ai faatasi ma lana tamai lafu, ma toe savavali mai i le mea na matou i ai.

“Na ou mafaufau i le auala e aveai nisi o i tatou, o e ua aveai uma ma mamoe a le Atua, ona noatia ma lē saoloto ona o a tatou agasala i le lalolagi. I lo’u tu ai iina i le poletito pito i tua, na ou faafetai lemu a’e i lo’u Tama Faalelagi, o loo i ai leoleo mamoe faamaoni ma faiaoga i lalo nei, o e e onosai ma agalelei ma naunau e aoao tatou e uiga i le alofa ma le usiusitai, ma ofoina mai ia i tatou le saogalemu ma le saolotoga i totonu o le lafu, ina ia mafai ai, e ui lava atonu tatou te mamao ese mai le nofoaga

*O se mea
faafiafialoto
le iloina, e
mafai ona tatou
faalauteleina lo
tatou saolotoga,
e ala i le faa-
atoatoaina o lo
tatou usiusitai.*

saogalemu, o le a tatou iloina le siufofoga o le Matai pe a Ia valaau mai, ‘Sau ia. O lena ua e saoloto.’”²

E maeu le fiafia o le iloina faapea e mafai ona tatou faalauteleina lo tatou saolotoga e ala i le faaatoatoaina o lo tatou usiusitai. I upu a Peresitene Boyd K. Packer, Peresitene o le Korama a Aposetolo e Toasefululua, “Tatou te le usiusitai ona faapea ua tatou tauaso, tatou te usiusitai ona e mafai ona tatou vaai.”³

O la tatou filifiliga i lenei olaga, e le o le faapea o le a tatou, pe, o le a tatou lē mulimuli atu i soo se mana. O la tatou filifiliga o le iloa lea po o le faapule o le a tuu atu i ai lo tatou usiusitai: o le Atua, po o Satani. E pei ona ta’u mai e Liae, o se filifiliga i le va o le saoloto ma le saisaitia (tagai i le 2 Nifae 2:27). Afai e le o le tasi, o lona uiga e tataua lava o le isi.

O lo tatou tuu atu i le Atua ma Lana aia tataua e pule ma nofotupu ia i tatou, e aumai ai isi faamanuiaga. O nisi o nei faamanuiaga tupito o le faatuatua ma le lototalitonu lea e mafai ai e i tatou ona ola i le filemu. Na fetalai atu le Alii ia Iosua:

“E le tu mai se tagata e tetee ia te oe i aso uma o lou ola; e pei ona ou i ai ia Mose, e faapea ona ou i ai ia te oe; ou te le tuua lava oe: ou te le tuulafoai lava ia te oe. . . .

“Tau ina e faamalosi, ma ia matua lototele lava; ia e anaana e fai e tusa ma le tulafono uma na fai atu ai Mose la’u auauna ia te oe; aua e te alu ese ai i le itu taumatau po o le itu tauagavale, ina ia manuia ai oe i mea uma e te alu i ai” (Iosua 1:5, 7).

“Ua Ou Manumalo i le Lalolagi”

Afai e faapea ona tatou faia, “fai e tusa ma le tulafono uma,” o le a faapea foi ona tatou maua le lototalitonu faapea ua faatasi le Atua ma i tatou faapei ona ia faatasi ma Mose. Faatasi ma le Fai-Salamo, o le a mafai ona tatou faapea atu, “Ua ou faatuatua i le Atua; ou te

le fefe i se mea e faia e tagata ia te au” (Salamo 56:11). Pe le i folafola mai ea le Alii faapea, “E maua foi outou e le puapuaga i le lalolagi, a ia outou loto tetele, ua ou manumalo i le lalolagi” (Ioane 16:33)?

I tausaga ua mavae, na ou pulefaamalumu ai i se fono aoai faale-Ekalesia. O le alii, e ana ia agasala lea sa avea ma autu o le fono aoai sa nofo i o matou luma, ma faamatala e uiga i lona talaaga. O ana agasala, e moni lava e matua ogaoga. Peitai, sa faapea foi ona matuia agasala faasaga ia te ia. A o matou fefulaisaia le mataupu, na fai si o’u popole, ma ou faanoi ai ou te tulai ese, ina ia mafaufau atili ma tatalo e uiga i le mataupu na o au lava, ae ou te lei toe faatasi atu ma le aufono.

Na ou tu i luma o se nofoa i totonu o lo’u ofisa, ma ole atu i le Alii e fesoasoani mai ia te au ia ou malamalama i le auala atonu na faatinoina ai lea ituaiga agasala. Ou te le’i vaaia, ae na ou lagonaina se lua tele faatasi ma se ufiufi i ona luga. O se tasi o tulimanu o le ufiufi, sa sisiina laititi mo na o sina vaega, ma ou vaaia ai i totonu o le lua le loloto ma le tele o le agasala o loo i ai i lenei lalolagi. Sa sili atu nai lo mea ua mafai ona ou malamalama ai. Na lofituina a’u. Na ou faapa’u ifo i le nofoa na i o’u tua. O lea aafiaga na foliga na tau ave ai la’u manava. Na ou tagi le leoa, “E mafai ea faapefea ona matou faamoemoe e faatoilaloina nei ituaiga agasala? E mafai faapefea ona faasoina mai matou mai se mea sili ona pogisa ma lofituina faapea?”

I lenei taimi, na oo mai i lo’u mafaufau lenei fuaitau: A ia outou lototetele, ua ou manumalo i le lalolagi” (Ioane 16:33). Ou te le’i lagonaina lava muamua sea ituaiga o filemu pe a faatusa i le tulaga moni o le agasala. Na ou faalogoina se agaga faafetai loloto atu mo le matuitui o mafatiaga o le Faaola, ma i ai se agaga faafetai sili atu, e oo lava i le lagona fefe, mo le loloto o mea na tatau ona Ia faatoilaloina. Na ou lagonaina le filemu mo le alii, o le sa i o matou luma ina ia faamasinoina, i le iloina ai o loo i ai sona Togiola, o lona alofa tunoa ua lava e faamamaina ai o ia, ma toe faaleleia ai foi faamasinoga le tonu na ia mafatia ai. Na sili atu lo’u iloa i lea taimi, faapea o le a manumalo le lelei ona o Iesu Keriso, ae a aunoa ma Ia, o le a leai so tatou avanoa. Na ou lagonaina le filemu, ma sa matua suamalie lava.

E moni mea ua aoao mai e le Perofeta o Iosefa Samita: “O lea, uso pele e, sei tatou faia ma le fiafia mea uma o loo i ai i lo tatou malos; ona mafai ai lea i tatou ona tumau lava ma le mautinoa mausali, e vaavaai atu i le faaolataga a

le Atua, ma le faaalua o lona aao” (MFF123:17). O le folafolaga ia i latou o e tuuina atu o latou loto i le Atua e faapea, o Lona aao ma Lona mana, o le a faaalua i o latou olaga. Na fetalai le Faaola:

“Aua le matatau, le fanau laiti e, ona o outou o a’u, ma ua Ou manumalo i le lalolagi, ma o outou o ni o i latou o e ua tuuina mai e lo’u Tama ia te a’u;

“Ma e leai so i latou o e ua tuuina mai e lo’u Tama ia te a’u e leiloa” (MF&F 50:41–42).

O le ola ai ma lenei faamautinoaga, o se faamanuiaga, atonu e sili atu nai lo mea e mafai ona tatou faafetaia. O i tatou uma—o le a le pine, i se taimi o faalavelave o faaolioli mai, po o fenuniaiga faavaivai tagata, i le filifilia ai o le Atua e avea ma o tatou taiala—o le a mafai ona pesepese ma le loto atoa faapea, “E suamalie le filemu e aumaia e le Talalelei”⁴

E le tatau ona tatou faamoemoe mo le filemu, po o le saolotoga, po o le faatuatua, po o soo se isi lava mea e pei o se meaalofoa mai lo tatou Atua, pe afai o lo tatou taliaina o Lana taitaiga e maalili po o le faia ma le tomumu. Afai o se amiotonu faafoliga ae le o se amiotonu moni, e le tatau ona faamoemoeina se tau. O se lagolagosua le fesootai, vavamamao, ia te Ia lava, e le o se lagolagosua lelei. O lo tatou tuuto e ao ona atoatoa, faia ma le lotoatoa, ma tuuina atu ma le lotomalie. O le mea e manaomia e le Atua, o le tuuto lea na faaalua e Iesu, o le na talosagaina e inumia le ipu sili ona oona, lea na matautuina ai Ia lava, le Fofoa sili (tagai i le Mareko 14:33–36; MF&F 19:17–18). Ae peitai, na Ia faia lava, “o le loto o le Atalii ua tofatumoanaina i le finagalo o le Tamā” (Mosaea 15:7).

Ou te tuuina atu ia te outou la’u molimau faapea, e ala ia Iesu Keriso, le Alo o le Atua, e mafai ona avea tatou ia tasi ma le Atua, e pei lava ona tatalo Iesu ina ia faapea i tatou (tagai i le Ioane 17:20–23). Tau ina ia avea la outou lagolagosua mo i Laua, o le taiala susulu o outou olaga mo le faavavau. ■

Mai se saunoaga i se faigalotu na tuuina atu i le Iunivesite o Polika Iaga i le aso 30 o Oketopa, 2007. Mo le tusiga atoa i le gagana Peretania, asiasi i le <http://speeches.byu.edu>.

FAAMATALAGA

1. Gordon B. Hinckley, “A Principle with Promise,” *Improvement Era*, June 1965, 521.
2. Adena Nell Swenson Gourley, “I Walked a Flowered Path” (unpublished manuscript, 1995), 199–200.
3. Boyd K. Packer, “O Le Faitalia ma le Puleaina,” *Liahona*, Iulai 1983, 66.
4. “Sweet Is the Peace the Gospel Brings,” *Viiga*, nu. 14.

O LE OLA AI I
MATAUPU FAAVAE O LE

Faalagolago o le Tagata ia te Ia Lava



Saunia e Larry Hiller, Mekasini a le Ekalesia
ma **Kathryn H. Olson**, Auaunaga a le Uelefea

O Lui Quispe, o La Paz, i Polivia, atonu e tasi lona mata e mafai ona vaai ai, ae i ai se vaaiga manino ia te ia o lana sini ina ia faalagolago ia te ia lava, ma saili mea e tausai ai lona aiga. E ui ina feagai o ia ma faafitauli tau i le tamaoai ma le soifua maloloina, ae ua mautinoa lava e Lui lona lumanai. Na te faia mea uma na te mafaia e fesoasoani ai ia te ia lava a o tuu atu lona faalagolago i lona Tama i le Lagi. “Ua ou aoaoina e leai se mea e le mafaia pe a e maua le fesoasoani a lo tatou Tama,” o lana tala lea.

Faalagolago o le Tagata ia te ia Lava: O se Mataupu Faavae Faaleagaga ma Faaletino

Mo le valu tausaga talu ai, o lenei tamā o le fanau e toano, e 46 tausaga le matua, na faigaluega ma alu i le aoga ina ia maua sona tikeri i mea tau laau e toto e faifaatoaga e fetai ma le siosiomaga. O tausaga uma na aoga ai Lui, na aofia ai le malaga mo le tusa e 60 maila (97 km) mai lona tamai nuu o Achacachi, ina ia auai i le Iunivesite o Mayor de Sam Amdres. E ui i lenei osigataulaga, na faamae’aina ma le manuia e Lui lana aoga, ma o lea ua taulai atu nei i le isi ana sini, o le mauaina o sana lava faatoaga.

O Lui o se faataitaiga lelei o le faalagolago o le tagata ia te ia lava, e pei o le galuega, uelefeā, ma le teuina o meaai. Ae, o le mataupu o le faalagolago o le tagata ia te ia lava, e tutusa lava lona taua faaleagaga, e pei o le faaletino. O Elder Robert D. Hales o le Korama a Apose-tolo e Toasefululua na faauigaina le *faalagolago o le tagata ia te ia lava* o le tauaveina lea o le tiutetauave mo lo tatou lava uelefeā faaleagaga ma faaletino, ma mo i latou o e na tuuina mai e le Tama Faalelagi i la tatou tausiga.”¹

Na fetalai mai le Alii na te le'i tuuina mai lava se tulafono faapea ua na o le faaletino (tagai i le MF&F 29:34–35). Atonu o le poloaiga e galue, sa faatatau e faamanuiaina ai tatou faaleagaga, e pei foi o lo tatou tausiga faaletino (tagai i le Kenese 3:17–19).

Faalagolago o le Tagata ia te ia Lava i le Faaleagaga

O faamanuiaga faaletino o le faalagolago o le tagata ia te ia lava, ua faapitoa lona manino mai i taimi o faalavelave, e pei o faalavelave faalenatura, o le leai o se galuega, po o faaletonu tautupe. Peitai, o le faalagolago o le tagata ia te ia lava faaleagaga, e matuā tutusa lava lona manaomia i taimi faapea. O i latou e i ai faavae faaleagaga mausali, ua faamanuiaina i le filemu, faamautinoaga, ma le faatuatua sili atu, pe a valaau atu i le Tama Faalelagi mo se fesoasoani.

Ua fautua mai taitai o le Ekalesia ia i tatou, ina ia sauniuni mo faalavelave faaleagaga. Na saunoa mai Peresitene Boyd K. Packer, Peresitene o le Korama a Apose-tolo e Toasefululua:

“Ua aoaoina i tatou ia teuina . . . meaai, lava-lava, ma, pe a talafeagai ai, o kesi—*i le fale*. . .

“E le mafai ea ona tatou vaai atu o le mataupu faavae lava lea e tasi e faatatau i musumusuga ma faaaliga, o le foiaina o faafitauli, i fefautuaiga, ma le taitaiga? . . .

“Afai e aveesea lo tatou tutoatasi faalelagona ma faaleagaga, o lo tatou faalagolago ia i tatou lava, o le a faapea ona faavaivaia i tatou, atonu pe sili atu, nai lo le taimi tatou te faalagolago ai i mea faaletino.”²

Tuuina Atu ma le Taliaina

E le tatau ona aveseseina le faalagolago o le tagata ia te ia lava, mo le tutoatasi atoatoa. Pe

a uma mea uma, tatou te faalagolago uma lava i lo tatou Tama Faalelagi mo mea uma (tagai Mosaea 2:21). Tatou te manaomia Lana taitaiga faifai pea, tausiga, ma le puipuiga.

Tatou te faalagolago foi le tasi i le isi. Talu ai ua tuuina mai ia i tatou meaalofa faaleagaga eseese, ua faamoemoeina i tatou e fefaasoa'i mea ua tuuina mai ia i tatou, ina ia mafai ona faamanuiaina tagata uma (tagai MF&F 46:11–12). O le ki o le aveā lea ma se tagata faalagolago ia te oe lava, lea ua ia i tatou le malosiaga e faia ai faapea, ina ia auauna atu i isi pe a mafai ai, ma tuuina atu i isi le faamanuiaga o le auauna mai ia i tatou, pe a manaomia ai.

O le tele o lo tatou faalagolago o i tatou lava ia i tatou—e le gata i le faaletino a o le faaleagaga—o le tele atu foi lena o lo tatou gafatia e aveā ma se sui e faia le galuega mo le lelei. Na faamalamalama mai e Elder Hales faapea: O la tatou sini laualuga lava o le aveā e faapei o le Faaola, ma e faalateleina lena sini e ala i la tatou auaunaga lē manatu faapito i isi. E faateleina pe faaitiitia lo tatou tomā e auauna atu ai e ala i le maualuga o i ai lo tatou faalagolago ia i tatou lava.³


O se Tiutetauave Patino

Ua vaaia e Lui Quispe lona filiga ma le faalagolago i le Alii, i le tino mai o faamanuiaga faaletino o le galuega, o se tikeri mai le iunivesite, ma se aiga malosi. Ua ia mulimuli i le faamalosiaga a Spencer W. Kimball (1895–1985): “E leai se Au Paia o Aso e Gata Ai faamaoni, a o maua le malosi faaletino ma le faalelagona, o le a tuuina atu ma le loto i ai, le avega o le tausiga o ia lava po o lona auāiga i se isi tagata. Afai lava o loo ia mafaia, i lalo o le musumusuga a le Alii ma faatasi ma ana ia lava galuega, o le a ia sapalaia ia lava ma lona aiga i meaai faaleagaga ma faaletino o le olaga.”⁴ ■

FAAMATALAGA

1. Robert D. Hales, “O Se Vaaiga a le Talalelei i le Uelefeā: Faatuatua i Lona Faatinoga,” i le *Mataupu Faavae Autu o le Uelefeā ma le Ola Faalagolago o le Tagata ia te Ia Lava* (2009), 1–2.
2. Boyd K. Packer, “Foiaina o Faafitauli Faalelagona i le Ala a le Alii lava Ia,” *Liahona*, Me 1978, 91–92.
3. Robert D. Hales, “O se Vaaiga a le Talalelei i le Uelefeā,” 2.
4. Spencer W. Kimball, “Auaunaga a le Uelefeā: O le Talalelei i Lona Faatinoga,” *Liahona*, Nov. 1977, 77–78.

O le tele o lo tatou ola faalagolago o i tatou ia i tatou lava—e le gata i le faaleagaga ma le faaletino—o le tele foi lena o lo tatou agavaa e aveā ma se sui e faia le lelei.





Saunia e Elder
Michael John U. Teh
O Le Fitugafulu

M^OLE Mana

O LE AFIOGA A LE ATUA

E le tele nisi gaoioiga e aumaia ia i tatou faamanuiaga sili atu faaleagaga, nai lo le suesueina e le aunoa o tusitusiga paia i aso taitasi.

Ao avea au o se epikopo i le tele o tausaga ua mavae, na tonu ia te au ma o'u fesoasoani matou te asia aiga uma o le uarota ia ta'itasi i le tausaga. I se tasi o ia asiasiga, na matou savavali ai i autafa o se ala nofoaafi ua tuufua, sa faaitualalua ai tamai fale laupapa, e le silia i le ono futu faatafafa (pe tusa o le 2 mita faatafafa). O lea tamai avanoa sa avea ma potu malolo o sea aiga, potu ai, potumoe, ma le umukuka.

O tagata matutua e nonofo i lena nofoaga, ua i ai lava a latou ala e fiafia i ai, ma faiga masani ua faatutuina. O le toatele lava o tamaloloa e le faigaluega, pe le lava foi se tupe e maua mai le galuega. Latou te faaaluina le tele o lo latou taimi e faapotopoto ai i se laulau fesiita'i, ma ulaula ma fefaasoa'i fagu pia. E faapotopoto foi fafine, ma taulai atu a latou talanoaga i tala sili ona malie o le aso, faaopopo atu i ai ma le taumuimui ma le faitatala. O le pele tupe, o se mea foi e fiafia le tupulaga ma le aumatutua e faapasi ai le taimi.

O le mea na sili ona ou faalefiafia ai, o tagata ua foliga mai ua fiafia lava e ola i o latou olaga atoa i lea ituaiga faiga. Mulimuli ane, na ou faapea ifo i lo'u mafaufau, mo le toatele o i latou, o le leai o se faamoemoe ua mafua ai ona latou talitonu o lo latou lava lea taunuuga. Sa matuā avea lava ma se vaaiga sili ona faamomoloto.

Mulimuli ane, na ou iloa ai o lo'u fesoasoani, o lē o se inisinia, sa masani ona nofo i le eria lena. Sa le mafai ona ou mateiaina lena tulaga, aua o lona aiga sa matua'i ese mai aiga na ou vaaia iina.

O le tamā o lo'u fesoasoani o se alii faatauva. Ina ua uma ona ou feiloai atu ia te ia, na oo mai ai fesili ia te a'u. Na faapefea ona ia siitiaina o ia lava? Na faapefea ona ia toso esea lona aiga mai na ituaiga tulaga? O le a le mea na fesoasoani ia te ia e maua ai se vaaiga mamao o le mea e tatau ona i ai? O fea na ia maua ai le faamoemoe, ae o mea uma lava i ona autafa sa foliga mai ua leai se faamoemoe?





O LE TOE MAUAINA O TUSITUSIGA PAIA

“Ou te talitonu e i ai lava se taimi i o tatou olaga e tatau ai ia i tatou taitoatasi ona iloa tusitusiga paia mo i tatou lava— a e le na o le iloa i se taimi e tasi, a ia toe saga saili pea ia iloa ma saga iloa.”

Peresitene Spencer W. Kimball (1895–1985), Aoaoga a Peresitene o le Ekalesia: Spencer W. Kimball (2006), 62.

I le tele o tausaga mulimuli ane, i le malumu o Manila i Filipaina, na ou auai ai i se faatasiga o peresitene uma o misiona ma o latou faletua, na auauna ai i Filipaina. O se faateia matagofie na faafeiloaia a’u, a o ou ulu atu i se tasi o potu o le malumu. Na tu mai i o’u luma le tamā o lo’u fesoasoani—lena alii filemu, e mategata ona uiga—o laei papa’e.

I lena lava taimi, na ou iloa ai vaaiga e lua. O le vaaiga muamua o se alii o loo inupia faatasi ma ana uo ma faamaimau lona olaga. O le vaaiga lona lua, na faaalai ai lea lava alii o laei papa’e ma faia sauniga i le malumu paia. O le matuā tulaga ese o lena vaaiga mamalu lona lua, o le a tumau pea e faavavau i lo’u loto ma lo’u mafau.

O Le Mana o le Upu

O le a le mea na mafai ai e lenei uso lelei ona siitia o ia lava ma lona aiga? O le tali o loo maua i le mana o le afioga a le Atua.

Ou te talitonu e le tele nisi gaoioga e aumaia ai ia i tatou faamanuiaga faaleagaga sili atu nai lo le suesuega e le aunoa o tusitusiga paia i aso taitasi. I le vaega e 26 o le Mataupu Faavae ma Feagaiga—o loo i ai se faaaliga na tuuina mai “e faamalosi, uunaia, ma aoao ai”¹ le Perofeta o Iosefa Samita ma isi—na fautua mai ai le Alii, ‘Faauta, Ou te fai atu ia te outou, ia outou tuu atu lo outou taimi i le suesue i tusitusiga paia” (fuaiupu 1).

Ua ta’u mai e le Tusi a Mamona ia i tatou, “O le talai atu o le afioga . . . sa i ai sona uiga mamana tele atu i luga o mafau o tagata nai lo le pelu, po o se isi lava mea, ua oo ia te i latou” (Alema 31:5).

O Peresitene Boyd K. Packer, Peresitene o le Korama a Aposetolo e Toasefululua, na aoao mai faapea: “O mataupu autu moni, ua malamalama i ai, e suia ai uiga ma amioga. O le suesue i mataupu o le talalelei e vave ona faalelei ai le amio nai lo le suesue i ala e faalelei ai le amio.”²

Na saunoa Peresitene Ezra Taft Benson (1899–1994): “E galue le Alii mai totonu agai i fafo. O le lalolagi e galue mai fafo agai i totonu.

E mafai e le lalolagi ona aveesea tagata mai faafuna. O Keriso e aveesea faafuna mai totonu o tagata, ona latou aveeseina lea o i latou lava mai faafuna. Atonu e mafai e le lalolagi ona faaliliuina tagata e ala i le suia o lo latou siosiomaga. E suia e Keriso tagata, ona suia ai lea e i latou lo latou siosiomaga. Atonu e mafai e le lalolagi ona suia amioga a tagata, ae e mafai e Keriso ona suia le natura o le tagata.”³

I le ola a’e ai i Filipaina, na ou aoao ai, e o’o mai lava i le amataga o le 1900, o le mafai ona maua o le Tusi Paia, sa na o le aufailotu na i ai lea tulaga. Sa le’i faatagaina tagata e mauaina pe umia se tusitusiga paia.

I le faatusatusa atu i ai, ua tatou ola i se vaitaimi o le mafai ona maua o tusitusiga paia sa lei tupu lava muamua. E lei tupu lava i le talafaasolopito o le lalolagi, le mauaina e le fanau a le Atua o le avanoa e fiafia ai i nei mea paia, e pei ona latou faia i le taimi nei. O kopi tusitusiga o tusitusiga paia ua mafai nei ona faatautaina i faletusi, pe o luga i le initoneti. O kopi faaeletonika, ua mafai nei ona mauaina vave e ala i le Upega Tafailagi ma sefeina i le tele o masini faaneionapo. O le sauniaina o lauga, tusia o tusiga, ma le sailia o faamatalaga, sa lei faigofie lava muamua.

Ua tuuina mai e le Atua ia i tatou lenei tekinolosi fou mo se faamoemoega potu. O Satani, i se isi itu, ua siitia i luga lana osofaiga ma le faaogaaga o faiga faatekinolosi—na fuafuaina e le Atua e fesoasoani ia i tatou—ina ia faateleina ai lona faamoemoega o le faia o i tatou “ia pagatia e pei o ia lava” (2 Nifae 2:27).

O le mea lea, ua ia i tatou se tiutetauave ina ia aoao e faaoga mea ua tuuina mai e lo tatou Tama Faalelagi, i se faiga lelei, faia e le aunoa, ma tatau ai.

O Le Paia o le Upu

O i tatou o le Au Paia o Aso e Gata Ai, ua tatou taliaina ma faatautaina tusitusiga paia, ae o a tatou gaoioga ma le manatu popole mo ia mea, ua ese i nisi o taimi. O le leai o se malamalamaaga o le faatautaina ma le taua o

tusitusiga paia, o loo faamatalaina manino i le miti a Liae:

“Ma sa ou vaai i motu o tagata e lē masino, o le toatele o i latou sa fetaomi mai i luma, ina ia latou maua le ala e tau mai i le laau lea sa ou tu ai i ona tafatafa.

“Ma sa oo ina latou o mai i luma ma amata ona savavali i le ala e tau mai i le laau.

“Ma sa oo ina alu a’e se puao o le pogisa; ioe, o se puao tele lava o le pogisa, sa oo ina lē iloa ai e i latou o e na amata ona savavali i le ala, lo latou ala, ma latou fesesea’i ai, ma leiloloa” (1 Nifae 8:21–23).

O le manatu faapea na pau lava le mea tatou te manaomia o le amata i luga o le ala, e aunoa ma le piimau atu i le ai



uamea o se tulaga faavalevalea, ma e mautinoa lava le taitaina atu ai i le faafanoga. Na faamalamalama mai e Nifae le uiga o le uumau i le ai uamea: “O le mea lea, e tatau ai ona outou fetaomi atu i luma ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma. O le mea lea, afai tou te fetaomi atu i luma, *ma taumamafa fiafia i le afioga a Keriso*, ma tumau e oo i le iuga, faauta, ua faapea ona fetalai mai o le Tamā: O le a outou maua le ola e faavavau” (2 Nifae 31:20; ua faaopoopo le faamamafa).

Se i o tatou iloiloaina atili le mea na tupu ia i latou, o e na iloa le taua o le ai uamea, a o latou taumafai e taunuu atu i le laau:

“Ma ai se e faalogo i le afioga a le Atua; ma pipiimau i ai, e lē fano lava i latou; pe mafai foi e faaososoga ma ufana-fana mu a le fili ona faatoilaloina i latou i le faatauasoina, e taitai ese atu ai i latou i le faafanoga” (1 Nifae 15:24).

I le tusi a Alema tatou te faitau ai:

“Ua tuuina mai i le toatele ia latou iloa mealilo a le Atua; e ui i lea ua tuuina i latou i lalo o se poloaiga saolele ia latou lē faaali atu ia mea tau lava e tusa ai ma le vaega o lana afioga na te tuuina mai i le fanauga a tagata, e tusa ma le gauai ma le filiga latou te tuu atu ia te ia.

“Ma o lea, o ia o lē e faamaaa lona loto, o ia lava lea na te maua le vaega itiiti o le afioga; ae o ia o lē e lē faamaaaina lona loto, o ia lea e tuuina mai i ai le vaega tele o le afioga, seia oo ina tuuina mai ia te ia, ia ona iloa mealilo a le Atua, seia oo ina ia iloaina atoatoa.

“Ma o i latou o e e faamaaa o latou loto, e tuu mai ia i latou le vaega itiiti o le afioga, seia oo ina latou iloaina se mea e uiga i ana mealilo; ma ona ave ai lea o i latou faatagataotaua e le tiapolo, ma taitai atu e lona loto i lalo i le faafanoga” (Alema 12:9–11).

Ou te talitonu o le faatalalē i le suesueina o tusitusiga paia, i se tulaga faifai pea, o se ituaiga o le faamaaaina o o tatou loto. Ou te popole afai tatou te tumau ai i lena ala, o le a tuuina mai ia i tatou se vaega itiiti o le upu, ma oo ai ina tatou lē iloaina mealilo a le Atua. O le suesueina i aso taitasi o tusitusiga paia, i se isi itu, o le a fesoasoani ia i tatou e fausia ai le malosiaga faaleagaga ma le malamalama, aveesea le ufimata o taufaasesega a le tiapolo, ma iloa ai mailei ua ia faataatitaina e pu’e ai tatou.

A o outou fesili ifo ia te outou lava i fesili nei, ou te valaulia outou e faataga le Agaga Paia e tautala atu i o outou mafaufau ma loto:

- Pe ou te faaluina ea se taimi e suesue ai tusitusiga paia i aso uma?
- Afai e leai, o le a la’u faanoi mo le lē faia o lea tulaga?
- Pe o le a taliaina ea e le Alii la’u faanoi?

Ou te lu’iina outou ina ia tuutō atu i le faitauina o tusitusiga paia i aso taitasi. Aua ne’i outou momoe nanei, seia outou faitauina. A o outou faitau, o le a o’o mai ia te outou se manaoga sili atu e faia le finagalo o le Alii, ma faia suiga i o outou olaga. ■

Mai se lauga na tuuina atu i se faigalotu i le Iunivesite a Polika Iaga-Hawaii ia Mati 22, 2011. Mo le lauga atoa i le gagana faa-Peretania, alu i le devotional.byuh.edu/archive.

FAAMATALAGA

1. Mataupu Faavae ma Feagaiga 24, faatomuaga o le mataupu.
2. Boyd K. Packer, “Aua le Atuatuva,” *Liahona*, Me 2004, 79.
3. Ezra Taft Benson, “Fano i la le Atua,” *Liahona*, Oke. 1985, 6.



O Faamanuiaga o le
Sefuluai

Ua poloaia i tatou e le Alii ina ia totogi sefuluai. I le faia o lea mea, ua Ia folafola mai e “toina mai . . . pupuni o le lagi, ma sasaa . . . mai le manuia, seia silisili ona tele” Malaki 3:10 O Ana faamanuiaga, e ui i lea, e oo mai i Lana lava ala ma i Lana lava taimi, ma e mafai ona faaleagaga pe faaletino.

I taimi o le faigata o le tamaoiga po o le aiga, na foliga mai ai ua fai lava sina mamao o faamanuiaga na folafola mai e le Alii ia i latou o e totogi ma le faamaoni le sefuluai. Peitai, e pei ona matauina e tagata nei o le Au Paia o Aso e Gata Ai, o le totogiina o le sefuluai e fesoasoani ai i tagata o le Ekalesia e iloa lelei ai le aao o le Alii i o latou olaga.

O le totoigiina o le sefuluai e aumaia ai faamanuiaga silisili, aemaise le fesoasoani ai ia i tatou e iloa lelei le aao o le Alii i o tatou olaga.

O Le Sefuluai e Faateleina ai le Faatuatua

E lei leva ona ma faaipoipo, ae o ma siitia atu ma lo'u toalua i se aai mamao ese i Bolivia sasa'e, lea na o i maua ai lava tagata o le Ekalesia. O lo'u toalua o se tagata fou liliu mai, ma sa ma mananao e usitaia poloaiga uma a le Alii.

I masina taitasi, ma te teuina ai la ma sefuluai i totonu o se teutusi seia mafai ona ma tuuina atu i lo maua epikopo. Sa i ai i lo'u toalua se naunautaiga malosi faapea, afai ma te ola e tusa ma lenei tulafono, o le a mafai ona faamanuiaina ma pui puia i maua.

Sa ma nonofo i se potu o se faletalimalo vevela, taugata, ma le lelei, a o vaavaai mo se fale e mautotogi ai. Mo le tele o aso, na mautinoa ai o la ma sailiga ua le faamanuiaina. Na pau le fale na mafai ona maua mauaina, o se tamai fale, o le ana ia e nofo i se isi aai. E toatele tagata mai fafo na taumafai e mautotogi i le fale, ae sa le mafai lava ona latou maua le tagata e ana ia.

I se tasi taeao, ina ua faatoa uma ona ma tatalo e uiga i lo maua tulaga, na tuitui mai ai se alii talavou i le faitotoa. Na ia ta'u maia ia i maua faapea o le pule o le fale o loo asiasi mai mo se taimi puupuu. Na faanatinati atu lo'u toalua e feiloai ia te ia, a o faaauau ona ou tatalo ina ia ma mauaina le fale. Ina ua ia foi mai, na ia lipotia mai faapea ua ofo mai e le tamaitai le fale ia i maua, i se tau pa'u lava. O le isi mea na sili ai lo ma olioli, o le tulaga ua uma ona faatotogaina le fale. I lena taimi, na pau lava mea na ia i maua, o pusa lapopo'a e lua ma se atopa'u e tumu i a ma meatotino.

O le tulafono o le sefuluai e le na o tupe e aofia ai, ae o le faatuatua. Sa le tele se tupe na mauaina e lo'u toalua, ae a o ma totoigiina ma le faatuatua a ma sefuluai, na faamanuiaina e le Alii i maua ina ia maua se fale lelei e nonofo ai, ma mafai e i maua ona maua mea mo i maua lava.

Lourdes Soliz de Duran, Bolivia

E Aumai e le Sefuluai le Filemu

Sa ou faatuatua i le Alii ma Ana poloaiga i taimi uma lava. Ina ua faateleina le leaga o le tamaoiga, peitai ane, na le toe maua o'u itula ova ma pa'u lo'u totoigi. Na ou le toe totoigiina le sefuluai ma ou faapea ifo ia te au o le a malamalama le Alii. Ae ui lea, na faateleina a'u aitalafu ma faaitiitia siaki o lo'u totoigi.

I le vaaia ai o a'u tauiviga, e toatele ou auaiga na fai mai ia te au, e tatau ona ou totoigia au sefuluai aua o le a fesoasoani ai ia te au e faatoilaloina ai ou faigata. Peitai, e iu ane lava ua totoigi ai a'u pili. Na ou naunau e totoigi au sefuluai pe a solo lelei tulaga tautupe, ae sa ou popole pe a faaletonu tulaga tautupe (tagai i le Mataio 14:28–31).



I le agai ai i le fale mai le galuega i se tasi o aoauli, i le mae'a ai o le totoigi, na ou manatunatu i a'u aitalafu uma. Na ou moeiini ma tatalo, "Tamā, o le a le mea e tatau ona ou faia?" I lena lava taimi, na ou pupula a'e ma vaaia i luga o le faaalo o le pasi, ia Peteru o magoto ifo i se sami sou-sou faatasi ma le Faaola o aapa atu e laveai ia te ia. I le pito i lalo o le ata sa i ai upu ia "Faatuatua le Maluelue." Na ou iloa ai e manaomia le totoigi o la'u sefuluai, pe afai ou te manao moni e totoigi uma au aitalafu.

MO MATUA

I le tala “Na o le Tasi Lava le Tupe Siliva” (*Liahona*, Aok. 2011, 70–71), ua aoao ai e Tanielu faapea o le totogiina o le sefuluai o se filifiliga lelei—e tusa lava pe afai o lana saofaga na o le tasi le tupe siliva. O se gaoioiga faaopoopo ua faamalamalama mai ai nisi o auala ua faaogaina ai tupe o le sefuluai. O le faitauina e se aiga o lenei tusiga o le a avea ma se auala sili e amata ai se talanoaga e uiga i le sefuluai. Ina ia fesoasoani i lau fanau e manatua le auala e faaoga ai e le Ekalesia le sefuluai, mafaufau e faaoga nisi o ata o loo i lenei gaoioiga e teuteu ai la latou fagu po o le atigipusa o le sefuluai.

Lomiga talu ai nei o le *Liahona* e mafai ona maua i luga i le liahona.lds.org.

Ina ua ou taunuu i le fale, na ou mauaina se teutusi sefuluai ma tuu ai i totonu la’u sefuluai. A o ou faamauiina le teutusi, na ou faalogoina upu ia “Ua lelei mea uma” ma lagonaina le olioli na aumaia le filemu i lo’u agaga.

Ou te iloa o le a aumaia e le Atua Ana faamanuiaga i lo’u olaga, pe a Ia silasila mai ua tata ai. Seia o’o mai lenei taimi, atonu o le a sousou pea le vasa, ae o le filemu ua ou lagonaina mo le usiusitai ua sili atu lenei.

Ricardo Reyes Villalta, El Salvador

E Aumaia e le Sefuluai le Liaina

O le mataupu o le totogiina o le sefuluai na tupu a’e i lo matou aiga, ina ua auai lo ma afafine i le Ekalesia. I lenei taimi, sa leai se tasi o i maua ma lo’u toalua na auai i le Ekalesia. Sa mauaina ana lava tupe, ae talu ai sa matou nonofo faatasi ma lo’u toalua, na matou fefaasoa’i ai a matou tupe maua. Na faigata ia te a’u ona malamalama pe faapefea ona matou ola e aunoa ma le 10 pasene o lona totogi, lea na tonu ia te ia e totogi ai lana sefuluai, ae na amata lava ona ou masani i le faaiuga a la’u tama teine. O le taimi lava e sau ai ma lana siaki, o la’u fesili muamua lava o le, “Ua tuuese lau sefuluai?”

Sa o’o lava ina amata ona ou fiafia i le aoaoina e uiga i le talalelei, ae sa ou filifili ou te le auai i le Ekalesia, aua o

lona uiga o le a ou totogiina ai le sefuluai. O le lua o sefuluai e totogi mai le paketi e tasi a le aiga, o se mea ua telē tele!

I le mavae ai o le auai i le Ekalesia mo le silia i le tausaga, na amata ona ou lagonaina le lē faamalieina ma le lē fiafia. A o o’u mafaufau loloto ma tatalo, na ou iloa ai sa ou manao e totogi le sefuluai. Sa faateia a’u i lenei manao, a o lea sa ou tetee i ai muamua.

O le Aso Sa na sosoo ai, na ou fesili ai i le peresitene o le paranesi mo se lisiti o le sefuluai. Na ou le fiafia i le faalogo atu faapea se’i vagana ua avea a’u ma se tagata auai o le Ekalesia, e lē mafai ona totogia sa’u sefuluai. Peitai ane, e mafai ona ou tuuina atu se foai. Ma o le mea lea, na ou foaiina ai le 10 pasene o lo’u totogi i le Ekalesia a le Alii. Na vave ona ou lagonaina le mafanafana, olioli, ma le faamalieina. Na faigata ona ou faatali mo le aso o lo’u papatisoga, ina ia mafai ai ona ou totogia se sefuluai moni.

Ou te iloa o faamanuiaga faaletino tatou te fiafia ai i o tatou aiga, e o’o mai e ala i le totogiina o le sefuluai. Ae, o faamanuiaga silisili lava, o lagona lē mafaatusalia tatou te mauaina, pe a tatou usiusitai i lo tatou Tama Faalelagi: lotomalie ona o le usiusitai, mautinoa o le a le tuulafoaiina i tatou e lo tatou Tama Faalelagi, ma lagona o le filemu ma le fiafia.

Oleka Nikolaina Kiripo, lukureine

E Faamanuiaina Aiga e le Sefuluai

Na ou ola a’e i le Ekalesia, ae na ou se ese i le taimi o lo’u talavou. Ina ua ou toe foi mai i le Ekalesia, o lo’u toalua, o Dale, na lagolagoina au, peitai sa le fia manao e feiloai i faifeautalai.

Ina ua ou toe toaga mai i le lotu, na ma feiloai ma le epikopo mo se faatalanoaga o le pepa faataga o le malumalu. Na ia fesili mai pe o a’u o se tagata e totogi atoa le sefuluai, ma sa ou fiafia e faailoa atu o lea lava. Na faateia a’u ina ua fesili mai le epikopo, “O silafia e lou toalua o loo e totogia le sefuluai? Na ou te’i—aisea e taua ai lea tulaga? Na fai mai ma le agalelei le epikopo ou te toe sau, pe a uma ona ou ta’uina ia Dale o loo totogi la’u sefuluai.

I se tasi taeao o le Aso Sa, na faapea ai ona ou mauaina le lototele e ta’u ai i lo’u toalua o loo ou totogiina le

sefuluai. Na faateia au e Dale e ala i lona faapea mai, “Ua ou iloa.” O le tasi lenei o mau vavega o le sefuluai.

I se taimi puupuu mulimuli ane, na tuuina mai ai e Dale mea tautupe a le aiga ia te a’u. Ina ua ou faamalamalama atu faapea, o le a ou totogia se sefuluai atoa i a matou tupe maua uma, na ia lagolagoina aua sa ia vaaia faamanuiaga e mafai e le sefuluai ona aumaia.

O le taimi nei, o a matou kapoti ua tutumu i taimi uma, matou te faia a matou tatalo faaleaiga i aso uma, matou te fafagaina faifeautalai faatasi i le masina, ma o lo’u toalua e auai o ia i afiafi faaleaiga. Ou te talitonu o le a i ai se aso e auai ai Dale i le Ekalesia, ma o lona liua na amata i la matou faaiuga e totogi faatasi se sefuluai.

Sandie Graham, Niu Ioka, ISA

E Tatalaina e le Sefuluai Pupuni o le Lagi

I le tele o tausaga talu ai, na te’a ai lo’u toalua mai lana galuega. Na matou tauivi e totogi a matou pili ma faatau meaai i sina tamai tupe o le penisiona na ou mauaina, ae sa mafai lava ona matou ola.



TALIINA O FESILI

O Faapefea Ona Faaaogaina le Sefuluai?

O le mataupu faavae o le sefuluai—o le tuuina atu ma le lotomalie o le tasi-vaesefulu o la tatou tupe maua i le galuega a le Atua—na aoaoina mai talu lava taimi o le Feagaiga Tuai Kenese 14:17–21). O le auala lenei e faatupe ai e le Alii Lana Ekalesia. O aso nei, o tupe o le sefuluai ua faaaogaina mo le (1) fausiaina o malumalu, falelotu, ma isi fale o le Ekalesia; (2) tuuina atu ai tupe e faagaioi ai le Ekalesia; (3) faatupeina o le polokalama a faifeautalai (o lenei mea e le aofia ai tupe faaalu a le faifeautalai lava ia); (4) o le sauniaina o tusi lesona e faaoga i vasega ma faalapotopotoga a le Ekalesia; ma le (5) faatinoina o isi galuega taua, e pei o galuega faalemalumalu ma talafaasolopito o aiga.

E ui sa lagolagoina lo’u tuuto atu i le Ekalesia, na le fiafia lo’u toalua i lo’u totogia o le sefuluai, a o faigata ona tautotogi a matou pili. Peitai ane, na ou lagonaina faapea, e tatau ona ou usitaia pea lenei poloaiga.

E ui sa itiiti se tupe na matou mauaina, ae sa i ai si a matou tamai togalaau. Pe a oo i le tautotogo, matou te totoina karoti, pateta, pi, tamato, pepa mumu, ma vaofali, e ese ai mai isi fualaa faisua. Sa lauolaola la matou togalaau i le taumafanafana, ma sa tele fualaa na seleseleina. O a matou laau fua suamalie na toetoe lava gau mai lala ona o le fua taufuifui. Na ou faaaluina se taumafanafana pisi tele, i le tuufaguina ma le faafulisaina o fualaa aina ma laau faisua, faia siamu, taoina pai, ma tufatufa atu fua o faatoaga faasili i o matou tuaoi.

I se tasi aso, a o ou savalivali solo i le matou tamai togalaau, na ou manatuaina ai le folafolaga a le Atua e tatalaina pupuni o le lagi ma “sasaa atu le manuia mo outou, ina seia silisili ona tele” (Malaki 3:10).

I le manatunatu ai i la’u pusaaia ua faatumulia i fualaa, na ou iloa ai na faamanuiaina moni lava matou e le Tama Faalelagi. O la matou tamai togalaau na maua ai meaai e lava mo i matou i taimi o le manaomia ai—ua lava ma toetoe. Ou te matuā faafetai ua faamanuiaina e le Atua i matou a o matou usitaia Ana poloaiga. ■

Jacqueline Kirbyson, Egelani

O LE FAUSIAINA O TU MA AGA O LE ESETA E Totonugalemu ia Keriso

I le taimi o le Eseta, tatou te faamanatuina ai le meaalofa a lo tatou Faaola: o le Togiola.

Saunia e Diane L. Mangum

Le Aso Sa o le Eseta i le tele o tausaga talu ai, na sau ai la'u tama tama e fa tausaga o Peni, i le alasavali o lo matou falelotu, ina ua uma le Peraimeri, ma talo-talo mai ma le fiafia le pepa na ia valivaliina. Na ia valaau mai, ma le fiafia tele, "Tina, Tina, na e faalogo e uiga i le Toetu?" Na ia manao e faamautinoa ua ou faalogo i le tala fiafia. O se mea na saunoa ai lona faiaoga o le Peraimeri, na aafia ai Peni, lea na matua olioli ai ma amata ona malamalama i le Toetu. E maeu le manaia, pe a mafai e i tatou uma ona lagonaina lena olioli i Eseta taitasi!

O le Togiola a Iesu Keriso, e aofia ai ma le Toetu, o le faavae lea o le Eseta. O le fausiaina o tu ma aga masani e totonugalemu ia Keriso, o le a fesoasoani ia i tatou e taulai atu ai i nei meaalofa a lo tatou Faaola.

O Tapuaiga i le Aso Sa ma Tu ma Aga Masani

E aunoa ma ni faigaai faaopoopo, o solo uumi i luga o ala, po o faafiafiaga, o i tatou o le Au Paia o Aso e Gata Ai, e tapuai faatasi i le Eseta e pei lava ona tatou faia i Aso Sa uma. O o tatou taitai faale-uarota ma paranesi, e fuafuaina failauga ma pese vailauga ia e taulai atu ia Iesu Keriso. E faatatau i le Aso Sa o le Eseta, na saunoa ai Elder L. Tom Perry o le Korama a Aposetolo e Toasefululua: "E lei faaalua manino mai e le Alii faiga masani faalelotu e pei o faigaai ma faafiafiaga e faamanatu mai ai ia i tatou faamanuiaga tatou te maua mai ia te Ia i aso nei. Ae ui i lea, o le faiga o tu ma aga masani ina ia faalatalata atili ai i tatou i le talatuu sili lea ua avea ma mea tatou te olioli ai, e tatau



ona avea o se mea mo aiga uma e taumafai e faatumauiina” (“Tu ma Aga Masani Faale Aiga,” *Liahona*, Me 1990, 20).

O tu ma aga masani eseese nei mai aiga, a o latou faailo-gaina le Eseta ma aumaia faatasi e pele ia i latou.

Fefaasoa’i o Molimau i le Toetu o Keriso

- Na amataina e Janice ma Kirk Nielson se “Po mo Matua o Matua” faapitoa, lea ua avea ma se aga masani i le Eseta, Na saunoa Tuafafine Nielson, “Ou te talitonu o le mea aupito sili ona lelei tatou te faia, i le avea ai ma matua o matua, o le o lea i fale o a tatou fanau ma nonofo i lalo faatasi ma fanau a fanau, ma faailoa atu ia i latou e i ai ni a tatou molimau e uiga i le Faaola.”
- A o laiti la laua fanau, sa faaavanoaina ai e Hector ma Sherilyn Alba, se taimi i afiafi taitasi i le vaiaso atoa a o le’i oo i le Eseta, mo se lesona puupuu i mea na tutupu i le vaiaso mulimuli o le soifuaga o le Faaola.
- O nisi aiga latou te asiasi atu i tuugamau o e pele ia i latou. Latou te talanoa ma a latou fanau e uiga i tagata o aiga ua maliliu, ma faaalii le agaga faafetai mo le Toetu o Iesu Keriso.

Ua avea le fuamoa ma se faailoga taatele o le Eseta, e faatusa i le Faaola ma le tatalaina o noataga o le oti e ala i Lana Togiola. O le mea lea, o le valiina ma le nanaina o fuamoa mo se sailiga fuamoa o le Eseta, ma le tuuina atu o ato o le Eseta, o aga masani taatele ia i le lalolagi atoa.

- I Rusia, e masani ona faafeiloaia e le tasi tagata le isi i le aso o le Eseta e ala i le faapea atu, “Ua toetu Iesu.” Ona tali mai lea o le isi tagata, “E moni, Ua toetu o Ia.” I Alepania, e taitutusa lava lea aga, latou te faafeto’iaia faatasi maa, pei o ni fuamoa lanumumu ma faapea, “Ua toetu Keriso.”
- E faatauaina e Karen Spencer ia mea na te manatuaina e uiga i lona tinamatua Tanisi e faia i taimi o le faamanatuina o le Eseta, ma fiafia pea lava e vali fuamoa faatasi ma pa’u aniani lanuviole ua uma ona sakaina, e pei lava ona sa faia ai e lona tinamatua. Ua iloa e lona aiga o se taimi lelei lea e talanoa ai e uiga i le fuamoa, o se faailoga o le ola fou ma le Toetu.

- O nisi aiga e i ai fanau laiti latou te fiafia e faia le sailiga fuamoa faatasi ma se savali. Latou te tuuina i totonu o se fuamoa se mea e avea ma faailoga, e fesootai ma le maliu ma le toetu o le Faaola ma se mau e faitauina. Ona latou faanumeraina lea o fuamoa i le faasologa o le tala o le Eseta. A o tatalaina e tamaiti fuamoa, o le a latou aoaoina le Togiola ma le Toetu o Keriso.

Fefaasoa’i o Musika o le Eseta

E mafai e Musika ona aumaia se aafiaga sili ona manaia i o tatou luga i le Eseta

- E fiafia Tavita ma Joyce Beer e sailia konaseti faatatau i le Eseta, ina ia fesoasoani ia i laua e manatua ai le taulaga a le Faaola.
- O Tavita ma Nancy Harmon e fiafia e faalogologo i le pese a George Frideric Handel o le *Mesias*, lea e manatu Tuafafine Harmon “e sili atu ona faatatau i le Eseta nai lo le Kerisimasi.”
- O se tasi tina e uunaia lana fanau, o loo i ai i vasega musika, e aoao e tātā se pese o le Eseta i lena masina.
- O le aiga o Dale ma Sara Okerlund e faapotopoto i autafa o le piano, ma usuina viiga ma pese a le Perai-meri e uiga i le Eseta.

Aai Faatasi i se Toonai o le Eseta

O se toonai faaleaiga o se tasi lea tu ma aga masani taua tele o le Eseta i le lalolagi atoa.

- O se tasi aiga e ‘ai le latou puaa faaasu ma talatalanoa e uiga i le auala na faataunuu ai e Keriso le Tulafono a Mose. O se isi aiga e ‘ai se i’a e manatua ai mea na taumafa e Iesu. O le aiga o Elisa ma Mikaele Pereira, e fai se latou toonai e aofia ai le mamoe, ma talatalanoa e uiga i le faatusa o le mamoe i le tala o le Paseka.
- A mae’a le toonai a le matou aiga o le Eseta, matou te pu’eina se ata o tagata uma o le aiga ma isi uo pele, o e na matou aai faatasi. E i ai sa matou tusiata faapitoa o le Eseta, lea ua aofia ai le silia i le 30 tausaga o mea e faamanatu ai se aiga fiafia.
- O se tasi ulugalii, o la laua fanau ua matutua, la te valaaulia isi uo matutua i se toonai faapitoa. O iina latou te fefaasoa’i ai mea e manatua ai ma toe tomanatu ai i le uiga o le Eseta.

- I nisi atunuu, o le aso malolo o le Eseta, e aofia ai le Aso Faraile ma le Aso Gafua. I Tahiti, o auai e masani ona faia se pikiniki faatasi i isi motu. I Amerika Tutotonu, o nisi Au Paia o Aso e Gata Ai, latou te faaaogaina le taimi faaopoopo e asiasi ai i o latou aiga, faia se taumafataga, ona o ai lea i le malumalu.

Faasoa atu Tu ma Aga Masani e Lē Faalelotu i se isi Aso

O aiga o le Au Paia o Aso e Gata Ai e masani ona faia isi gaoioiga e lē faalelotu, ia e aofia ai le Eseta i se aso e ese mai le Aso Sa.

- I Pasila, i le Aso Faraile po o le Aso Toonai, a o le'i oo i le Eseta, o se tinamatua o le Au Paia o Aso e Gata Ai, na te tuuina se tasi po o le lua karoti ua aina i se nofoaga e faigofie ona iloa atu, ma nana fuamoa o le Eseta i autafa o karoti.
- I le Aso Gafua pe a mavae le Eseta, e fiafia ai le aiga o Joyce ma Scott Hendricks e aai i fafo o le fale, ma fai ai ma se suega fuamoa faapitoa o le Eseta.

Ia Mafafau ia Keriso i Taimi Uma i le Eseta

Aoao e uiga ia Iesu Keriso i taimi o le afiafi faaleaiga, faalogologo i musika o le Eseta, po o le fiafia i se taumafataga faapitoa e mafai ona aumai ai se siitiaga faaleagaga i tagata o soo se matua. O gaoioiga e faamanatu ai, e le tau manaomia le auai ai o se vaega toatele. O se aga masani o se faamanatuga o le Eseta i totonu o se aiga se tasi, po o se loto, e tutusa lava lona taua.

E mafai foi e i tatou ona manatuaina ma faamanatuina le olioli i le Eseta, e pei lava o Peni laititi, o le na sau i le falefaafiafia o le falelotu, ma le manao e faasoa mai le tala fiafia e uiga i le Toetu. ■

Diane L. Mangum e nofo i Iuta, ISA.





I le mulimuli ai i le fautuaga i totonu “O Le Aiga: O se Folafolaga i le Lalolagi” e mafai ona faamalolosia ma puipuia ai o tatou aiga.

O LE TAU A O LE AIGA

O le aiga ua osofaia i le lalolagi o aso nei. O le mafuaaga lena ua matua taua ai, nai lo soo se isi lava taimi, le mauaina e fanau ma talavou o se molimau i le taua o le aiga i le fuafuaga a le Tama Faalelagi (tagai i le *Mo Le Malosi o le Autalavou* [2011], 14). I le itulau e 52 o lenei lomiga, o Ann M. Dibb, fesoasoani lua i le au peresitene aoao o Tamaitai Talavou, ua fautuaina mai auala e fesoasoani ai i talavou ia maua ni molimau e uiga i aiga.

Mo se faataitaiga, ua ia tusia, “A o outou faitauina le folafolaga i le [aiga], ia vaavaai mo mataupu autu, fautuaga, lapataiga, ma faamanuiaga folafolaina, ma o latou uiga ia te outou.”

Fautuaga mo le Aoao Atu o le Autalavou

- Faitau le “O Le Aiga: O se Folafolaga i le Lalolagi” ma le vaega e uiga i le aiga i totonu o le *Mo Le Malosi o le Autalavou*. Tala-talanoa e uiga i le auala e faata- tau ai nei taiala i lou lava aiga. Mafaufau e faasoa atu lau moli- mau e uiga i le taua o le aiga.
- Mafaufau i le faia o se afiafi faaleaiga e faata- tau i le taua o le aiga (o se punaoa lelei o le autu lea o “Faaiipoipoga ma Aiga” i le mataupu aoaoina fou a le autala- vou i le lds.org/youth/learn).
- Asiasi ane i le youth.lds.org. Fili- fili le “Mo Le Malosi o le Autala- vou” ona sosoo lea ma le “Aiga”

ina ia saili ai punaoa e fesoasoani ia te oe, e malamalama atili ai i le mataupu o le aiga: mau, ata vitio (tagai, mo se faataitaiga, “O Tama ma Atalii”), Alaleo o le Mamona i polokalama i le leitio, o fesili ma tali, ma tusiga, e aofia ai lauga a le Au Pulega Aoao.

Fautuaga mo le Aoao Atu o Tamaiti

O nisi nei o faataitaiga o auala atonu e mafai ona e mataituina ai le agaigai i luma o lou aiga i sini faaleagaga:

- Aumai se tamai fagu malamalama. Faatasi ai ma lau fanau, faatu se sini e mafai ona ausia, lea o le a faamallosia ai lou aiga, e pei o le faia o afiafi faaleaiga i Aso Gafua taitasi, po o le faitauina o se aiga o tusitusiga paia i aso taitasi. Fai atu i tamaiti e faia se pepa e faaigoa ai le fagu, faatasi ai ma le sini ua tusia ai i luga. O taimi uma lava e faama- e’aina ai e lo outou aiga le gaoi- oiga, ia tuu se tamai meafaitino, e pei o se mapu po o se isi mea i totonu o le fagu. A tumu loa le fagu, ona fuafua lea e sami e ala i le faia o se meaa faapitoa, po o se gaoioiga a le aiga.
- Fai i tamaiti taitasi e tusi se ata o le aiga o loo faia se gaoioiga o aso faisoo e te manao e uunaia, e pei o tatalo faaleaiga po o le suesueina o tusitusiga paia.

Faapipii ia ata i se mea e mafai e tagata uma ona vaai i ai. Amata le aso i le faau i luga o ata. Pe a uma ona faatinoina e lou aiga le gaoioiga o loo tusia i luga o le pepa, liliu le ata. O ata o loo mafai lava ona iloa, o le a faa- manatu atu i lou aiga e uiga i a outou sini ma mea e mafai ona latou faia e faamallosia ai lou aiga i lena aso. Toe faau i luga ata i le amataga o aso taitasi.

Ia fesoasoani foi i lau fanau ia iloa faamanuiaga e o’o mai i lo outou aiga mo le faia o nei gaoi- oiga. O le fesoasoani ai i tamaiti e saili lagona lelei e oo mai e ala i le mauaina o le Agaga i lo outou aiga, o le a faateleina ai lou manao e mulimuli i mamanu o amioga amiotonu ia e faamalo- losia ai aiga. ■

O LE A LENEI EKALLESIA?

I nai tausaga talu ai, na manaomia ai le pasia o la'u taavale mo tulaga faatulagaina o le saogalemu ma le kasa oona. Na ou taunuu i le faletaavale i se tasi aoauli, ma maua ai pe tusa o le valu pe iva taavale sa tutu i le laina.

O se aso o le tautotogo matagofie, o le mea lea na ou filifili ai e tuu i lalo faamalama, tape le afi o le taavale, ma se'i a'e se kopi o le "O Le Aiga: O se Folafolaga i le Lalolagi," lea na ou teuina ma isi tusi a le Ekalesia i totonu o la'u taavale. Na fautuaina talu ai nei e lo'u peresitene o le siteki tagata o le siteki, ina ia tuuto atu i le taulotoina o le folafolaga. O lea taimi paganoa, na ou maua ai se avanoa lelei e faia ai lea tulaga. E le'i pine, ae oo i lo'u taimi e pasi ai la'u taavale.

O se tasi o alii, o le na faia le suesuega na faapea mai o le a ia aveina atu la'u taavale i totonu o le faletaavale.

Ona ia fai mai lea ia te au, ou te faatali i se potu e sosoo ai, seia maea le suesuega. Ua alu lava le taimi, a o ou vaavaai atu i isi tagata o o mai ma o. Ina ua mavae sina taimi, na amata ona ou manatu ifo, masalo e tele se faafitauli o la'u taavale.

Ona sau lea o le inisinia mai le faletaavale i le potu faatalitali, ma faailoa mai ua pasia le suesuega o la'u taavale. Faafetai ua matuu atu se avega! Na ou alu atu ma totogi le kesia, ma savali atu i fafo i le mea na paka ai la'u taavale ma maua ai o ia o faatali mai mo au.

"Tamaitai," na ia fai mai ai, ma vaai toto'a mai ia te au, "e mafai ona ta talanoa mo sina minute?"

"Ua lelei," na ou fai atu ai ia te ia.

"Ou te faamalie atu mo le umi o le suesueina o lau taavale. E te silafia, a o o'u aveina atu lau taavale i totonu o

le faletaavale, na ou vaaia ai se fasi-pepa i luga o le nofoa o le pasese, e talanoa faatatau i aiga. Nai lo le vave faafoiina atu o lau taavale ia te oe, na ou nofo i totonu o le faletaavale ma faitau ai faafia i lona fasi-pepa."

Na ia faaaauu faapea, "O le a lenei ekalesia? O le a lenei pepa e uiga i le aiga? E mafai ona ou mauaina se kopi o lenei pepa? Fai mai na tusia e Aposetolo. O lona uiga ea o loo i ai ni Aposetolo i luga o le fogaeleele i aso nei, e pei lava o le taimi o Iesu? Faamolemole, ou te fia iloaina."

Na toetoe a ou lē magagana, ae na toe aoao mai ou manatu. Na ou ta'u atu ia te ia, o loo i ai moni lava aposetolo *ma* perofeta i luga o le fogaeleele, e pei lava o le taimi o Iesu Keriso. Na ou ta'u atu ia te ia e uiga i le Perofeta o Iosefa Samita ma le Toefuataiga o le talalelei. Ona ou tuuina atu lea ia te ia o tusi uma lava a le Ekalesia na i ai i la'u taavale. Na ia tuuina mai lona igoa ma le numera o lana telefoni, ina ia mafai ona faafesootai atu faifeautalaita ia te ia. Na faaiu la maua talanoaga, i le faailoaina mai o lona agaga faafetai faamaoni.

A o agai ese atu la'u taavale, na faatumulia o'u mata i loimata. Na ou lagonaina le agaga faafetai na ou tuuina se kopi o le "O Le Aiga: O se Folafolaga i le Lalolagi" i luga o le nofoa o le taavale.

Ou te lei faagaloina lava le vaaiga o le naunautai i mata o lona alii. O lenei aafiaga o se lesiona faagalogata e uiga i le mana o le folafolaga i le aiga, o le moni o faaaliga o ona po nei, ma le taua o le faasoa atu o le talalelei i aso uma—ma o nisi taimi o tulaga—e le'i fuafuaina. ■

Angela Fallentine, Niu Sila

"Na ou vaaia se fasi-pepa i luga o le nofoa o le pasese lea na talanoa faatatau i aiga," na fai mai ai le inisinia ia te au. "Na ou nofo i totonu o le faletaavale ma faitau faafia lona fasi-pepa."



NA FAAMUAMUA LA MATOU SEFULUAI

I le taumafanafana o le 2006, sa faigaluega ai lo'u toalua o se aveloli. Talu ai sa toesea o ia mai le aiga mo le tusa ma le lua vaiaso i se taimi e tasi, o le tiutetauave o le tofogiina o pili, sa pa'ū lea i o'u luga. O lana galuega sa lē mautū, ma o la matou tupe maua sa fesuisuia'i mai lea masina i lea masina, o le mea lea, sa le faigofie ai le paketiina o a matou tupe.

I lena Iulai, na laititi atu ai lana siaki, nai lo le tulaga masani, ma ua laititi atu nai lo le mea sa ou fuafua i ai. Ina ua uma ona ou teuina lana siaki, na ou faatusatusaina le aofaiga ua i ai i le faletupe i la matou lisi o tupe faaalua ua tataua ona i ai. Na tonu ia te au, afai ou te tofogia mea uma lava, e aofia ai ma la matou

sefuluai, o le a tusa ma le \$30 e lē atoa ai. O i matou o tagata e tofogi atoa le sefuluai, ina ua aoaoina se lesona e ala i se aafiaga faigata i nai tausaga talu ai, ina ua lē atoa le tofogiina o la matou sefuluai. O le faamisi o le sefuluai i lenei taimi, sa lē o se tasi o tali i lea taimi.

Na ou manatua lo'u faalogo ai i tala o tagata, o e na faamuamua le tusiaina o siaki o a latou sefuluai, a o utiuti le faasoa, ma i'u ina maua tupe e ala i auala faavavega. Sa masani ona ou tusiaina siaki i le faasologa o siaki e tataua ona meliina i lena aso, o le mea lea, o le siaki o le sefuluai sa seāseā ona avea ma siaki ou te tusia muamua. Ae o lena aso, na tonu ai ia te au, e

manaomia lo'u tusia muamua o la matou siaki o le sefuluai, ua iloa o le a fesoasoani mai le Alii i se auala mo i matou e tofogi ai a matou pili.

O le Aso Gafua na sosoo ai, na ou mauaina ai le tala o se vasega faalenuu na ou lesitalaina ai lo'u atalii matua, ua faaleaogaina, ma o le siaki e \$20 na ou tusiaina i le masina talu ai ua toe faafoi mai. Ina ua ou tago e faapaleni la'u tusi siaki, i le toe tuuina ai i totonu o lena \$20, na ou iloa ai e \$23 se sesē o la'u faaopoopoga i le vaiaso na muamua atu. I le faaopoopo atu i ai, i le lua aso mulimuli ane, na matou maua ai se siaki o se tupe toe faafoi mai e \$36 mai le matou foma'i, mo le ova ona tofogi o se pili. O le mea lea, nai lo le \$30 na le atoa ai, sa ia i matou le toetiiti \$50 faaopoopo.

Na faataunuu e le Alii Lana folafolaga o loo i totonu o le Malaki 3:8-12 faapea afai tatou te tofogi a tatou sefuluai, o le a Ia sasaa maia faamanuiaga. Ou te iloa ona o lo matou tali atu e mulimuli i le poloaiga a le Alii ina ia tofogi muamua a tatou sefuluai, lea na faamanuiaina ai matou. ■

Carrie Dalby Cox, Alabama, ISA

Na ou iloina afai ou te tofogia uma a matou tupe faaalua, o le a tusa ma le \$30 e le atoa ai. Ae, o le faamisi o le sefuluai, sa le o se tasi o tali mo lea tulaga.



NOFO AI I CAPE TOWN

Talu mai lava le taimi na ou auauna ai i la'u misiona i le Misiona a Lonetona i Egelani, na ou manao e toe foi atu e nofo ma faigaluega ai iina. I le faatoa maua ai o se faailoga tikeri o le Matuaofaiva, na tonu ai ia te au atonu o le taimi sa'o lea mo au e siitia atu ai i Lonetona. Na ou faamautuina se galuega, ma sa ou lagonaina le fiafia e uiga i le malaga atu.

Peitai, i se tasi po, na ou tatalo ai ina ia iloa le finagalo o le Alii ma, pe ua sa'o mo au le siitia atu i Lonetona. A o ou taumafai ai ou te moe, sa i ai se manatu sa faaauau ona sau i lo'u mafaufau: "E manaomia lou nofo ai i Cape Town." O lenei manatu sa faaauau ona oo mai mo le tele o itula. O le mea lea, na tonu ai ia te au, e finagalo le Atua mo au ia ou nofo i Cape Town. O le mea lea, e ui lava sa ou manao ou te siitia atu, na ou filifili e nofo ai. I le taimi lava lena, na mafai ai loa ona ou moe.

O le aso na sosoo ai, na amata ona ou fetuutuunaia le mea na tupu i le po na mavae atu ma faaauau ona ou tuufesili, pe tatau lava ona ou alu i Lonetona, i le faaiuga. Peitai, o lena po, o le aafiaga mai le po na mavae, sa faapea ona toe tupu foi. O le manatu "E manaomia lou nofo ai i Cape Town" na faaauau ona sau i lo'u mafaufau i taimi uma. A o ou mafau-fau loloto i nei manatu, na amata ona faamalieina au faapea e finagalo moni lava le Alii mo au ou te nofo ai i Cape Town, ma sa ou manao e faia le mea e finagalo ai le Alii ou te faia.

O le vaiaso na sosoo ai, na valaau mai ai lo'u peresitene o le siteki ina ia ma feiloai. Na vave ona ou iloina faapea, sa i ai se valaauga na finagalo le Alii mo au e faataunuaina. Na molimau mai le Agaga faapea o le

mafuaaga na manaomia ai lo'u nofo ai i Cape Town, ona sa i ai se galuega e finagalo le Alii mo au e fai.

Na ou taliaina le valaauga o le avea ai ma peresitene o Tamaitai Talavou a le siteki, ma a o auauna ai mo nai tausaga na sosoo ai, sa mafai ona avea au ma meafaigaluega i aao o le Alii. I le avea ai o se taunuuga, o lo'u olaga ma olaga o tagata na ou auauna i ai, na faamanuiaina tele. Na ou tuputupu a'e i tulaga faataitai, ma, na aoaoina e le Alii au i le tele o mea

e ala i la'u auaunaga mo isi.

Talu mai lena taimi, na mafai ai ona ou atiina ae le faalagolago sili atu i le Alii. E maeu lo'u faafetaia o uunaiga filemu a le Agaga, lea na taitaiina au ia iloa ma faia ai Lona finagalo. E ala i le faaitiitia o le masalosalo, ae naunau e mulimuli i le musumusuga ua ou maua, ua taitaia au e mauaina le olioli ma le filemu sili, i le iloa ai faapea o loo faamalieina lo'u Tama Faalelagi i lo'u olaga. ■

Nicky Burgoyne Smith, luta, ISA

I se tasi o po, na ou tatalo ai ina ia iloa le finagalo o le Alii, ma pe ua sa'o mo au le siitia atu i Lonetona.



AISEA E TE TOTOGIINA AI PEA LE SEFULUAI?

I nai tausaga talu ai, na faamalolo ai lo'u toalua mai lana galuega. O ona pule i le galuega, i le alolofa ai mo le mea ua tupu, na ofoina atu ia te ia se isi galuega, ae o le a manaomia ai se siitiaga faigata. Ae ui lea, na matou vaai atu i luma i le tele o faamanuiaga, e aofia ai le faaauau ai ona maua o se galuega.

E ui i lea, i le mavae ai o le siitia atu, na matou iloaina ai ua le o toe i ai le galuega. E leai se isi na mafai ona tuuina mai se faamalamalamaga tonu. Na pau le mea sa matou iloaina, ua matou i ai i se nofoaga fou, ma ua leai se galuega, ma ua toeitiiti lava leai se tupe, talu ai sa totogi uma a matou aitalafu a o le'i siitia mai, ma sa faaaluiina a matou teugatupe faaiu i le faataunuaina o le malaga.

Na taumafai lo'u toalua i auala uma e mafai ai e saili se galuega tumau. Ae o le taimi lea, sa ia faia ai nai galuega laiti, a'o ou faia galuega taulima, lea na maua ai sina fesoasoani e tausia ai matou, pe a uma ona totogi a matou sefuluai i le Alii. Sa matou ola fuafua lelei i mea uma, ae sa le faigofie le totogiina o pili o aoga, faatauina o meaai ma lavalava, ma le su'eina o tupe na manaomia e lo'u toalua e alu ai e sue se galuega.

Sa tele ina matou fetagisi, ae sa lē tuua ai le faatuatua faapea o le a faamanuia lava e le Alii i matou. Ma sa matou tuuina atu le faafetai mo faamanuiaga ua uma ona matou maua: o fanau teine ola maloloina ma faatuatua, o se faaiipoipoga maopoopo, ma au-aiga ma tagata o le uarota lagolagosua.

O le toatele o uo e lē o ni tagata o le Ekalesia na fesiligia i matou, "Afai ua outou i ai i sea ituaiga tulaga manaomia, aisea la tou te totogia ai



I le mavae ai ona matou siitia atu, na matou iloaina ai ua le o toe i ai le galuega a lo'u toalua. Sa matou i ai i se nofoaga fou, leai se galuega, ma ua toeitiiti leai se tupe.

pea le sefuluai?" O le tali sa tumau lava: aua ua poloai mai ai le Alii, ma, matou te lē mananao e faoa mea a le Atua (tagai Malaki 3:8–9).

Sa matou iloaina i taimi uma lava faapea, afai matou te ususitai, o le a faamanuia e le Alii i matou—atonu e le o le auala na matou faamoemoe i ai, ae mautinoa lava i le auala ua Ia silafia e sili mo lo matou aiga. Sa matou lē faa-aogaina lava a matou faafitauli tautupe e ave a o se sisi'o e lē auauna ai i le Alii; o le mea moni, sa faateleina lo matou naunautaiga e auauna ia te Ia.

I le asō, ua i ai le galuega a lo'u toalua lea ua fesoasoani ia i matou e amata totogi ai a matou aitalafu, ia na faatupulaia a o leai ai sana galuega. O le a umi se taimi e faapea ai, a o le'i mafai ona matou mapu i tulaga tautupe, ae ua matou iloaina afai matou te "aumaia . . . mea uma lava i le fale e tuu ai mea," o le a toina mai e le Atua pupuni o le lagi "ma sasaa [mo i tatou] manuia ina seia silisili ona tele" (Malaki 3:10). ■

Raquel Pedraza de Brosio, Atenitina

O LE Taimi Sa'o

E FAAIPOIPO AI

Saunia e Alissa Strong

Mekasini a le Ekalesia

Sa silafia e Ane ma Peniamina e taua le aoga, ma na mananao uma laua e aoga i se iunivesite.

E faapefea e la laua faaiipoipoga o loo sauniuni i ai, ona fetau ma lenei fuafuaga?

Ao i ai Ane i le aoga maualuga, sa ia tulimata'i atu i le aso e mafai ai ona ia auai i se iunivesite. E tele naua mataupu sa mafai ona ia suesueina ma tele foi galuega sa mafai ona ia filifili mai ai! "Ua ia te au le tele ma tele o mea ou te fiafia i ai, ma e tele foi mea eseese e mafai ona ou faia," na ia fai mai ai.

E ui sa nofo Ane i se tamai nuu i Nouei, sa ia auai atu i se aoga maualuga lelei tele. O lana aoga na uunaia ona tamaiti aoga e galulue malosi mo togi lelei, ma auai i se iunivesite. O le toatele o tamaiti aoga i le aoga a Ane, e amata aoaoga faaiunivesite i le faatoa mae'a ai ona faauu. Mai lava i le laititi, na fuafua ai Ane e faia le mea lava lea e tasi. O le alu i le aoga, e ui lea, sa avea ma se sini e tasi na faatuina e Ane mo ia lava.

"Sa aoaoina lelei au i le polokalama a Tamaitai Talavou e ala i lesona ma le Alualu i Luma o le Tagata Lava Ia," na fai mai ai Ane. "O la'u sini i taimi uma o le faaiipoipo lea i le malumalu."

O Le Fea le "Taimi Sa'o"?

I se tasi o afiafi i le inisitiuti a le lotoifale, na feiloai ai Ane i se faifeautalai faatoa foi mai le misiona e igoa

ia Peniamina. "Mai lava i le taimi na faatoa ou vaai ai ia te ia, na ia faaosofia lo'u fiafia i le tele o itu," na fai mai ai Ane. "Sa matua faigofie ma manaia le talanoa ai ma ia. Sa faigofie ona ma talanoa e uiga i le talalelei."

Sa talosagaina e Peniamina sa laua tafaoga faamasani, ma sa lelei mea uma. I masina na sosoo ai, sa faateleina tafaoga faamasani a Peniamina ma Ane. Sa la taaalo soka ma le volipolo, o i savaliga, ma matamata i ata tifaga. Na faateleina le sili atu ona iloa e le tasi o le isi, ma i'u ai la laua faigauo ina avea o se masaniga mafana.

A o faaauu la laua faigauo, na liliu atu o laua manatu ma fuafuaga i le faaiipoipoga. Na fiafia Ane ma Peniamina, ina ua la maua le tagata na la mananao e faatasi mo le faavavau. Peitai ane, o lenei sootaga na vave ona amata ona faamoimoi, nai lo le mea na faamoe-moeina e i laua uma. Faamata o le a le mea o le a tupu i fuafuaga uma na la faia a o laiti? Faamata e mafai lava ona la saili atu mo se aoaoga? Faamata o le faaiuga e faaiipoipo, o lona uiga o le a tolopo ai isi a laua sini?

O nisi o a laua uo ma aiga na manatu o le tulaga lea o le a i ai.

"O le toatele o tagata i o'u autafa—i le fale, i le aoga, ma le galuega—na matua popole lava i le tulaga o le a aafia ai la'u aoga ona o lenei faigauo," na fai mai ai Ane. "Na i'u ina latou fesiligia pe faamata ua ou iloina o le a tumau lenei mafutaga.

"O uo o la'u tupulaga na manatu o le faaiipoipo o le a taofia ai au mai le auai i le iunivesite," na latou fai mai ai. "Ia i latou, na foliga e pei o le a ou faamaimauina a'u taleni ma avanoa."

O nisi o uo a Peniamina na lagonaina foi lea lava tulaga. "E mananao tagata ia te au ia talitonu ua fai si o maua laiti tele, faapea o lo'u toalua o le a i ai, e tatau ona faamae'a muamua le aoga, ma afai ma te faaiipoipo, o lona uiga o le a i ai fanau, lea foi ua fai si o maua laiti tele mo lea tulaga," na ia fai mai ai.

E ui lava na talitonu Ane ma Peniamina i le faamamafa a le talalelei i le aiga ma le faaiipoipoga, o isi e le i ai i la laua lotu, sa tele lava ina le i ai lenei faataua—aemaise lava mo



autalavou matutua. “O tagata o lo’u nuu e tulaia malosi atu i aoga ma galuega,” na faamanino mai ai e Ane. “E lelei, ae ua leai ai se avanoa mo le aiga—po o le lotu.”

Ua faapea mai Peniamina, “Sa ou manatu lava i taimi uma faapea, o le mea sa’o e fai o le fo’i mai lea i le misiona, saili se tasi ou te fiafia i ai, ona alofa lea i ai, ma i le maea ai ona faia o se faaiuga e faaiipoipo ma maua se faamautinoaga mai le Agaga Paia, faaiipoipo loa. Na foliga faigofie tele lena mea ia te au, ae o lenei ua faafua-sei ona soloatoa, pogisa, ma faigata.”

O Le a Le Tala a le Alii?

Sa popole uma Peniamina ma Ane e uiga i fautuaga ma manatu na tuuina atu e a laua uo. Mo se tausaga atoa, na laua tauivi ai e filifili le taimi sa’o e faaiipoipo ai. Na la iloina faapea, i le faaiuga lava, o le taitaiga sili ona taua, o le a sau lea mai le Alii, o le mea lea na faaalu ai le tele o le taimi e sue-sue ai tusitusiga paia ma saunoaga a perofeta mo lauga e faatatau i le aiga, faaiipoipoga, ma aoaoga.

“O nei punaoa uma e talanoa lava e uiga i le taua o le mea uma e lua, o le faaiipoipoga ma le aoaoga,” ua fai mai ai Ane. A o ia faaauau i lana sailiiliga mo le taitaiga, na i’u ina oo mai se faamaninoga, i se talanoaga ma se taitai o le inisitiuti. “Na ia ta’u mai ia te a’u, ‘Pe a e mauaina le tagata sa’o ma le nofoaga sa’o (o le malumalu), o le taimi sa’o lena!’” na manatua ai e Ane. “O lenei mea na maua moni ai lava le toafilemu i lou mafaufau. Na ou maua le tele o uunaiga mai le Agaga, o faamautuina mai faapea o le ala lea e tatau ona ou uia. Na tonu ia te au o Peniamina ma au o le a faaiipoipoina,

***O Peniamina
ma Ane faatasi
ma la laua
tama teine,
o Olea.***



ma o le mea sa’o lea mo au e faia i lea taimi.”

Na iloa e Ane faapea o le a manao-mia pea lona galue agai i le mauaina o se aoaoga, aua o se tasi foi lena o mea o loo uunaia e perofeta a le Alii. Ae mo le taimi nei, na ia iloina o le faaiipoipoga le mea e tatau ona faatatau muamua.

Na lagona e Ane le faanoanoa ona sa ia iloina e toaititi tagata o le a manatu o lana faaiipoipoga i le matua lea, o se mea e fiafia ai. Ae, sa ia filifili e tulaia atu i le aoaoina ia iloa uunaiga a le Agaga ma mea e finagalo ai le Alii, nai lo mea e mafaufau ai ana uo. “O le mea lenei sa manao-mia lo’u tu malosi ma faamaoni e fai i le filifiliga ua ou faia,” o lana tala lea.

Sa le’i mafaufauina lava e Peniamina se suiga patino lea o le a ia iloina ai faapea o le faaiipoipoga o le filifiliga sa’o lea i lena taimi mo ia. Nai lo lena, ua ia saunoa, “Na ou iloina faapea e tatau ona faia la’u faaiuga e faavae i mataupu faavae. Aisea ua ou i ai iinei? O le a lo’u faamoemoega i lenei lalolagi?”

A o ia sailiilia tusitusiga paia ma saunoaga a perofeta ma aposetolo, na liliu atu Peniamina i le Tama Faalelagi i le tatalo. Na ia mauaina foi faamanuiaga faaleperisitua. “Na amata ona manino mai ia te au faapea, na auina mai au i le lalolagi ina ia toe foi atu i le Atua faatasi ma lo’u aiga,” na ia fai

mai ai. “E leai se isi lava galuega e sili atu po o se isi galuega e tatau ona fai e sili atu i lena. O loo i totonu o le ‘O Le Aiga: O se Folafolaga i le Lalolagi.’ Afai ou te lē amanaiaina ma le iloa lenei mea, ae faia se isi, o le a ou lē usitaiaina poloaiga a le Atua.

“O le taimi lava na faaali mai ai ia te au faapea o le mea na aoaoina ai au i lo’u olaga atoa, sa matua moni lava, lea e sili atu ai lona taua nai lo manatu o isi, na ou lagonaina le faamalamalamaina. Na tonu ia te au e mulimuli i le mea na aoaoina ai au.”

Na faaiipoipo Ane ma Peniamina i le aso 26 Iulai, 2009, i le Malumalu o Stockholm, i Suetena. “Ina ua oo i le aso o la maua faamauga i le malumalu, na ou lagonaina se filemu,” o le tala lea a Ane. “Sa matua faigofie mea uma lava. Matagofie. Leai ni ofu po o mea teuteu faalelalolagi. Sa matua manaia le faatasi ai ma o’u matua ma uso ma tuagane i totonu o le malumalu—ma le faatasi ai ma Peniamina. O se taimi na faatumulia i le alofa moni.”

O Faamanuiaga na Mulimuli Mai

E ui o masina na muamua atu i la laua faaiipoipoga sa faigata, ae e faafetaia e Ane faigata na ia asaina. “Na faamalosia au e faia ma puipuia la’u faaiuga,” na ia ta’ua ai. “Na fesoa-soani le Atua ma faamalosia au e ala i tusitusiga paia, tatalo, ma faamanuiaga



O LE FAATOILALOINA O LUITAU O LE FAAIPOIPOGA

I se lauga i se faigalotu mo le autalavou matutua, o Elder Earl C. Tingey, o se uso ua faamalolo aloaia o le Korama Muamua a Fitugafulu, na laugaina popolega atonu e i ai i talavou matutua nofofua, e uiga i le faaiipoipoga:

“1. Atonu e foliga mai e itiiti le uunaiga mo faifeautalai ua uma misiona ina ia faaiipoipo. Afai o lo outou malama-lamaaga lena, ua sese. O faifeautalai uma ua uma misiona, e tatau ona uunaia pe a latou toe foi i aiga, ina ia tumau le toaaga i le Ekalesia, faamautu se aoaoga, maua tomari faafaigaluega, ma agai atu i le tulaga o le sailia o se soa faavavau.

“2. O nisi alii talavou ua manatu latou te lē mafaia ona faafetaiaia faamoemoega o nisi tamaitai talavou. . . . O fesootaiga tatau e mafai ona faatautaia ai lena lē mautonu.

“3. O se faamamafa i aoga po o le galuega, atonu e tuuina ai le faaiipoipoga i se tulaga maualalo atu. O le faaiipoipoga, aoga, ma le galuega e mafai ona o faatasi. O se galuega e aunoa ma le aiga, lea e mafai ona faia, o se mala.

“4. Aua le avea lou olaga e na o se olaga e fiafia pe manatu faapito. O le olaga e sili atu nai lo o se paka faafiafia. Aua le taulai atu i le mauaina o mea. Talia tiutetauave.

“5. O se vaaiga lē lelei o le faaiipoipoga . . . atonu e taitaieseina ai se tasi mai le faaiipoipoga. O nisi ua fai mai, ‘Aisea e faaiipoipo ai, ae ua tele naua faaiipoipoga e tatala?’ O le tatala o faaiipoipoga, e le faapea e le mafai ai ona e mauaina se faaiipoipoga fiafia ma faamanuiaina. Aua le avea gaoioiga a isi, e fai ai au faaiuga. Ia filifili nei faapea o lau faaiipoipoga o le a le avea o se toilalo.

“6. O nisi e tolopo faaiipoipoga mo mafuaaga tautupe. O le tolopoina o le faaiipoipo seia lava tupe ina ia mafai ai ona maua se olaga faalialia, e le potu lea. O le tele o le ola faatasi—tauivi, fetuutuunai, ma aoao e taulimaina luitau o le olaga—o le a leiloa, pe a tupu lena mea.”

Mai “O Savali e Tolu mo le Autalavou Matutua,” *Liahona*, Ape. 2007, 30.

faaleperisitua. O le toatele o tagata, o e na tetee i le amataga, na o mai ma faailoa mai faapea o le mea na ou filifilia e lelei ma sa’o. Ua latou vaaia ua ou maua moni le fiafia. Na latou faafetaia au mo le faalagolago ia te au lava ma le Alii.”

Ina ua mavae la laua faaiipoipoga, na siitia atu Ane ma Peniamina i se nuu fou, lea na amata ai a laua aoaoga faaiunivesite. Sa le’i pine, ae la faafeiloaia la laua tama teine, o Olea, ma faapea ona taofia ai aoaoga a Ane mo se taimi. O le a faaauau e Ane ana aoaoga i le afa o le taimi ma luga o le initoneti, i le faatagaina ai o ia e maua se aoaoga ma nofo i le fale e faafailele la laua tama teine. E ui sa ia iloa o lea ituaiga faiga o le a avea ma se galuega faigata, ae o le a mafai lava e Ane ona faamae’a lana aoga e pei ona ia mana'o ai.

“O nisi tagata atonu na manatu faapea, o le a ou ositulagaina le tele o mea ina ia faaiipoipo ma amata se aiga,” na ia fai mai ai, “ma atonu e mafai ona faapena. Ae o le mea moni, ua ou maua mea uma. Ua ou iloa pe a ou filifili e faamuamua le Alii, o isi mea uma o le a tuuina mai ia te au. Ua ou matua fiafia lava, ma faafetai i le maua ai o lo’u tikeri. Ae o le mea aupito sili lava, ou te faafetai ai, o le avanoa e avea ai o se aiga e faavavau!”

E ioeina e Peniamina lea tulaga. “Na taitaiina e le Atua au i se ala faapea, na aoaoina au e faamuamua o Ia,” na ia fai mai ai. “Mo au, sa lē o se filifiliga i le va o le aiga po o le aoga; ae o le aiga muamua ma le aoga i le taimi lava e tasi. O isi faaiuga ua tutusa lava. E le o le Atua, po o le leai. O le Atua e faamuamua, ona mulimuli mai ai lea o isi mea uma.” ■

E faapefea ona ou taulimaina **talanoaga e uiga i le talalelei** pe afai o le isi tagata e na o le taumafai e manumalo i se **finauga?** O tagata faapena e **le mananao** e faalogo i se molimau.

O le manatu poto ma le faauigaina, e mafai ona fesoasoani ia i tatou e malamalama ai i le upumoni, e moni lava, ma e mafai ona faia finauga talafeagai i le puipuia o le Ekalesia ma ona aoaoga. Peitai, pe a sili atu ona naunau se tasi i le manumalo i se finauga nai lo le malamalama i le talitonuga o se isi tagata, o le a faifai pea ona tulai mai finauga. Ia tu malosi i le tuuina atu o le molimau e uiga i le mea e te talitonu ma iloa e moni.

Afai o le tagata o loo e talanoa i ai, o loo faaauau ona uunaia le mataupu, ia faailoa i lena tagata e te faaaloalo i mea na te talitonu i ai, ae o le a tatau ona e ioe atu ina ia auese ai. O talanoaga e uiga i talitonuga faalelotu e lē tatau ona faatatau i le “manumalo”. Ma afai ua amata ona faafinau po o le ita, o le a lē aveave o se faataitaiga o le mea o loo e talitonu i ai, pe o le a le faatasi foi le Agaga Paia ma oe.

O Elder Robert D. Hales o le Korama a Aposetolo e Toasefululua, na aoao mai pe a tatou talanoa i tagata e uiga i le Ekalesia, “o lo tatou faamoemoega o le fesoasoani lea ia i latou e malamalama i le upumoni, ae le o le puipuia o o tatou lagona maualuga po o le mauaina o togi i se finauga o mataupu taulotu. O a tatou molimau mai le loto, o le tali aupito sili ona malosi lea e mafai ona tatou tuuina atu i o tatou fili. Ma o na itu-aiga molimau e na o le pau le auala e mafai ona tuuina atu ai, o le alofa ma le agamalu.”¹

O mea a le Agaga e aoaoina “e le o upu malie o le poto o tagata, ae o le faasino mai e le Agaga ma le mana” (1 Korinito 2:4). E ui lava atonu e le suia ai le mafaufau o soo se tasi, e tatau lava ona tuu atu lau molimau ma faailoa i tagata le mea e te talitonu ai. Ma a e faasoatu le talalelei, o le *auala* e te ta’uina atu ai mea, e matua taua e pei lava o le taua o *mea* o loo e ta’uina atu. Tautala ma le onosai ma le alofa. Mulimuli i le Agaga, ma o le a uunaia oe e iloa mea e tatau ona fai atu ai (ma mea e le tatau ona fai atu ai) ma le auala e tali atu ai. ■

FAAMATALAGA

1. Robert D. Hales, “Lototele Faakerisiano: O Le Tulaga Manaomia o se Soo,” *Liahona*, Nov. 2008, 72–75.

O le a le uiga o au peresitene a vasega ma korama mo le autalavou?

O au peresitene o vasega a Tamaitai Talavou ma korama a le Perisitua Arona, e aoga e le gata ia i latou o e umia tulaga, ae faapea foi i latou latou te auauna atu i ai.

O sui o au peresitene ua agavaa mo musumusuga e uiga i le vasega po o le korama, lea e mafai ona fesoasoani ia i latou e iloa ai ona tatalo mo, ma faaumea tagata auai o la latou vasega po o le korama, aemaise i latou o e fou mai, pe le toaaga. I le avea ai ma sui o le au peresitene, e fesoasoani ai i talavou e aoao tomai faataitai e pei o le faamatuutu atu, auauna atu, fesoootaiga, ma auai i aufono. O le aoao e faatulaga ma taitai fonotaga ma gaoioiga, e fesoasoani ai i taitai talavou e saunia ai mo se misiona po o isi valaauuga i le lumanai, a o latou aoaoina le taua o le faia o o latou tiute, ma le auala e saunia ai se fuafuaga ma faataunuaina.

O sui auai o vasega ma korama, latou te mauaina foi faamanuiaga patino e ala i nei taitai. O loo i ai se tasi e tutusa o latou matutua, e talanoa i ai, o lē e mafai ona fesoasoani ma uunaia i latou i le ola ai i le talalelei ma le faia o mea e tele, aemaise lo latou faamae’aina o le Alualu i Luma o le Tagata Lava Ia po o le Tiute i le Atua. Talu ai o peresitene o vasega po o korama e auauna i le komiti talavou a le au epikopo, e mafai ona latou faailoa atu i le epikopo faafitauli,



atugaluga, po o galuega lelei i totonu o a latou vasega ma korama.

O le valaauina e galue i le au peresitene o se vasega po o le korama, o se tiutetauave sili lea e fesoasoani i talavou e maua le loto talitonu sili atu ia te ia lava, aoao e avea ma taitai ma faataitaiga, ma atiina ae le alofa ma le lotogatasi i totonu o le vasega po o le korama. ■

Mo Le Malosi o le Autalavou o loo faapea mai e aloese mai tifiga soona fai o lauulu. O a tifiga o lauulu faapea ua soona fai?

O ituaiga tifiga o lauulu ua soona fai, e eseese lava mai lea atunuu i lea atunuu ma mai lea taimi i lea taimi, o le mea lea e faigata ai ona ta’u atu patino po o a ituaiga tifiga o lauulu ua soona fai mo tagata uma. E faapefea la ona e iloaina ua soona fai se otiga o se ulu? Fesili ifo ia te oe, “Aisea ua ou faia ai lenei mea?” Afai

ua e alu ese mai le tulaga masani ina ia vali lou lauulu i se lanu ese, uumi, ma le sitaili mo le faamoemoega e tasi “ina ia faailoa atu ai oe” po o le tosina mai ai o le vaaiga a isi, ona atonu lea ua e oo i le tulaga “soona fai” lea e taua i totonu o le *Mo Le Malosi o le Autalavou*.¹

Pe ua talosaga atu ea taitai o le Ekalesia e aloese mai tifiga soona fai, ona latou te mananao ia te oe ia e foliga lava e pei ona masani ai, e aunoa ma ni tifiga po o se uiga patino? E leai lava! Ua latou tuuina atu lenei fautuaga ona o ou foliga e faailoa atu ai se mea e uiga ia te oe. “E ala i ou laei ma foliga, e mafai ona faaali atu ai e te malamalama i le taua tele o lou tino. E mafai ai ona faaalua o oe o se soo o Iesu Keriso.”² O tifiga soona fai atonu e faapogisa ai lenei savali, ma auina atu ai se savali sili atu ona faalelailolagi e uiga ia te oe. ■

FAAMATALAGA

1. Tagai i le *Mo Le Malosi o le Autalavou* (tamaitusi, 2011), 9.
2. *Mo Le Malosi o le Autalavou* 9–10.

O LE A LE MEA E TUPU PE A TATOU OTI?

*O se fesili faavae, ma e ala i
perofeta anamua ma aso nei,
ua tuuina mai ai e
le Atua ia i
tatou ni tali.*

O lo tatou Tama Faalelagi agalofo na tuuina mai ia i tatou sina malamalama o le mea e mafai ona tatou faamoemoe i ai, i le taimi lava tatou te te'a atu ai ma lenei olaga. O nisi nei o upumoni atonu e fesoasoani ia te oe e malamalama ai i le mea o i ai nei tagata e pele ia te oe ua maliliu, ma le mea o le a i'u i ai tatou uma.

O Le A Le Mea ua Tatou Iloa e uiga i le Lalolagi o Agaga?

O fea o i ai le lalolagi o agaga?


Ua aoao mai Peresitene Polika Iaga (1801–77) faapea o agaga o i latou o e sa nonofo i lenei lalolagi, e i ai pea i o tatou autafa i lenei lalolagi, e ui e lē mafai ona tatou vaaia i latou.¹

O a foliga o le lalolagi o agaga?

E fuafua lava. O e amiotonu o le a mauaina le parataiso—fiafia, malolo, ma filemu, e aunoa ma faalavelave, popole, ma le faanoanoa (tagai i le Alema 40:12). O ē amioleaga o le a nonofo i seoli (tagai i le Alema



AUAI I LE TALANOAGA



I le masina atoa o Mati, o le a outou suesueina ai le Toetu o Iesu Keriso i a outou korama a le perisitua ma vasega a Tamaitai Talavou ma le Aoga Sa. O se tasi o mau faamanuiaga o le Togiola, o le faapea, e ala i le toetu, o le a tatou toetutu uma lava. Manatunatu e uiga i le auala e suia ai e le toetu lau vaaiga faalemafau-fau i taimi o faigata. Taumafai e manatua se tulaga patino ma le auala na faamanuiaina ai oe e lau molimau o le Togiola ma le toetu, ma mafaufau e faasoa atu lena aafiaga i lou aiga, po o se lesona o le a faia a le Ekalesia i le Aso Sa.

40:13–14). O seoli ua faamatalaina o “le tiga matautia i le manatu o le tagata.”²

O a foliga o agaga?

O agaga o tagata sa i le foliga o se tagata matua i le muai olaga, ma o le a i ai lena lava foi foliga i le lalolagi o agaga, e tusa lava pe maliliu i latou o laiti po o ni tamaiti.³

E mafai e agaga i le lalolagi o agaga ona vaai mai ia i tatou?

Ioe, pe a manaomia ai. Na saunoa mai Peresitene Iosefa F. Samita (1838–1918) faapea o i latou oi le lalolagi o agaga, e mafai ona sili atu le manino o la latou vaai mai ia i tatou, nai lo le tatou vaai atu ia i tatou, ma o “lo latou popole mo i tatou ma lo latou alofa mo i tatou, ma lo latou manao mo lo tatou manuia, atonu e sili atu nai lo lena tatou te lagonaina mo i tatou lava.”⁴

Pe mafai ona faaososoina pea agaga o i ai i le falepuipui?

Afai e te faamaoni i lenei olaga, o le a leai se mana o Satani ia te oe i le lalolagi o agaga. O tagata amioleaga o le a taitaia lava e Satani iina, e pei lava ona sa i ai i le lalolagi.⁵ E pei ona sa faamalamalama mai e Elder M. Russell Ballard o le Korama a Aposetolo e Toasefululua, o lenei lalolagi o se taimi e salamo ai, aua “o iinei i le lalolagi faitino, lea e mafai ai e le tino ma le agaga ona aoao faatasi.”⁶

O a mea o fai a agaga i le lalolagi o agaga?


O le mea e tasi ua tatou iloaina, faapea o agaga o e faamaoni, o i latou o e e le'i toetutu lava, o loo faia galuega faafaifeautalai i agaga oi le falepuipui.⁷ O le isi mea ua tatou iloaina, faapea o i latou o e

O LE UIGA, FAAOSOFIAINA, MA LE FAAMOEMOE

“O le toetu o se poutū o lo tatou faatuatuaga. E faaopoopoina le uiga i la tatou mataupu, faaosofiaina a tatou amioga, ma faamoemoe mo lo tatou lumanai.”

Elder Dallin H. Oaks o le Korama a Aposetolo e Toasefululua, “Toetu,” *Liahona*, Iulai 2000, 17.





sa faamaoni, o loo i ai i aiga ma se faatulagaga o le Ekalesia.⁸

O Le a le Mea ua Tatou Iloaina e Uiga i le Toetu?

E toafia tagata o le a toetutu?

O tagata uma o e na soifua i le lalolagi o le a toetutu (tagai i le 1 Korinito 15:21–23).

O a foliga o se tino toetu?

O se tino toetu o le a:

- **Ola Pea.** “O lenei tino faaletino e faatu mai i se tino ola pea, . . . e le mafai ona toe oti i latou” (Alema 11:45).
- **Atoaata.** “O le a toe faatasia le agaga ma le tino i ona foliga atoataa” (Alema 11:43). Na

faamalamalama mai e Peresitene Iosefa F. Samita, “O le a aveesea foliga mataga; o vaega faaletonu o le a soloia, ma o alii ma tamaitai o le a mauaina le atoataa o o latou agaga, i le atoataa lea na faia ai e le Atua i le amataga.”⁹

- **Matagofie.** Na saunoa Peresitene Lorenzo Snow (1814–1901) “E leai se mea e sili atu lona matagofie i le vaai atu i ai, nai lo o se alii ma se tamaitai toetu.”¹⁰
- **Faamamaluina** Na saunoa mai Peresitene Boyd K. Packer, Peresitene o le Korama a Aposetolo e Toasefululua: “O lou agaga e talavou ma malosi ma matagofie. E tusa lava pe ua matua lou tino ma auma’ia pe pipili pe le atoataa i soo se itu, ae a tuu faatasi le agaga ma le tino i le Toetu, o le a faapea ona faamamaluina oe; o le a faapea ona faapaiaina oe.”¹¹
- **E aunoa ma se faanoanoa po o se puapuaga.** “E leai foi se toe oti, po o se faanoanoa, po o se aue, e leai foi se toe puapuaga” (Faaaliga 21:4).

O le a le mea o le a tupu i tagata o e malilii a o laiti?

E tusa ai ma le saunoaga a le Perofeta o Iosefa Samita, o matua o se tamaitiiti, na oti a o laitiiti “o le a maua le olioli, le fiafia ma le tulaga faamalieleina i le faafaileleina o [ia], pe a mavae lona toetu, seia maua le tulaga atoataa o lona agaga.”¹²

O le a le mea o le a tupu i tagata, o e susunuina o latou tino pe le’i tanuina ?

E ui e le fautuaina e le Ekalesia le susunuina o tino, tatou te talitonu faapea po o le a lava, o le a toetutu tagata uma faatasi ma se tino atoataa. Na aoa mai Peresitene Polika Iaga faapea, i le toetutu “o vaega ninii faavae tulaga ese ia na tuufaatasia ai o tatou tino iinei, afai tatou te faamamaluina i latou, e ui atonu e tiaia i le loloto o le moana, e ui foi o se tasi vaega o le a i matu, o se isi i saute, o le isi i sasae, ma le isi i sisifo, o le a toe aumaia faatasi i le emo o le mata, ma o o tatou agaga o le a ulufiaina i latou.”¹³

O ai o le a toetutu, ma o afea e toetutu ai?

ULUAI TOETUTU, PO O LE “TOETUTU O E AMIOTONU” (MF&F 76:17)

I le Toetu o Keriso

O perofeta ma isi tagata patino amiotonu, o e o le a mauaina se mamalu faaselesitila (tagai i le Mosaea 15:21–25).

I le Afio Faalua Mai o Keriso

O i latou o e o le a mauaina se mamalu faaselesitila (tagai i le MF&F 76:50–70; 88:96–98).

I le Amataga o le Meleniuma

O i latou o e o le a mauaina se mamalu faa-terasitila (tagai i le MF&F 88:99).

O LE TOETUTU LONA LUA, PO O LE “TOETUTU O E AMIOLETONU” (MF&F 76:17)

I le Faauiaga o le Meleniuma

O i latou o e o le a mauaina se mamalu faa-telesitila (tagai i le MF&F 76:85; 88:100–101).

Atalii o le malaia (tagai i le MF&F 76:43–48; 88:102).

Aisea ua i ai se Toetutu Faaletino?

O le toetutu faaletino o se vaega o le fuafuaga a le Atua, ma na aoao mai e perofeta mai lava i aso o Atamu (tagai i le Mose 5:10). Peitai, “o le tiapolo e leai se tino, ma o lona faasalaga lena,”¹⁴ o le mea lea na te faafilogiaina ai lenei aoaoga, ina ia le talitonu ai tagata i se toetutu faaletino.

E toatele tagata e talitonu faapea o se tino faaletino e pei o se falepuipui mo le agaga, ma, e na o le pau le mea e mafai ai ona tatou fiafia moni, o le faasaolotoina lea o le agaga mai le tino, ae lē moni lena tulaga. Ua faaalua e le Alii faapea o se toetutu faaletino e manaomia ona:

- **O le auala tatou te maua ai le atoaga o le olioli.** E na o le “agaga ma le elemene [o se tino faaletino], ua soofaatasi e lē matuu’eseeseina, e mauaina se atoatoaga o le olioli” (MF&F

93:33). Ua tatou iloaia foi faapea o i latou o e ua maliliu ma o loo faatalitali i le lalolagi o agaga mo le Toetu o Keriso “sa vaai e ua maliliu i le umi o le tuueseaa o latou agaga mai i o latou tino, o se pologa” (MF&F 138:50).

- **O se faamanuiaga o lo tatou filifiliaina o le fuafuaga a le Tama Faalelagi.** Ae tatau te le’i fananau mai i le lalolagi, o agaga uma o e o le a ola i le lalolagi na filifili e mulimuli i le fuafuaga a lo tatou Tama Faalelagi nai lo le tetee a Satani (tagai i le Aperamo 3:23–28). O le taunuuga o lena mea, ua tatou mauaina se tino faitino ma, e ala i le mea alofa o le Toetu o Keriso, o le a toetutu ai faatasi ma se tino ola pea. O i latou na mulimuli ia Satani, i le muai lalolagi, o le a le mafai ona mauaina soo se itu-aiga o tino faaletino.

- **E toe aumai ai i tatou i le afioaga o le Atua ina ia faamasinoina.** Ua aoao manino mai le Tusi a Mamona faapea, o le mana o le toetu lea ua faatagaina ai tatou e ulufale atu i le afioaga o le Atua ina ia faamasinoina e tusa ma a tatou galuega.¹⁵
- **E manaomia mo le faaolataga.** Na aoao mai Iosefa Samita, “E leai se tagata e mafai ona maua . . . le faaolataga vagana ua mauaina se tapeneko [se tino faaletino].”¹⁶
- **O le auala e aveai ai tatou faapei o le Tama Faalelagi ma Iesu Keriso.** “Ua i ai i le Tama se tino o aano ma ivi e mafai ona pa’i i ai e pei o le tagata; ua faapea foi le Alo” (MF&F 130:22). ■

FAAMATALAGA

1. (Tagai i le Aoaoga a Peresitene o le Ekalesia: Polika Iaga [1997], 333.)
2. Aoaoga a Peresitene o le Ekalesia: Iosefa Samita (2007), 285.
3. Tagai i le Aoaoga a Peresitene o le Ekalesia: Iosefa F. Samita (1998), 217–18.
4. Joseph F. Smith, *Gospel Doctrine*, 5th ed. (1939), 263.
5. Tagai i le Aoaoga: Polika Iaga, 282; Alema 34:34–35.
6. M. Russell Ballard, “Is It Worth It?” *New Era*, June 1984, 42.
7. Tagai i le MF&F 138:30; tagai foi i le Aoaoga: Iosefa Samita, 474
8. Tagai i le Mataupu Faavae o le Talalelei (2009), 243; mo nisi faamatalaga e uiga i le lalolagi o agaga, tagai i le Dale C. Mouritsen, “O Le Lalolagi o Agaga, O Le Isi o Tatou Aiga,” *Liahona*, Tesema 1977, 46–51.
9. Iosefa F. Samita, *Mataupu Faavae o le Talalelei*, 23.
10. Lorenzo Snow, *O Aoaoga a Lorenzo Snow*, ed. Clyde J. Williams (1996), 99.
11. Boyd K. Packer, “O Le 20-Tala Pepa,” *Liahona*, Iuni 2009, 23; *New Era*, Iuni 2009, 5.
12. Aoaoga: Iosefa Samita, 215.
13. Aoaoga: Polika Iaga, 193, 195.
14. Aoaoga: Iosefa Samita, 215.
15. Tagai i le 2 Nifae 9:22; Iakopo 6:9; Mosaea 16:8–10; Alema 11:41; 33:22; 40:21; Helamana 14:17; Mamona 7:6; 9:13.
16. Aoaoga: Iosefa Samita, 215.







**Saunia e Elder
Quentin L. Cook**
O Le Korama a
Aposetolo e Toasefululua

AUA LE FAIA NI UFIMATA

O se tasi o ou puipuiga aupito sili e faasaga i le faia o filifiliga le lelei, o le lē faia lea o soo se ufimata o le lē faailoaina o le igoa.

Ao ou tomanatu i le tulaga po o ai oe, na oo mai ai le lagona ia te au faapea, atonu e te le o faafetaia atoatoa le taua o lou augatupulaga. Ou te talitonu ua ia te outou le iloa ma le faavae ia avea ma augatupulaga aupito sili ona lelei ua i ai, aemaise lava i le faaalualuina i luma o le fuafuaga a lo tatou Tama Faalelagi.

I le vaai atu i le gafatia tele mo le lelei ua outou mauaina, o a o'u atugaluga mo lo outou lumanai? O le a se fautuaga e mafai ona ou tuuina atu ia te outou? O le a i ai le uunaiga malosi sili i o outou luga taitoatasi, ina ia faia mea e tusa ma o outou uiga—e oo lava i le faia o se ufimata—ma avea ai ma se tasi, o le a lē tomanatu moni po o ai outou, pe o le a le ituaiga tagata e te manao e avea ai.

O se faaitaiga mai le Talafaasolopito o le I.S.

I le 2011, na matou fono ai ma Elder L. Tom Perry ma Abraham Foxman, le faatonusili o le Faalapotopotoga Faasaga-I le-Taufaaleaga. O lona faamoemoega o le taofia lea o le faaleagaina o tagata Iutaia.

I la matou fonotaga ma le Susuga a Foxman, na ou fesili atu ai ia te ia po o le a se fautuaga e manao e tuuina mai mo i tatou i le fesootai ai ma o tatou tiutetauave i mataupu tau i le va-i-fafo

mo le Ekalesia. Na ia mafaufau loloto mo sina taimi, ona faamalamalama mai lea o le taua o le uunaiina o tagata ina ia le faia ni ufimata. Na ia faamatalaina mai le Ku Klux Klan. O se faalapotopotoga sa matuai tele sona aafiaga ma taufaamataui i le tele o tagata Amerika i le vaega muamua o le seneturi e 20. O le ofuina ai o ofutalaloa ma ufimata tusapau, lea sa faigata ai ona iloagofie sui auai, na latou susunuina satauro i luga o fanua o i latou na faasaga i ai a latou faiga, o ni tagata ua latou ta'ua i latou lava o taifau leoleo. O nisi o i latou na sili ona faatūtū i ai o tagata uli o Amerika, ae na faapea foi tagata Katoliko, Iutaia, ma tagata malaga mai fafo. O tagata fitafitia sili o sui auai o le faalapotopotoga na auai i le sasaina, sauaina faaletino, faapea foi ma le fasiotitagata. Na faasino le Susuga a Foxman i le toatele o le faalapotopotoga, na lē faia ni ufimata, sa masani lava o tagata lelei, e aofia ai le au faipisinisi ma tagata lotu. Na ia faasino i le nanaina o o latou tagata moni, ma le faia o se ufimata e mafai ai e i latou ona auai i gaoioiga ia sa masani ona aloese ai. O la latou amio na avea o se aafiaga matua leaga lava mo tagata Amerika.

O le fautuaga a le Susuga a Foxman, o le faamamafa atu lea o le taua o tagata e aloese mai le faia

o ufimata ia e natia ai o latou tagata moni.¹

O faaitaiga mai le Talafaasolopito o le Ekalesia

I popofou o la tatou talafaasolopito o le Ekalesia, sa nonofo ai le Perofeta o Iosefa, o Ema, ma la laua masaga e 11-masina le matutua i Hiram, Ohio, i le faatoaga a Johnson.

I se tasi po o le Aso Toonai, na feosoi mai ai i le faitotoa se vaega o alii na vali uli o latou foliga, ma toso le Perofeta i fafo, lea na latou sasaina ai o ia ma sasaa le ta i o laua luga ma Sini Rikitone.

“E ui sa gau se nifo o le Perofeta, i ai se manu'a tugā i lona itu, toulua sina vaega o lona lauulu, ma i ai ni mu mai le aseta o le kasa, na ia tuuina atu lava se lauga i le sauniga masani i le Aso Sa. Faatasi ai ma le au paia na faapotopoto iina, pe tusa ma le toafa tagata o le vaega leaga na i ai.”²

O se mea foi e malie ai, o i latou o e na auai i le fasiotiaina o le Perofeta o Iosefa Samita ma lona uso o Ailama, na valiina o latou foliga i se taumafaiga e nana ai o latou tagata moni.³

Aloese mai le Faia o Ufimata ma le Faia o Mea e le Tusa ma Lou Tagata

Ou te le o fautuaga atu faapea o loo auai soo se tasi o outou i ituaiga



gaoioiga leaga ia na faato'ā ou faamatalaina atu. Ou te talitonu, i o tatou vaitaimi, pe afai o le lē faailoaina o lou tagata moni, ua sili atu ona faigo-fie nai lo se isi lava taimi, faapea o loo i ai mataupu faavae taua o loo aofia ai i le lē faia o se ufimata, ma “tutumau i faatuatuaga, . . . ma e na fasia.”⁴

O se tasi o ou puipuiga aupito sili faasaga i le faia o filifiliga lē lelei, o le lē faia lea o soo se ufimata e natia ai lou tagata moni. Pe a e maua oe lava o mana o faia faapea, faamolemole ia iloa o se faailoga matuia lena o se tulaga matautia, ma o se tasi lea o meafaigaluega a le tiapolo ina ia uunaia oe e faia se mea e lē tatau ona e faia.

O se tulaga malie le faapea o tagata o loo aofia ai i ponokalafi, e masani ona tauavea se igoa ese ma natiaina lo latou auai. Latou te ufiufia la latou amio, lea ua latou iloaina e faataumaoi ma faatautala, i tagata uma latou te popole i ai. O le ponokarafi o se mala lea e faaleagaina ai, e le gata i le tulaga o le ola mama o se tagata i le va ma le Atua, ae e mafai foi ona faaumatia ai faaipopoga ma aiga, ma i ai sona aafiaga matautia i atunuu.

Mo i latou o e ua pau'ū atu i lenei mausa faataumaoi, faamolemole ia mautinoa e mafai ona e salamo, ma e mafai ona faamaloloina oe. O le salamo e tatau ona muamua atu i le faamalologa. O le faamalologa atonu o se faagasologa umi. O lou epikopo po o le peresitene o le paranesi, e

mafai ona fautuaina oe i le auala e mafai ai ona e maua le fesoasoani o loo e manaomia e faamaloloina ai.

la Faia e Tusa ma ou Talitonuga

Ua taatele i aso nei le lē faailoaina ai o le igoa o se tasi, pe a tusiaina fesoataiga ita, ma malolosi i luga o le initoneti. O nisi ua latou ta'ua lena mea o le faatigā. E i ai faalapopotoga patino ua taumafai e siakiina faamatalaga. Mo se faataitaiga, o le *Taimi a Niu Ioka* e le taliaina faamatalaga e i ai “faamatalaga e osofaia ai isi tagata, ata mataga, gagana masoā, uiga mataga, . . . faafofigaina o tagata, faaseunani ma le VAVAO. . . .

“*O le Taimi* e fautuaina foi le faa-aogaina o igoa moni, ona, ‘Ua matou iloaina o tagata o e faaaogaina o latou igoa, e faatautaia talanoaga sili atu ona matagofie, ma faaaloaloga.’”⁵

Na tusia e le Aposetolo o Paulo: “Aua ne'i faaseseina outou, o le feoai ma e amio leaga e leaga ai amio lelei.

“Ina ala mai ia i le amiotonu, a e aua ne'i agasala; auā ua pouliuli nisi i la le Atua” (1 Korinito 15:33–34).

Ua manino lava o fesoataiga faatiapolo e le na o se tulaga o amioga leaga, ae, afai e faia e i latou o e o le Au Paia o Aso e Gata Ai, e mafai ona matua aafia ai i latou o e le o i ai le malamalama o le Atua, po o se moli-mau e uiga i le Faaola.

O soo se faaogaaga o le initoneti e soona fai, faatamaia ai se igoa o se tasi, po o le tuuina ai o se tagata i se

malamalama leaga, o se faiga faataumaoi. O le mea ua tatou vaaia i totonu o atunuu, pe a faaaogaina e tagata ufimata o le lē faailoaina o igoa, ua sili atu ona latou auai i lenei ituaiga amioga, lea e matua faataumaoia ai aoaoga faalemalo. E faapea foi ona solia ai mataupu faavae na aoaoina e le Faaola.

O tagata amiotonu e le manaomia le faia o ufimata e natia ai o latou faasinomaga.

Faatino Lelei Lau Vaega

E i ai lo matou talitonuga ia te outou. E talitonu faamaoni ia taitai o le Ekalesia e mafai ona sili atu lo outou fausiaina o le malo nai lo se isi augatupulaga i luma atu. E le gata ua outou mauaina lo matou alofa ma le lototalitonu, ae faapea foi a matou tatalo ma faamanuiaga. Ua matou iloaina o le manuia o la outou augatupulaga e taua i le faatuina faifaipea o le Ekalesia ma le tuputupu a'e o le malo. Matou te tatalo ina ia outou faatino lelei la outou vaega, a o outou aloese mai le faaaogaina o ufimata. ■

Mai se faigalotu a le Ofisa o Aoga a le Ekalesia mo autalavou matutu na faia i le aso 4 Mati, 2012, i le Iunivesite a Polika Iaga-Idaho.

FAAMATALAGA

1. Fonotaga ma Abraham Foxman i lona ofisa i le Aai o Niu Ioka, Niu Ioka, ia Iuni 14, 2011.
2. Mark L. Staker, “Remembering Hiram, Ohio,” *Ensign*, Oke. 2002, 35, 37.
3. Tagai i le *Aoaoga a Peresitene o le Ekalesia: Iosefa Samita* (2007), 482.
4. “Vaivai ea Fanau a Siona,” *Viiga*, nu. 159.
5. Mark Brent, i le “The Public Forum,” *Salt Lake Tribune*, Iulai 27, 2011, A16.

NA TALITONU IA TE A'U LO'U USO

Na fesoasoani Tanu ia te au e atina ae se taleni, na ou mautinoa sa lēi i ai ia te au.

Saunia e David Dickson

Mekasini a le Ekalesia

Sa 15 o'u tausaga, ina ua ou aoaina se mea moni e uiga i au taleni—pe o le mea moni lava, o lo'u le mauaina lea—i se tasi vaega patino: sa lē mafai ona ou pese.

Na ou taumafai ia ou i ai i se tala faalenuu, ma o la'u pese toatasi e aunoa ma se meafaifaaili, sa matua lē lelei lava, ina ua afa le pese, na sau se tagata ta laau ma amata ona taina le pese ona o le alofa mai. Ina ua mavae lena, na ou tautino e leai se tasi e toe faalogo lava ia te au o pese. Ua oo i le taimi e tataua ona sui ai, ma saili se isi mea ou te fiafia i ai, ona ua matua lava ma totoa le aafiaga maasiasi e tasi.

Ae ui lea, o lo'u uso matua o Tanu, o le sa avea o se tagata pese sili ona maoae, na ia te ia nisi fuafuaga. I nai masina talu lo'u taumafai ai mo le tala, na ia fesili mai ai pe aisea na ou fefe ai e toe pese.

“E matua le lelei lava au,” na ou fai atu ai ia te ia. “E le mafai ona ou pese.” Sa lei talitonu Tanu ia te au. E ui i a'u tetea, na ia faatauanauina au e usu se pese i lena lava taimi. Sa ou fefe.

Ou te lē manatuaina le pese na ou usuina, ae sa puu-puu, tau le lagona, ma foliga mai o se faamaoniga o le lē i ai ia te au o se taleni pese. O le tala na sosoo ai a Tanu, o le a ou manatuaina pea i lo'u olaga atoa. “Lena,” na ia

FAAMALOLOSIA OU USO MA TUAFAFINE

“Ia faamalolosia au sootaga ma ou uso ma tuafafine. E mafai ona avea i latou ma au uo e aupito sili ona outou valalata. Lagolago i latou i mea e fiafia i ai, ma fesoasoani ia i latou pe a fetai ai ma luitau.”

Mo Le Malosi o le Autalavou
(tamaitusi, 2011), 9.

fai mai ai ia te au, “na ou iloaina lava e lelei lou leo. Na pau lava le mea o lou toaga e faataitai.”


I le Mataupu Faavae ma Feagaiga 38:25 ua tatou aoao mai ai “ia taitasi le tagata ma manatu taua i lona uso e pei o ia lava ia te ia.” Pe ana taufaaili Tanu ia te au ma la'u pese, faapei ona faia e le toatele o tei matutua, o le a mautinoa lava lona faamautinoaina o lo'u lē toe pese lava, atonu mo le olaga atoa. Nai lo lena, na sii au e Tanu i luga. Na ia faamalosiaina au.

I le faaiuga, na ou mulimuli i lana fautuaga ma faataitai. Na ou te'i, na faifaimalie ona lelei la'u pese. O le pese na avea ma se fiafia sili i lo'u olaga. Na ou pese i le tele o afaipese i le taimi atoa o le aoga maualuga faapea foi i le kolisi ma isi mea. O le pese ua tumau le avea o se tasi o o'u fiafiaga sili ona loloto.

Na aoao mai le Faaola: “Faauta, pe tutu ea e tagata se lamepa ma tuu i lalo o se pusa fua saito? E leai, ae latou te tuuina i luga o se tuugalamepa, ma o le a susulu atu ai lona malamalama ia i latou uma o e o i totonu o le fale” (Nifae 12:15). Sa mafai ona ou faasusuina lena malamalama, i le fiafia ai ma le faasoaina atu o musika mo le tele o tausaga, ae atonu o le a lē mafai lava ona ou faia, pe ana le seanoa le uunaiga a lo'u uso o Tanu. ■



**Saunia e
Ann M. Dibb**
Fesoasoani Lua i le
Au Peresitene Aoao
o Tamaitai Talavou



E I A I SA'U MOLIMAU E UIGA I LE AIGA

I tausaga ua mavae, na ou faalogo ai a o tuuina mai le molimau a se uso i la'u uarota. Ou te manatuaina le mea na ia faasoaina mai, ma le lagona na ou mauaina. Na faaalua e Tuafafine Reese lona agaga faafetai mo lona aiga amiotonu, ma le olioli ma le mafanafana na tuuina atu ia te ia e le malamalama e uiga i le faava-vau o aiga. Sa ou lagonaina le Agaga o faamautu mai lo'u manao loloto ina ia maua lena faamanuiaga e tasi, ma se molimau e uiga i aiga.

Se i ou ofoina atu ni nai fautuaga e fesoasoani ai ia te oe ia maua se molimau o le taua o le aiga:

1. Saili ma le agaga tatalo le musumusuga a le Alii ma faamaumau ou faalogoga a o e suesue. Faapaia lou olaga e ala i le tausai-ina o poloaiga. O lenei mea o le a fesoasoani ia te oe e agavaa ai mo le Agaga, lea o le a fesoasoani ia te oe i lau saililiga.

2. Faitau le "O Le Aiga: O se Folafolaga i le Lalolagi,"¹ na uluai

tuuina mai e se perofeta ua toeitiiti nei atoa le 20 tausaga talu ai. Ua faamalosisia la'u molimau i perofeta, tagatavaai, ma talifaaaliga a o ou faitauina lenei pepa o faamatalaga ma mafaufau ai i suiga ua i ai nei i le lalolagi e tusa ai ma le aiga. A e faitauina le folafolaga, matau ia aoaoga faavae, fautuaga, lapataiga, ma faamanuiaga folafolaina ma le uiga ia te oe lava ia.

3. Suesue i upu a perofeta ma le Au Pulega Aoa. O a latou upu e musuia ma o le a faamanuiaina ai i latou o e talitonu ma mulimuli i ai. Mo se faataitaiga, na aoa mai e Pere-sitene Thomas S. Monson: “E tatau i le aiga ona umia lona tulaga aupito maualuga i o tatou olaga aua ua na o le pau lea o le faavae talafeagai e fausia ai e se sosaiete o tagata soifua le lumanai ma faatumauina ai tulaga faatauaina ua latou faapelepeleina i le taimi nei.”²

4. Suesue i tusitusiga paia. O loo i ai le mau faataitaiga o aiga ua fausia i luga o le faavae o le amiotonu, usi-usitai, ma le faatuatua i le molimau ia Iesu Keriso. Faitau au tusitusiga paia, aemaise lava le Tusi a Mamona, faatasi ai ma le fesili, “O a aoaoga o le a faamanuiaina ai au pe a faaaoga i lo'u aiga i le taimi nei ma le lumanai?”

5. Suesue le Mo Le Malosi o le Autalavou, aemaise le vaega o le “Aiga”. Aoa e uiga i tiutetauave ma faamanuiaga o se aiga. Manatu i galuega e manaomia mo tagata taitasi o le au paia e fatufatu ma faatumauina se aiga soofaatasi, ma faatonugalemu i le talalelei. Ia iloa pe mafai faapefea ona faamalolosisia sootaga i totonu o lou aiga. Vaavaai mo faamautinoaga ma le

mafanafana o loo maua i le pusa i le itu taumatau.

E moni lava, o vaega uma i le *Mo Le Malosi o le Autalavou* e faia tonu i sootaga faaleaiga ma faaleleia ai. A mulimulitai tagata taitasi o le au paia i tulaga faatonuina ma poloaiga, o le a faamanuiaina i latou i le mafutaga ma le Agaga Paia ma agavaa ai mo



O LE FUAFUAGA A LE ATUA MO AIGA

“E finagalo le Atua ia o mai uma Lana fanau i le lalolagi o se vaega o se aiga faavavau faatasi ai ma se tina ma se tama e alolofa ma tausia le tasi ma le isi faapea ai ma le la fanau. Afai e te le o mauaina sea aafiaga, ia onosai ma faaauu pea ona e ola amiotonu. Saili mo ni tagata agavaa o loo fai ma ni faataitaiga lelei. Ia saunia nei e faataunuu au matafaioi paia o se tane po o se ava ma se matua. Ia tautino atu e faipoipo i le malumalu ma fausiaina sou lava aiga e faavavau.”

Mo Le Malosi o le Autalavou (tamaitusi, 2011), 9.

sauniga ma feagaiga paia o le malumalu ma o le a faamanuiaina ai aiga taitasi i le taimi nei ma le faavavau.

6. Faatino mea ua outou aoaoina i a outou suesuega ma *faaaoga* mea ua outou aoaoina i o outou aiga (tagai MF&F 88:119).

Ua ou faalogo i molimau faamomoi-loto a tamaitai talavou sa galulue i le tulaga faatauaina lona tolu i le vaega o le natura paia o le Alualu i Luma o le Tagata Lava Ia, lea e talosagaina ai tamaitai talavou e faia se taumafaiga faapitoa e faamalolosisia ai sootaga faaleaiga mo vaiaso e lua (e mafai e alii talavou ona maua se fuafuaga faapena i le *Faataunuuina o Lo'u Tiute i le Atua* [2010], 80–81). Na faasoa mai e se tamaitai talavou, “Ua ou vaai i se vavega. Ou te alofa i lo'u uso, ma sa tupu i le lua vaiaso! Ua ou faia o se sini e toe fai lenei mea mo tagata taitasi o lo'u aiga i tausaga taitasi. Aisea? Ona ua ou matua fiafia ai lava!”

7. Tatalo ma saili le faamautinoaga e ala i le Agaga i le taua o le aiga. Ia onosai ma mataala. O le a oo mai se molimau e ala i le Agaga aua “o le aiga ua faauuina e le Atua” ma “o le iunite aupito taua i le olaga nei ma le faavavau.”³

Ua ou iloa o le faia o nei mea o le a oo mai le aso o le a, e faapei ai o Sister Reese, o le a mafai ai ona e tu atu ma faasoa atu, “E i ai sa'u molimau e uiga i le aiga, ma o lenei iloa ua ou maua ai le mafanafana ma le olioli.” ■

FAAMATALAGA

1. “O Le Aiga: O Se Folafolaga i le Lalolagi,” *Liahona*, Nov. 2010, 129.
2. *Teachings of Thomas S. Monson*, comp. Lynne F. Cannegieter (2011), 112.
3. *Tusitaulima 2: Taitaitima o le Ekalesia* (2010), 1.1.1.

*Ina ia aloese mai le pauu atu
i lua natia, tutu i luga o le ala!*

O MEA MATAUTIA UA NATIA



Saunia e Joshua J. Perkey

Mekasini a le Ekalesia

Elatalata i le tumutumu o Sana Cruz, o se motu i le atu Kalapago, e taoto ai Los Gemelos, “le Piilua.” O nei lua magotogoto tetele e lua e mafai ona ofi ai ni malae lakapi se tele. Mai augutu, e foliga mai e pei o lua na eli ai maa e tagata e la’u mai ai le maa mo malumalu ua mavae.

E ui i le matagofie faanatura o le eria, e le matagofie uma e pei ona foliga mai ai. E ufitia e le vao mafiafia le laufanua teropika vagana ai le mea o loo ui atu ai le auala. Na filifilia lelei le auala ia mausali lelei e savavali ai.

O le eleele i itu e lua o le ala, e ui o loo ufitia i pupulaau, laau toto, ma laau tetele, e ono lē mausali tele.

Afai e te fia tuua le auala o loo faataaliolio ai Los Gemelos e vaili ai le vaomatua, i soo se minute lava e te ono laa ai i se vaega manunu e le lava le malosi e tatalia ai lou mamafa. O le a le mamao o le a e pau i ai? E te le iloa sei vagana ua e patatu i le ta’ele. O nisi o lua magotogoto i Sana Cruz, e silia ma le 100 futu (30 m) le loloto. E tusa ai ma tala o le vaifanua, o se tasi o lua e matua loloto lava ma e lei maua lava le ta’ele.

O le auala e mulimuli i se ala patino—o se ala atonu e te le fia manao e mulimuli ai.

Peitai, o loo i ai le saogalemu i le auala ma se faamautinoaga i le mea e tau i ai.

Faateete i le Vaega Manifinifi

I se tulaga faaletalalelei, o na auala taamilo i Los Gemelos e ono avea o ni faatusa o le tele

o mea, e pei o poloaiga, o aoaoga a perofeta, fautuaga i le Tiute i le Atua ma le Alualu i Luma o le Tagata Lava Ia, o tulaga faatonuina i le *Mo Le Malosi o le Autalavou*, ma le talalelei lava ia. A tatou faatinoina le talalelei, a tatou mulimuli i aoaoga a perofeta, a tatou ola e tusa ai ma taitaiga a poloaiga, tatou te maua le saogalemu ma le filemu. A tatou le faia . . . ia, e ono mafai ona fai si tulaga matautia o mea.

E i ai taimi e ono tofotofoina ai i tatou e tuu le mulimuli i poloaiga pe le amanaia aoaoga a le Ekalesia aua ua tatou lagonaina ua faasasa. Tatou te mananao e filifili lava tatou i le ala e ola ai.

Peitai, e pei lava ona fesoasoani auala taamilo i Los Gemelos i tagata ia aua nei pau i vaega manifinifi, e le o faasaina foi e poloaiga lo tatou faitalia—ae, latou te saunia le avanoa sili mo le fiafia ma le manuia. E mafai ona tatou filifilia e le aunoa mea tatou te mananao e fai. E mafai ona tatou filifilia lo tatou lava ala e o ai, nai lo le mulimuli i le ala ua faataatia mai e lo tatou Tama Faalelagi mo i tatou. O le a tatou le taunuu vave lava i lo tatou taunuuga nai lo le mulimuli i le auala ua uma ona faamaonia, ma o le sailia o lo tatou lava ala e ono tiga ma faigata.

O le mea lava lea e tasi e faatatau i poloaiga, e pei o le Upu o le Poto. E le aveesea e le Tama Faalelagi ma Lana Ekalesia lo tatou faitalia i le fai faamalosi mai faapea ia tuu lo tatou inu ava malosi. E mafai ona tatou filifili pe tasi le poloaiga pe leai. Ae a tatou faia lene filifiliga, ua tatou filifilia foi ma taunuuga e o faatasi ai.



I LUGA O LE ALA

“O le mea lea, ia outou faia ai mea ua ou fai atu ia te outou na ou vaai o le a faia e lo outou Alii ma lo outou Togiola; aua, . . . ona outou i ai lea i lenei ala lauitiiti ma le vaapiapi e tau atu i le ola e faavavau; ioe, ua outou ulu atu i le faitotoa; ua outou faia e tusa ma poloaiga a le Tama ma le Alo; ma ua outou maua le Agaga Paia o le e molimau i le Tama ma le Alo, i le faataunuina o le folafolaga na ia faia, e faapea afai tou te ui atu i le ala o le a outou maua” (2 Nifae 31:17–18).

Afai tatou te filifili e soli na poloaiga, ona tatou lafoai lea o na faamanuiaga uma. O le filifiliga e le pe faataga ea ona tatou inu ava malosi pe fai le mea nei po o le la. O le, pe tatou te mananao i faamanuiaga pe leai o le malo o le lagi, ma le faia o le mea e poloai mai ai le Alii ona tatou te alolofa ia te Ia ma ua liua ia te Ia.

Saogalemu i luga o le Ala

O Jessica P. ma Nory A., o ni tamaitai talavou se toalua e nonofo i Sana Cruz, ua la iloaina lelei lenei mea. O i la'ua oni tagata liliu mai, ua vaai i le eseese o le tausia o poloaiga. E le toatele ni tagata o le au paia i Atumotu o Kalapago (e na o le 125 tagata o le au paia i la latou paranesi mai le tusa ma le 25,000 tagata o le motu). E mafai ona faigata ona tumau ai i le ala sa'o ma le vaapiapi (tagai 1 Nifae 8:20; 2 Nifae 4:33; 31:17–19; Alema 7:19) i faaososoga e pei o ava oona ma fualaau faasaina.

Na vaai Nory i luitau i lona lava aiga. Ina ua mavae se tausaga talu

ona papatiso lona aiga, sa faamauina i latou i le Malumalu o Guayaquil Ecuador. Peitai, e lei umi, ae pauu ese nisi o lona aiga. Na umi se taimi ua na o ia ma lona tina sa auai i le lotu. Na faapefea ona tumau lo la malolosi?

“O afiafi faaleaiga,” o lana tala lea. “Mo sina taimi, sa na o lo'u tina lava ma a'u e faia. Mulimuli ane, sa amata ona o mai lo'u tuagane matua ma lo'u tama. Ma o taimi uma lava matou te susesue ai le talalelei, e fai mai ai lo'u tama, 'O au lea e faatatau i ai le mea lea.' O lea la ua amata ona malosi mai faapea foi lo'u tuagane.”

Na feagai Jessica ma se tauiviga e ese ai. “Ona e na o au o lo matou aiga e i ai i le Ekalesia, e faigata,” na ia faamatala mai ai. E le fiafia nisi o lona aiga ona e alu i le lotu. O le mea moni, e mafai ona oo ai ina tauaimisa.

“O nisi taimi e te moomoo ai maimau pe ana o ni tagata o le Ekalesia ou matua, ma lou aiga,” o lana tala lea, “ina ia mafai ai ona e faasoa atu i ai. Ese le faigata.

“A i ai ou faafitauli, e le mafai ona e alu e sue i le aualatele pe sue i le ava malosi, aua e le maua ai se fesoasoani. Ae ou te sau i le lotu, lea e i ai au uo lelei.

“Latou te fesoasoani tele ia te au. A ou le fiafia, a o la lava e i ai Nory po o isi tamaitai talavou. A ou sau i le lotu, ou te lagona le ola. Ou te lagonaina se toomaga mai faafitauli uma o lo'u olaga.”

Filifilia o le Ala Sa'o

Ua maua e Jessica ma Nory le olioli i le ola ai i le talalelei. A le o lena, ua la maua le olioli *aua* ua la ola i le talalelei.

O poloaiga, e pei o auala taamilo i Los Gemelos, e le faasaina ai i tatou. Ua tuuina mai ai le taitaiga e tatau ai ina ia tatou atoatoa ai e ala i le Togiola a le Faaola (tagai MF&F 82:8–9). A tatou filifili e tausi ia poloaiga, ua tatou filifili e faaali atu le alofa ma le tuuto i le Atua. Ua tatou filifili ia agavaa mo le mafutaga a le Agaga Paia. Ua tatou filifili ia agavaa mo le mauaina o musumusuga, ia mafai ona auauna atu, ia mafai ona ulu atu i le malumalu, ma faamamaluina le perisitua.

O le mea e aupito sili ona taua, ua tatou filifili e galulue agai atu i le ola e faavavau i le malo selesitila o lo tatou Tama i le Lagi. O le auala lena i le filemu ma le fiafia. ■



OOTIA i se MOLIMAU

Saunia e Michael Harken

I le amataga o la'u misiona, sa ou au-auna ai i se aai laitiiti i Korea i Saute. I se tasi aso timuga, sa le'i faamanuia-ina tele ae sa ou mana'o e galue pea seia oo i le taimi e foi ai i le fale. Sa tonu ia i ma'ua ma la'u soa o le a ma tuitui i nisi faitotoa.

I se tasi o faitotoa sa tali mai ai se fafine, ma sa amata ona talatalanoa i ai la'u soa. Ona o au o se faifeautal'ai fou, sa faigata ai ia te au ona malamalama, ae i ni nai minute sa amata ona talanoa faa-Peretania mai. Na ma iloa ai e sau o ia mai Sikako, Ilinoi, ISA, ma ua sii mai iina ma lona aiga.

E lelei le fafine ae sa naunau o ia e ta'useseina le Tusi a Mamona ma sa faatalitonu i maua e le sa'o le tatou ekalesia. Sa ou tutu ai iina ma la'u soa a o taumafai o ia e tali ana fesili faigata. Sa taumafai la'u soa e molimau atu ia te ia e moni le Tusi a

Mamona, ma e mafai ona fesoasoani ia te ia, ae sa tausisi lava o ia i lona talitonuga e sese.

Ina ua mavae le 30 minute o le talanoaga i le faitotoa, sa ia fesili mai i la'u soa, "O fea tatou te o i ai pe a mavae le olaga?" Sa mafai ona ou iloa o la sa naunau o ia e osofai ia aoaoga a la'u soa, e pei ona ia faia muamua. Sa molimau atu la'u soa i le ata o le faaolataga ma e mafai ona tatou toe ola faatasi e faavavau ma o tatou aiga i le malo selesitila. A o lei mafai ona ia faaa'u, sa ia taofia o ia ma talosaga pe mafai ona ia toe fai atu lana tala e uiga i le toe faatasia o aiga. Na toe tali atu la'u soa i le tali lava lea e tasi. Sa ou lagonaina le matuai malosi o le Agaga, ma sa mafai ona ou vaaia i mata o le fafine se mea na matua ootia ai lona lotu. Ina ua mavae lena molimau puupuu ma le mamana, sa

uma lona faatautee mai, ae tago ave le Tusi a Mamona ma talosagaina i maua ma te toe o atu matou te talanoa faatasi ma ia ma lona toalua e uiga i le Tusi a Mamona.

Ou te manatua lo ma savavali atu i le fale ma la'u soa i lena afiafi, ma le maofa i le aafiaga o le molimau a la'u soa. Sa ou malamalama ai iina, o se molimau e o faatasi ma le Agaga o sa tatou meafaigaluega faafaiaoga aupito mamana lea ua i ai. O le a le galo lava ia te au la'u soa ma lana molimau i lena po. Ina ua mavae lena aafiaga, sa tonu ia te au, tusa lava pe utiuti lo'u tomai e tautala ai faa-Korea, ae o le a ou taumafai lava e tuuina atu la'u molimau tusa lava pe a. A o ou faia, sa amata ona ou maua pea lava pea le Agaga. Sa ou aoaoina o fesootaiga aupito sili e tupu pe a e aoao atu i le Agaga. ■

O Michael Harken e nofo i Luta, ISA.

O Le Mea na Lolomi ai le Tusi a Mamona

Sau ta o e vaili se nofoaga taua i le talafaasolopito o le Ekalesia!

Saunia e Jan Pinborough



Mekasini a le Ekalesia

Ise aso o le taumafanafana i le 1829, sa savalivali atu ai Iosefa Samita i se falepiliki lanumumu i Palamaira, Niu Ioka, ISA, i le mea sa i ai se falelomitusi o Mr. Egbert B. Grandin. Faatoa uma lava ona faaliliuina e le Perofeta ia upu sa i luga o papatusi auro, ma sa manao o ia ia Mr. Grandin e lolomi ia uluai kopi e 5,000 o le Tusi a Mamona. E oo atu i le isi tautotogo, ua lolomi le tusi fou ma ua saunia e faitau ai tagata.

Luka S., valu tausaga, sa asiasi i le Fale o Grandin e aoao ai i le tala ofoofogia pe na faapefea ona lolomi le Tusi a Mamona i le 183 tausaga talu ai mai lenei masina. ■

O le masini lomitusi fou a Mr. Grandin sa mafai ona lolomi ai itulau e 16 i le taimi—e faaluaina le tele nai lo le mea sa i ai masini muamua.

O loo i ai i le potu lenei ni atafaatusa o masini sa faaoga e lolomi ai le Tusi a Mamona.



ATA NA PUEINA E BRENT WALTON



O fata nei e faitau afe mataitusi metale laiti e i ai e ta'ua o mata. O mataitusi tetele e faaigoa o "fatāluga" aua e i fata pito i luga.



E tata i le lomitusi ona tuu taitasi mataitusi i se meafaigaluega e igoa o lematasila o fatuga.



Sa faaoga polo vaitusi e tuu ai le vaitusi i luga o mata.

Sa tatau i luga itulau ina ia mafai ai ona mago le vaitusi.



O itulau tetele, e faaigoa o taiala, e ave i le 'aufusi. O iina e gaugau ai, tatipi i ni itulau laiti, ona su'i faatasi ai lea.

Na muamua faatau atu le Tusi a Mamona i le aso 26 Mati, 1830. O kopi taitasi e \$1.75 Tala Amerika. (E tusa lea ma le \$24 Tala Amerika i le taimi nei.) O le tele o tagata na tatau ona faigaluega i aso e lua ina ia maua ai lena ituaiga tupe.

O le taimi nei, ua faitau fia afe kopi o le Tusi a Mamona ua lolomi i tausaga taitasi i gagana eseese e 85. Ua faaliliuina foi ni vaega o le tusi i nisi gagana e 23.



Sa manao Iosefa Samita i le Tusi a Mamona ia faavaa i le pa'umanu lamolemole anagata ma faailoga i mataitusi auro, e pei o le Tusi Paia.

E LE'I FAIGOFIE!

O le tala e sili ona fiafia i ai Luka mai le Tusi a Mamona o le tala i le aumaia e Nifae o papatusi apamemea (tagai 1 Nifae 3-4). E fiafia o ia i le galue malosi o Nifae e fai mea e poloaiina ai e le Alii. Sa aoaoina e Luka se mea faapena e uiga i le lolomiina o le Tusi a Mamona. "Sa ou aoaoina e lei faigofie," o lana tala lea. "Sa latou faafaōina mataitusi uma ma sipela mai tua i luma!"



O Le Tusi Fou a Riki

Saunia e Laura Byrd

E faavae i se tala moni

“A ou lelei ma agalelei ma fesoasoani i se tasi ou te vaai i ai, ou te fiafia lava” (“A Happy Helper,” Children’s Songbook, 197).

Sa faasolosolo e Riki ona lima i mataitusi auro i le pito i luma o lana tusi fou. Sa lolofi ane ana uo.

“Ta’i manaia!” na fai atu ai Jake. “Ou te lei vaai lava muamua i se Tusi a Mamona lanumumu.”

“E foliga mai e ofi i le taga o lou ofu mumu,” na toe fai atu ai Iaroma.

“E ofi,” le tala a Riki, ma momono ifo i lana taga ma toe aumai i fafo. O le taimi lena na faafeiloai atu ai le peresitene o le Peraimeri i tagata uma mo le taimi o fetufaaiga, ina ia taofi ai le talanoa o tamaiti. Ae sa le mafai lava Riki le autilo i lalo i lana tusi mai lea taimi i lea taimi.

Ina ua uma le Peraimeri, sa alu Riki i le vasega pepe e aumai lona tuafafine laititi. A o la ua i ai iina lona Tama.

“Na e vaai ia Tina?” o le fesili lea a Tama.

“E leai, ae talosia ua sauni e alu,” le tala a Ricki. “Ua ou fiaai!”

Ua gogolo lava le manava o Riki i le taimi na latou maua ai Tina, ae na ataata o ia ina ua vaai atu o tutu mai ai ma Uso ma Tuafafine Bird. O la e tu ia Uso Bird. A o la e nofo ia Tuafafine Bird i lona nofoafaataavalevale, e pei ona masani ai. Fai mai Tina e maua ia Tuafafine Bird i se faama’i e aafia ai ona musele ma e faigata ai ia te ia ona faaaoga. O nisi taimi e tiga ai o ia, ae e ataata lava o ia i taimi uma i tagata uma. O Uso ma Tuafafine Bird o nisi o tagata e fiafia lava i ai Riki i le uarota.

“Ei, talofa alii,” o le tala lea a Uso Bird, ma lulu le lima o Riki. “Na a mai le Peraimer i lenei aso?”



“Manaia. Sa ou faaali i tagata uma le mea lea.” Sa tuu i luga e Riki le tamaitusi lanumumu.

“O le a lena mea?” na fesili ai Tuafafine Bird.

“O la’u Tusi Mamona fou. Na lafo mai i o’u matua matutua,” le tala a Riki a o ia tuuina atu ia te ia.

“Ou te lei vaai lava i se tusi faapea,” le tala a Tuafafine Bird, ma

fefulifulisa’i le tamai tusi lanumumu i ona lima. “E ese le laititi ma mama. Ou te fia faitau lava i le Tusi a Mamona, ae e augatata o’u lima e uu a’u tusitusiga paia, e ala ai ona na o ni nai minute lava e faitau ai ma tuu. Ae e mafai ona ou uuina le tusi lea mo se taimi umi.” Ona ia toe faafoi atu ai lea.

Na tilotilo Riki i lana tusi manaia. Ona ia toe tilotilo lea ia Tuafafine Bird.

“Ia, Tuafafine Bird. Ou te manao e ave ma oe.” Na toe faafoi atu e Riki le Tusi a Mamona i ona lima.

E te mo’i? o le fesili lea a Uso Bird.

“E mo’i,” o lana tala lea.

“Oi, Riki, faafetai lava.” Na tumu mata o Tuafafine Bird i loimata. “O le faitau o tusitusiga paia e fesoa-soani i o’u tiga i aso. O le a fesoa-soani moni lava lau tamaitusi ia te au.” Sa aapa atu o ia ma fusi mai [Riki].

A o latou savavali atu i le taavale, sa fai atu Tina, “Ua e le pisa lava. Ua e faanoanoa ua foai lau tusi?”

E le o lena. E manaia, ae o loo i ai le isi a’u Tusi a Mamona i le fale. E le gata i lena, ou te manatu e sili atu ona taua mea o i totonu o le tusi nai lo fafo.”

Sa oomi ma le alofa e le Tina lona tauau.

“Pau lava le mea ou te faamoe-moe o le a le fiafia Tinamatua ma Tamamatua ua ou foa’ia la’u Tusi a Mamona.”

“Talitonu mai, Riki, e le faitai.”

Na manatu Riki e sa’o lona tina. ■

O Laura Byrd e nofo i Oregon, ISA.



“Afai e te tuu atu oe lava i luga atu o le mea e faigofie ona fai, o le a matua fiafia lava lou loto aua o le a amata ona avea le agalelei o se vaega o lou olaga i aso faisoo.”

Mary N. Cook, fesoasoani muamua i le au peresitene aoao o Tamaitai Talavou. “Manatua le Mea Leni: O Le Agalelei e Amata ia te Au,” *Liahona*, Me 2011, 120.

O Tamai Mamoe a Megan

Saunia e Julina K. Mills

E faavae i se tala moni

“Galulue e auaua le tasi i le isi”

(Mosaea 2:18).

‘E tatau i manu ona galulue mo lo latou tausiga.’ Na tagitagi pea upu a Papa i le mafafau o Megan. Sa leoleo e taifau ia mamoe, ma sa tuu e moa ia fuamo. E aumai e mamoe le fulu-fulu mamoe e faatau atu. Sa fesoa-soani Megan i le seleina i tautotogo uma, ma e pei lava o latou fulufulu

ATA NA TUSIA E GUY FRANCIS

mafiatia o se kiona ua liusuavai i le laufanua lanumeamata.

Na ese ia tamai mamoe a Megan. O nai manu laiti na faatoa fananau i le tausaga ua te'a, ma e laiti tele e le lava o latou fulufulu e totogi ai lo latou tausiga. Na mana'o Papa e ave i latou i le fasimanu, peitai na gau le loto o Megan i nai pepe laiti ma le augavaivai. Sa ia aioi atu e tuu, ma sa iu ina ioe Papa. "Peitai," sa ia lapataia o ia, "e tatau ona e tausia e oe lava ia."

I le taimi muamua, sa lelei mea uma. Sa faaoga e Megan lana tupe o lona aso fanau e faatau ai vaovao mago ina ua amata ona aai tamai mamoe. Ae o lea ua uma nei le tupe o lona aso fanau, ma sa fai atu Papa e taugata tele le tuu o tamai mamoe e tataa i le fanua sa ia lisiina i fafo atu o le taulaga. E le gata i lea, sa iloa e Megan o le a seasea ona vaai

lea i ai pe a o i le fanua. Sa mapuea o ia a o tilotilo atu o lamulamu e tamai mamoe nai toe mea na totoe o le vaovao mago. E oo atu taeao ua uma, ma e tatau ona ia sailia se auala e fafaga ai ana mamoe.

Sa milimili e Megan ia fulu pae-pae o ulu o tamai mamoe a o ia faa-lagolago atu i le fale na tuu ai. I le isi pito o le auala na ia vaai atu ai ia Mr. Flowers o teu mai ana rosa. I nai fale i talaatu, sa setusetu lemu ane ai Mrs. Wilmot e aveatu lana meli. O Mrs. Wilmot o se fafine ua oti lana tane, ma e nofo na o ia. O nisi taimi e salu ai e le tuagane o Megan ia laulau a Mrs. Wilmot, ae e tomumu lava o ia fai mai e le mafai e Mrs. Wilmot ona totogi o ia.

Sa matauina e Megan ua uumi le vao a Mrs. Wilmot. "O le a ou fai nei i ai ou te alu atu e moa lana vao," o le manatu lea o Megan. "Ae e le faia nei. E tatau ona ou sueina se auala e fafaga ai au mamoe."

Na faafuasei ona maua se manatu o Megan. E i ai le vao a Mrs. Wilmot, ae e i ai mamoe a Megan ua manaomia ona faatataa—ua matuai fetui lelei! Sa vave popo e Megan ulu o

ana mamoe ma tamoe loa i le fale o Mrs. Wilmot. Ina ua tatala mai e Mrs. Wilmot le faitotoa, sa ata fiafia o ia ia Megan, ona ua i ai sana asiasiga. Sa topetope mai le gutu o Megan a o ia faamatalaina lona manatu.

"Mrs. Wilmot, ou te manatu o le a manaia tele lea mo i ta'ua uma!" Na uma le tala a Megan. Sa to lona sela, ma faatalitali mo se tali.

"E manaia foi!" le tala a Mrs. Wilmot. "E mafai ona ou faaogaina i la'ua, e mafai foi e lo'u fanua ona faaoga le la fesoasoani. Aumai muamua lava mamoe i le taeao a taeao." Sa taufai ataata atu le tasi i le isi o Megan ma Mrs. Wilmot, ma alu fiafia Megan i le fale.


O le aso na sosoo ai o le amataga lea o se faigauo umi ma le matagofie. Na ave e Megan ana mamoe i le fale o Mrs. Wilmot i taeao uma a o lei alu i le aoga, ma o afiafi e nofo ai e talatalanoa mo sina taimi a o lei aveina ana mamoe i le fale mo le po. Sa tumau le maualalo o le vao a Mrs. Wilmot ma sa matuai lelei lava, ma sa maua foi e mamoe a Megan lo la tau i mo lo la tausiga. ■

O Julina K. Mills e nofo i Arizona, ISA.



Na toe foi mai lo'u tuaoi mai se malaga i le togavao, lea sa ia vele mai ai pulou aitu e 'ai. Na maua mai ai e lo matou aiga ni nai pulou aitu, ma sa ou fesoasoani i lo'u tina e fufulu. Ina ua maea, sa ou mafau i lo'u tuaoi pe fia ni pulou aitu sa ia fufuluina na o ia. Sa ou tuitui i lona faitotoa, ma sa ia avatu au i totonu, ma sa ou fesoasoani ia te ia. Ana faapea e nofo lesu iinei, semanu e fesoasoani foi o la i lo'u tuaoi.

Jonatan L., 5 tausaga, Suetena




Aisea e matuai taua ai Iesu Keriso ia i tatou?

Saunia e Elder Dallin H. Oaks
O Le Korama a Aposetolo e Toasefululua

O sui o le Korama a Aposetolo e Toasefululua o ni molimau faapittoa a Iesu Keriso.




O ia o lo tatou Fofoa.



Na ia tuu atu le mana o le perisitia i Ana Aposetolo ma isi.



O Ana aoaoga e faamalamalama ai lo tatou ala ma faailoa mai ai ia i tatou le ala e toe foi ai i le Tama Faalelagi.



O le Togiola a Iesu Keriso ua tatou maua ai le avanoa e maua ai faamanuiga o le ola faavavau.

E ala mai i Lona Toetu, o le a tatou toe ola ai.

O le malamalama aupito taua leni i luga o le fogaeleele. Ua faailoa mai e le Agaga Paia ia te au, ma o le a la faailoa atu foi ia te oe.

Mai "Aoaoga a Iesu," Liahona, Nov. 2011, 90-91, 93.

Aua o Loo Soifua o IA

Saunia e Marivic Pasigay, Negros Occidental, Filipaina
ma Marissa Widdison, Mekasini a le Ekalesia

E faavae i se tala moni

*“E moni ua toetu le Alii”
(Luke 24:34).*

Sa tu Watoy i lalo o le fu’a felanulanuai a Filipino i fafo o le aoga a o lei ulu atu i totonu.

“Talofa, tamaiti,” na fai mai ai lona faiaoga. “Ua oo i le taimi o la tatou tatalo o le taeao.”

O ona itu uma, sa pa’i atu uo a Watoy i o latou muauulu, fatafata, ma tauau e fai ai le faailoga o le koluse. Ona latou taulotoina lea o le tatalo e masani ona latou faia i le amataga o le vasega. E pei ona masani ai, e lei auai Watoy. Ae na moeiini ona mata, punou lona ulu, ma fai lemu lana lava tatalo. Sa tatalo o ia i ni mea eseese i taimi taitasi, i le auala sa aoaoina ai o ia i le fale ma le Peraimeri.

Ina ua uma sa ea a’e o ia i luga, ma vaaia lona faiaoga o matauina o ia ma se foliga fenumiai i ona mata.

“E mafai ona ta talanoa pe a uma le aoga?” na ia fai mai ai.

Sa lue atu le ulu o Watoy. Pe ua i ai sana mea sese ua fai?

Ina ua uma ia vasega mo le aso, sa savali atu le faiaoga ia Watoy.

“Ou te vaaia lava oe e le faailoga ina lau koluse pe fai tauloto faatasi le tatou tatalo i taeao,” o lana tala lea. “E mafai ona e ta’u maia pe aisea?”

Sa mapuea Watoy ua uma lona popole. E lei ita lona faiaoga, na o le fiailoa lava! Sa ia mafaufau pe faapefea ona tali atu.

“Ia,” na ia amata ai, “i la’u lotu, a matou tatalo, matou te talanoa atu i le Tama Faalelagi e uiga i le mau

mea eseese. O le koluse foi e faamanatu mai ai na maliu Iesu. Ae ua le o maliu Iesu. O loo soifua o Ia!”

Na mafaufau lona faiaoga i lenei mea mo sina minute ona luelue malie atu lea o lona ulu.

“Faafetai atu mo le fasoā mai o lenei mea,” o lana tala lea.

A o savali atu Watoy i le a’oga lakapi, sa ia lagona le mafanafana i totonu. Sa fiafia o ia e aoao atu isi e uiga ia Iesu Keriso. ■



I le taimi o le Eseta, tatou te faamanatu ai le soifuaga o Iesu Keriso. O se gaoioiga mo le Eseta o i itulau e 68–69 e mafai ona fesoasoani e sauniuni ai mo lenei aso faapitoa.

E mafai ona e faaogaina le lesona ma le gaoioiga lenei e aoao atili ai e uiga i le autu o le Peraimeri i le masina lenei.

O Iesu Keriso

O Lo Tatou Faaola

Sa i ai se taimi a o laititi ia Elder LeGrand R. Curtis Jr. o le Fitu-gafulu, sa taaalo ai ma lona tuafafine i se tamai vaa i luga o se vaiatafe. I le taimi muamua, sa malie ae a o tafetafea mamao ese atu le vaa mai le matafaga, sa la iloa ai ua tafe atu i le ituvai matautia.

Sa amata ona tauvalaau tamaiti mo se fesoasoani. Sa lagona mai i la'ua e lo la tama ma tamoe sa-asaoa ane ai e laveai i la'ua. Na ia laveaia i la'ua, o se mea sa le mafai ona la faia mo i la'ua lava. Na ia faia lenei mea aua e alofa o ia ia te i la'ua.

O nisi taimi tatou te faia ai ni fili-filiga sese ma faia mea e aveesea ai i tatou faaleagaga mai le Tama Faalelagi. Na auina mai e lo tatou Tama Faalelagi Lona Alo, o Iesu Keriso e laveai i tatou. Sa mafatia Iesu Keriso mo a tatou agasala ina ia mafai ona tatou salamo ma toe foi saogalemu atu e mau faatasi ma le Tama Faalelagi. Sa faia e le Faaola se mea e le mafai ona tatou faia mo i tatou lava. Sa naunau o ia e faia lenei mea aua e alofa o Ia ia i tatou. ■

PESE MA LE MAU

- “Na la Auina mai Lona Alo”
(*Tusipese a Tamaiti*, 20)
- Ioane 3:16



E MOLIMAU MAI PEROFETA I LE FAAOLA

Faafetaui molimau taitasi ma le ata o le perofeta na faia. Tusi le numera o le perofeta i le pusa.

“O i matou foi ua matou vaaia ua matou molimau ai foi na auina mai e le Tama o le Alo ia avea ma Faaola o le lalolagi” (1 Ioane 4:14).


“O le mea lea, sa leiloloa tagata uma ma i ai i se tulaga pau, ma o le a tumau ai pea vagana ai ua latou faalagolago i lenei Togiola” (1 Nifae 10:6).

“Ua ou iloa o le a afio mai lesu Keriso; ioe, le Atalii e Toatasi na fanaua e le Tama, ua tumu i le alofa tunoa, ma le alofa mutimutivale, ma le upumoni. Ma faauta, o ia lea e afio mai na te aveese agasala a le lalolagi, ioe, agasala a tagata uma taitoatasi, o e e tutumau i le talitonu i lona suafa” (Alema 5:48).

“Ma o le a oo mai, o soo se tasi e talitonu i le Alo o le Atua, o ia lava lea o le a mauaina le ola faavavau” (Hela-mana 14:8).

“Sa ou vaaia ni Tagata se toalua, e le mafaamatalaina lo laua mamalu ma lo laua pupula, o tutu mai i ou luga ae i le ea. Sa fetalai mai le tasi o i laua ia te au, ma sa ia ta’u lo’u igoa ma fetalai mai a o tusi ane lona aao i le tasi—*O Lo’u Atalii Pele lenei. Faalogo ia te la!*” (Iosefa Samita—Talafaasolopito 1:17).

“O Iesu o . . . le Alo Pele e Toatasi o le Tama na fanaua. O la o lo tatou Togiola; o la o lo tatou Puluvaiga i le Tama. O la lea na malii i luga o le satauro e togiola mo a tatou agasala” (“Ua Ou Iloa o loo Soifua Lo’u Faaola!” *Liahona*, Me 2007, 25).



1. *Alema*



2. *Iosefa Samita*




3. *Samuelu le sa Lamana*



4. *Ioane*



5. *Peresitene Thomas S. Monson*




6. *Liae*

TATOU TALANOA

Usu le pese “Na la Auina Mai Lona Alo” ma talanoaina fesili i le pese. Fuafua po o le a se mea e mafai ona fai o se aiga e ola ai faapei o Iesu Keriso.

Vaai Faalemafau i le Eseta



E mafai ona e faaaogaina le gaioiga lea e sauniuni ai mo le Eseta, o se taimi e manatua ai ma faamanatu le soifuaga o Iesu Keriso ma Lana Togiola. Otiese le ata i le itu tauagavale i ni fasi paso e pei ona makaina. Amata i se vaiaso a o lumanai le Eseta, filifili se fasi paso se tasi i aso taitasi. Sue po o fea e fetau i ai i lalo ifo, ma fai le mea o loo tusi ai i lena avanoa a o lei faapiiia le faspaso i lona nofoaga. A maea lau ata, ua tatau ona i ai i le Eseta! ■

Usu se pese o le Peraimeri o loo talanoa e uiga ia Iesu Keriso. E mafai faapefea ona e mulimuli i Lana faa-taitaiga i le aso?

Faitau mea na tusia e Aposetolo soifua e uiga ia Iesu Keriso: "O la o le malamalama, o le ola, ma le faamoemoe o le lalolagi. O Lana ala o le ala lea e tau atu i le fiafia i lenei olaga ma le ola e faavavau i le lalolagi a sau" ("O Le Keriso Soifua: O Le Molimau a Aposetolo," Liahona, Ape. 2000, 2–3).

Tatou te aai i le faamanatuga i vaiaso taitasi e manatua ai Iesu Keriso. O le a se mea e mafai ona e fai ia e matua migao ai lava i le taimi o le sauniga faamanatuga i le Aso Sa nei?

Usu lau pese e te fiafia i ai o le Kerisimasi. O le a se mea e te manatua na e aoaoina e uiga i le soifua mai o Iesu Keriso?

Faitau faatasi ma se tasi o matua le loane 3:16–17 ma talanoa i lona uiga. E te iloa faapefea e alofa le Tama Faalelagi ia te oe?

Faitau le tala "Aua o Loo Soifua o la" i le itulau e 65. E mafai faapefea ona e faasoa atu se savali anoa o le Eseta i au uo?

Tusi se ata o le mau e te fiafia lava i ai o tala faatusi paia e uiga ia Iesu. E mafai ona e fesili i ou matua e fesoasoani atu a o e matamata i Vitio o Tala Faatusi Paia i le Soifuaga o Iesu Keriso i le biblevideos.lds.org e maua mai ai ni ou manatu.

O Se Meaalofa mai le Tama Faalelagi

Saunia e Chad E. Phares

Mekasini a le Ekalesia

E faavae i se tala moni



Sa fiafia Isabelle ua oo mai le tautotogo. E fiafia o ia e faalogologo i manulele. E fiafia e taalo i le mutia lanuvao.

Sa fiafia Isabelle ua oo i le Eseta. Sa ia iloa o le Eseta o se aso faapi-toa. O le Eseta tatou te faamanatu ai Iesu ina ua toe soifua mai.



I le Peraimer, na avatu ai e Sister Martin ni va-liga'o i tamaiti uma o le vasega. Sa ia fai atu i ai e tusi ata o le meaalofa silisili na avatu e le Tama Faalelagi ia i latou.

Na tusi e Michael se
ata o lona aiga.

Na tusi e Eliza se ata
o lana uo.

Na tusi e Anthony se
ata o lona fale.



Na tilotilo Isabelle i ata. Sa mananaia tele.

Sa mafaufau Isabelle po o le a lana ata e tusi. Sa fiafia o ia i le i ai o se aiga.
Sa fiafia i uo. Sa fiafia foi o ia i se fale.



Sa mafaufau Isabelle i se isi meaalofa na aumai e le Tama Faalelagi i tagata uma. Sa ia aumai i tagata uma le meaalofa o se Faaola. Sa piki e Isabelle ana vali. Sa ia tusia se ata o Iesu Keriso.

Sa fesili Sister Martin ia Isabelle po o le a le mea sa ia tusia.



“Sa ou tusia se ata o Iesu,” na fai mai ai Isabelle. “O Ia o le meaalofa silisili.” ■



O Loo Soifua Iesu Keriso

Saunia e Chad E. Phares

Mekasini a le Ekalesia



Ina ua uma ona faasatauro Iesu Keriso, sa toetu mai o Ia.

O lona uiga ua toe foi mai Lona tino ua ola, ma o le a ola ai o Ia e faavavau. Ona o Lona Toetu, o le a tatou ola ai foi e faavavau.

Tilotilo i ata o loo ta'u mai ai ni mea sa tutupu i le soifuaga o Iesu. Tusi le 1, 2, 3, po o le 4 i totonu o pusa e iloa ai le faasologa na tutupu ai nei mea.



TALA FOU O LE EKALEZIA

Asiasi i le news.lds.org mo se faaopoopoga o tala fou ma mea e tutupu i le Ekalesia.

Ua Fautuaina Tagata o le Ekalesia e Taitai ia Nonoa Faatasi Talafaasolopito o Aiga ma le Malumalu

Saunia e Heather Whittle Wrigley

Talafou o le Ekalesia ma Mea Na Tutupu

I le masina o Oketopa 2012, na tuuina mai ai e le Au Peresitene Sili se tusi e valaaulia ai tagata o le au paia e faaaoga igoa o o latou lava aiga mo galuega faalemalumalu ma sa ootoo mai ai ni itu taua se lima e fesoasoani ai i tagata ia maua le fiafia sili atu i le faia o talafaasolopito o aiga ma o i le malumalu.

E mafai e tagata ona tali atu i le valaau e saili, saunia, ma fefaasoai igoa mo le malumalu i le faaaogaina lea o meafaigaluega ma punaoa ua ofoina atu i le LDS.org ma le FamilySearch.org. O itu na ootoo mai i le tusi a le Au Peresitene Sili o:

1. A maua e tagata o le Ekalesia ia igoa o o latou augatuaa ma avatu na igoa i le malumalu mo galuega o sauniga, e mafai ona matua faamauoaina lava le aafiaga i le malumalu.”

Na saunoa mai Elder Richard G. Scott o le Korama a Aposetolo e Toasefulu-lua, “Soo se galuega e te faia i le malumalu o le taimi faaaluina tatau lea, ae o le mauaina o sauniga sui mo ou lava tuua o le a sili atu ai ona paia le taimi i le malumalu ma o le a faapea ona e maua ai faamanuiaga sili atu. Ua folafola mai e le Au Peresitene Sili e faapea, ‘O lo tatou tiutetauave tupito o le sailia lea

ma faailoa o o tatou lava tuua.’” (“O Le Olioli i le Faaolaina o E Ua Maliliu,” *Liahona*, Nov. 2012, 93–94).

O le LDS.org, e aoao atili ai i le mafuaaga ua poloaiina ai i tatou e saunia ia igoa mai o tatou lava aiga e ave i le malumalu, i le kilikiina lea o le **Punaoa, Talafaasolopito o Aiga**, ma le **Aisea e tatau ai ona tatou faia galuega faalemalumalu mo o tatou augatuaa?** (e maua le vitio i lalo o le **Aisea Tatou Te Faia ai Galuega o Talafaasolopito o Aiga?**).

2. “O tagata e tapulaa le avanoa e faia ai a latou lava sailiiliga o talafaasolopito o o latou aiga, e fautuaina ina ia faatinoina sauniga sui mo igoa e aumai e isi tagata o le au paia po o le malumalu.”

E toatele tagata o le Ekalesia e tapulaa le avanoa e o ai i le malumalu. Ua fautuaina e taitai o le Ekalesia nei tagata ina ia faia le mea latou te mafaia. O tagata e leai ni malumalu e latalata ane, e mafai ona faia sailiiliga mo talafaasolopito o aiga ona tuu lea i isi e faia sauniga o le malumalu mo i latou.

Atonu e tauivi isi tagata ma le lagona ua uma ona faia uma sailiiliga o talafaasolopito o aiga ma galuega

e mafai ona fai mo o latou augatuaa. Ua fautuaina nei tagata ina ia faaaauu pea ona o i le malumalu, ma ave igoa o aiga o isi tagata o le au paia.

I le lds.org/temples, **Sue se Malumalu** e mafai ona fesoasoani ia te oe e sauniuni ai mo le isi au malaga atu i le malumalu.

3. E faapitoa lo matou fautuaina o le autalavou ma talavou nofofua matutua “e faaaoga mo galuega i le malumalu ia igoa o o latou lava aiga, po o igoa o tuua o tagata o a latou uarota po o siteki.”

“Outou tupulaga talavou, pe tou te mananao i se auala maunino e tuu-itiitia ai faatosinaga a le fili i o outou olaga?” O le fesili lea a Elder Scott. “Ia faatofu oe lava i le sailia o ou tuua, saunia igoa mo sauniga sui paia o loo maua i le malumalu, ona e alu atu lea i le malumalu e fai ma sui mo i latou ia maua sauniga o le papatisoga ma le meaalofa o le Agaga Paia. A o e faasolosolo matua, o le a mafai foi ona e auai i le mauaina o isi sauniga. E leai se isi puipuiga sili atu mai faatosinaga a le fili i lou olaga e mafai ona ou mafaufau i ai” (“Faaolaina o e ua Maliliu,” 94).

O loo i ai foi i le vaega o Talafaasolopito o Aiga o le LDS.org, i lalo o le **O Le Amataina**, e maua ai laasaga e lima e saunia ai igoa o aiga mo le malumalu.

4. E ao i taitai perisitua ona faamaunino ua aoao e tagata uma o le au paia “le aoaoga faavae o le liliu atu o o latou loto i o latou matua ma faamanuiaga o le o i le malumalu.”



E tele punaoa lolomi ma faaeletonika ua i ai a le Ekalesia e fesoasoani ai i tagata o le au paia ia malamalama ai i mafuaaga mo le tapenaina o igoa faaleaiga mo le malumalu ma le ala e faia ai.

Ia Liliu Atu Loto o se taiala a taitai ua tuuina atu o se faaopoopoga i le *Tusitaulima 2: Taitaiina o le Ekalesia* e fesoasoani ai i taitai perisitua o uarota ma siteki e lagolago ai tagata o le au paia i o latou tiutetauave e saili i e ua maliliu ma tuuina atu ia i latou sauniga faaola i le malumalu. O loo aofia ai ma vitio e faamatalaina ai auala na faaaoga e nisi siteki le galuega faalemalumalu ma talafaasolopito o aiga e faamalolosia ai tagata taitoatasi ma aiga.

Sailiili i punaoa mo taitai i luga o le LDS.org i le kilikiina o le **Punaoa, Valaauga Uma, Talafaasolopito o Aiga**, ma le **Punaoa a Taitai**.

5. O i latou e “tele igoa o o latou aiga o loo teuina, [ua fautuaina] ia faamatuu mai nei igoa i se taimi faatula-gaina lelei ina ia mafai ai ona faatino ia sauniga talafeagai.”

E 12 miliona igoa o i ai nei i le FamilySearch.org o loo teuina ai e tagata o aiga ua faamoemoe e faatino ina e i latou lava ia sauniga o o latou augatuaa. Peitai, o le tele o igoa ua autausagā o teu ai lava.

Atonu e le o fiafia tele [tuua] pe afai e faaaauu pea ona latou faatalitali mo le faataunuaina o o latou sauniga,” na saunoa ai Elder Scott. “Matou te uunaia outou o e ua tele ni igoa o loo teuina ina ia faasoatu ma i igoa ina ia mafai ona fesoasoani

atu tagata o lou aiga lautele po o le uarota ma le siteki i le faataunuaina o lena galuega. E mafai ona faia lena mea e ala i le tufatufaina o kata o le malumalu i tagata o le uarota ma le siteki o loo naunau e fesoasoani pe faaaoga foi le polokalama komepiuta o le FamilySearch e auina sa’o atu ai igoa i le malumalu.” (“Faaolaina o E Ua Maliliu,” 94).

I le vaega **O Le Amataina** na ta’ua i luga, i lalo o le **Ou Te Manao e Faasoa Igoa i Isi**, kiliki i le **Mata-mata le Vitio**, ona matamata lea o le vitio **Faamatuu Atu o Igoa mo Galuega Faalemalumalu** mo faamatalaga e uiga i le faasoa atu o igoa sa teuina. ■

E Manaomia e Polofesa Taufaasalalauga ona Galulue i Galuega Faatino a le Ekalesia

Saunia e Ryan Morgenegg

Church News

I se taumafaiga e faaleleia atili le tala i le Ekalesia i le lalolagi atoa, ua fatuina ai e le Matagaluega o le Tautua Faasalalau se Utuofaamatalaga Faapolofesa Taufaaasalalauga (mediapro.lds.org), o se tomatauga mo polofesa taufaasalalauga e fiafia i le fatuina ma le faatinoina o ata, vitio, faalalasauga, faasalalauina sa’o o mea e tutupu, ma isi faasalalauga faaeletonika mo le Ekalesia.

O le faamoemoega autu lava o le utuofaamatalaga ia iloa ai le afaasalalau faapolofesa talenia i le lalolagi atoa, ma e manao le Ekalesia ia faaafia ai le anoanoai o tagata taitoatasi ma kamupani “ua susesueina”—pe ua faamaonia—, ma agavaa. Fai

O le i ai o le Utuofaamatalaga Polofesa Taufaaasalalauga, o le a mafai ai e le Ekalesia ona faaoga ‘au faavaomalo o polofesa taufaasalalauga e vave ai ma taugofie ona pue vitio i le lalolagi atoa.

mai Scott Olson, le pule o le galuega faatino mo le utuofaamatalaga, “O loo sailia e le Ekalesia i latou ua i ai le pototo masani faapolofesa ua tele tausaga o le pototo masani. E le o se utuofaamatalaga leni mo le au faapasitaimi.”

I aso ua mavae, a manaomia ona faatino se galuega tau faasalalauga, e totogi konekarate i le lotoifale o Iuta ma malaga atu i se vaalele i se nofoaga e pue ai se vitio pe faia se galuega faatino ona toe foi lea ma faamaea le galuega i le laumua o le Ekalesia. E i ai polofesa o otiovisio a le Ekalesia o loo galulue i galuega faatino, ae ua matua tele naua galuega faatino tau faasalalauga e manaomia ona faia ae e le mafai e ‘au o i ai nei ona faia uma. O se utuofaamatalaga o polofesa talenia i le lalolagi atoa e taua i le lumanai o taumafaiga tau faasalalauga a le Ekalesia.

Fai mai Uso Olson, “Mo le Ekalesia ina ia faaogaina lelei le utuofaamatalaga MediaPro atoa, o le a manaomia ai nisi polofesa mai le lalolagi atoa e faa’aināina ai. O la matou sini mo le upega tafailagi po o le saite, o le tuu o polofesa taufaasalalauga ua i ai le pototo masani i totonu o le utuofaamatalaga a le Ekalesia, a oo ina tulai mai se galuega faatino i soo se itu o le lalolagi, e mafai ona matou faafesoataia ma amata loa lava le galuega.”

A i ai se polofesa taufaasalalauga e fia manao e faitaulia mo galuega faatino, ia auina mai lona igoa, tuatusi imeli, ma se oototoga puupuu o lona talaaga i le mediapro@ldschurch.org. O se vaega o faamatalaga e faatumu e polofesa taufaasalalauga o se talaaga auiliili lea o a latou galuega, faatasi ai ma ni faataitaiga o galuega ua maea, se lisi o tomai, ma lona avanoa. Fai mai Uso Olson, “E taua le faapatino mai o ou tomai aua o nisi tomai e tutusa lava i vitio, ata, ma upega fesootai.”

O le lesitalaina i le MediaPro e le faapea ua mautinoa ai se avanoa e galue ai mo le Ekalesia, ae a le talafeauga ma agavaa, atonu latou te le maua lava se avanoa. O le lesitalaina o o latou faamatalaga ma tomai, e mafai ai e le Ekalesia ona iloa i latou ma vaai po o a mea e mafai ona latou faia. ■



ATA MA TUSIA E MATTHEW REIER

Ua Lipotia mai e Elders Oaks ma Bednar le Faatupulaia o le Ekalesia i le Taimi Nei i Amerika i Saute

Saunia e Jason Swensen

Church News

O le vaega amata o le Mataupu Faavae ma Feagaiga o loo aofia ai le valoaga o le aumai ai i le Ekalesia “mai le le mailoa ma i fafo o le pouliuli” (1:30). Atonu ua taunuu lena aso i Amerika i Saute.

“Ua tatou o mai i fafo mai le le mailoa ma le pouliuli,” na saunoa ai Elder David A. Bednar o le Korama a Aposetolo e Toasefululua ina ua talii mai mai Amerika i Saute ia Oketopa. “Ua atagia lenei upumoni i le auala ua iloa ai e taitai o le malo o [Amerika i Saute] ma aloaia le Ekalesia ma le ala o loo talileleia ai sui o le Ekalesia i soo se taimi matou te taunuu ai.”

Na malaga faatasi Elder Bednar ma Elder Dallin H. Oaks, o le Korama a Aposetolo e Toasefululua, i se asiasiga i le aso 19–28 o Oketopa i Amerika i Saute i le Eria a Amerika i Saute Saute, lea e na aofia ai se iloiloga o le eria, fonotaga ma faifeautalai ma le au taitai perisitua, ma faigalotu ma le autalavou ma talavou nofofua matutua, ia sa faasalalauina i Chile, Atenitina, Iurukuei, ma Parakuei.

Na feiloai le au taitai asiasi ma le silia ma le 1,800 faifeautalai o loo galulue ai i atunuu e fa o le eria. “Sa matou faatalofa ma faifeautalai uma na ma feiloai i ai, ma sa foliga o loo lelei,” sa saunoa ai Elder Oaks. “O se autau faagaetia o faifeautalai mai Amerika i Matu ma Saute.”

Pe tusa ma le 15,000 tagata na maimoaina foi ia faigalotu e lua mo autalavou a le eria ma talavou nofofua matutua. Sa pulefaamalumalu Elder



ATA MAI LE FAALALOGA A LE MISIONA A AMERIKA I SAUTE SAUTE MA LE CHURCH NEWS

Oaks i le faigalotu a le autalavou nofofua matutua, lea sa faasalalauina i nofoaga e 326 i le eria atoa. O Elder Bednar o le pulefaamalumalu lea i le faigalotu a le autalavou laiti, lea sa matamata ai le tupulaga talavou e ta'i 12 i le 18 tausaga ma o latou matua sa faapotopoto i nofoaga e 439.

I fonotaga taitasi ma faigalotu, sa saunoa ai le Usoga sa asiasi atu, i le taua o le mauaina o se tulaga maualuga atu o le “tuputupu ae moni” e ala i le faateleina o le auai i sauniga faamanatuga, faaeege paia ma faaipoopoga i le malumalu, ma le talavou e auauna atu faamisiona talai.

I le faigalotu a le autalavou, na valaaulia ai alii talavou ma tamaitai talavou e fai ni fesili. Sa tali e le Au Pulega Aoao le mau fesili eseese e uiga i sauniuniga faafaifeautalai ma le tumau i le amio-tonu i se lalolagi ua faateleina ai le amioletonu.

Sa fautuaina foi e le Usoga ia taitai perisitua i le lotoifale e faapea, o le tuputupu ae moni e mafai ona ausia i le eria i le na o le faatoateleina o le auaunaga faafaifeautalai ma le faatumauina. E manaomia se vaega malolosi o faifeautalai ua maea misiona e faamautinoa ai ni augatupulaga i le lumanai o ni taitai ua i ai le poto masani, na saunoa ai Elder Oaks.

Na faamatala e Elder Mervyn B. Arnold o le Fitugafulu, lea sa Peresitene o le Eria i le taimi lea, o le asiasi atu a le Au Pulega aoao ma o latou fale-tua e “musuia, faagaetia, ma tumu i aoaoga.”

“O le a manatua pea lo latou alolofa, agalelei, ma a latou aoaoga,” na ia saunoa ai. ■

**Na feiloai
atu Elder
Dallin H. Oaks
o le Korama
a Aposetolo e
Toasefululua i
le akiepipikopo o
Santiago, Chile,
o Moseniolo
Ricardo Ezzati
Andrelo.**

Ua Toe Faapaiaina e Peresitene Monson le Malumalu o Boise

Saunia e Sarah Jane Weaver
Church News

I le masina o Novema 2012, na toefaapaiaina ai e Peresitene Thomas S. Monson le Malumalu o Boise Idaho—o se maota na uluai faapaiaina i le 1984 ma sa tapunia mo le 15 masina mo se faafouga tele.

I le afiafi a o lumanai le toefaapaiaiga, sa potopoto ai se vaega e 9,200 o tupulaga talavou mo faafiafiaga faaleaganuu a le autalavou. Sa matua toatele naua le autalavou sa auai ma sa latou faatumulia le Malae o Taco Bell i le lotoa o le Iunivesite o le Setete o Boise,

Na faaalii e Peresitene Thomas S. Monson lona alofa ma le talisapaia o tagata o le Ekalesia i le taimi o le faafiafiaga faaleaganuu i le po a o lona lona toefaapaiaina o le Malumalu o Boise Idaho.

ma sa faapotopoto o latou aiga ma isi i ni nofoaga taumamao e matamata mai ai i le polokalama lea sa faasalalau i nofoaga autu o siteki i le itulagi atoa e tautuaina e le malumalu.

E lei tele ni siva i le polokalama ae sa tele lava i le saunia mo le malumalu, o le tala lea a Gary Walker, o le taitaifono o le soakomiti o le faafiafiaga faaleaganuu.

I le faafiafiaga, sa saunua atu ai Peresitene Monson i le autalavou o le malumalu e “susulu e pei o se faailoilo o le amiotonu i tagata uma o le a mulimuli i lona malamalama. . . . Tatou te faapelepele i lena malamalama, ma e tatou te faafetai i lo tatou Tama Faalelagi mo faamanuiga ua aumaia e lenei malumalu ma malumalu uma i o tatou olaga.”

Na auai foi Elder Bednar i sauniga o le faapaiaiga i le Aso Sa, lea na ia aoao mai ai, “E i ai se mafanafana, sulu, malamalama, ma le susulu e sau mai se malumalu i soo se mea i le lalolagi.”

E tautuaina e le Malumalu o Boise Idaho pe tusa ma le 100,000 Au Paia o Aso e Gata Ai mai siteki e 31 i le eria. ■

Saunia e le Ekalesia ni Punaoa i Luga o le Initoneti mo Gaoioiga a le Autalavou

I se taumafaiga ina ia faamalosia alii ma tamaitai talavou o le Au Paia o Aso e Gata Ai i le lalolagi atoa, ua saunia ai e le Ekalesia se punaoa i luga o le initoneti mo gaoioiga a le autalavou. Ua fatuina le vaega fou mo gaoioiga a le autalavou i le LDS.org e fesoasoani ai i taitai o le autalavou ma o latou faufautua matutua e fuafua ai ni gaoioiga anoa mo korama a le Perisitua Arona ma vasega a Tamaitai Talavou i siteki ma uarota i le Ekalesia atoa.

O le saite ua faamoemoeina e lagolago ai le faamamafa faifaipea a le Ekalesia i le faamalosia o le autalavou, lea sa faamamafaina i suiga talu ai nei i tausaga moomia mo auunaga a faifeautalai faamisiona, le punaoa fou e aoao ai a le autalavou le *Sau, Mulimuli Mai ia te Au*, ma valaaulia mo le autalavou ia auai i talafasolopito o aiga.

Mo alii talavou, o lenei saite ua ogatusa ma le taulaiga faaleagaga o le polokalama o le Tiute i le Atua faatasi ma punaoa mo atinaega faaletino, faaleagafesootai, ma faaleaoaoga. ■



© PULETAOFIA E LE IRI



E toatele volenitia AAG mai Siekslovakia ma le Ripapelika o Slovak sa galulue ma le fiafia i le tele o itula i le vevela o le la i auvae tifato o le faatanoavai o Zilina e ao atigifagu, pepa, palasitika, pepa malo, pepa vavae, ma isi otaota i le aso o le auaunaga ia Setema 2012.

Aso o le Auaunaga i le Ripapelika o Slovak

E silia ma le 30 tagata o le au paia mai Siekslovakia ma le Ripapelika o Slovak faatasi ai ma faifeautalai o Siekslovakia ma Slovak ua maea mai misiona, sa faapotopoto i Zilina, Ripapelika o Slovak, i le aso 8 o Setema, 2012, e tuuina atu se auaunaga i le aai—i le faamamaina o le 1.5 tone o le otaota mai auvae o le faatanoavai i Zilina, faaleleia o le faleaoga o le aoga faataitai i le aai, ma le veleina o le aai.

“E ese le matagofie o le vaai atu i nei tagata ofofua mai e galulue malosi ma vaaia lo latou laufofoga fiafia ma le olioli!” Na ta’ua e le volenitia o Hana Snajdarova, o lona aiga o se tasi o uluai tagata liliu mai i le Ekalesia i Slovakia. “Ou te manatu o le mea lene matou te fiafia tele ai i nei galuega faatino. Matou te mananao e fesoasoani—e auauna atu—ma e matou te fiafia lava i ai.”

Ua Maea Nei le Faasipaniolo o le Feagaiga Fou Lava Ia

Na faamatuu atu talu ai nei e le Ekalesia le lomiga o le Feagaiga Fou lava ia mai le Faasipaniolo *Santa Biblia*:

Reina Valera 2009, ia faigofie ai ona maua e tagata ia tusitusiga paia ma faigofie i tagata o le Ekalesia faapena foi tagata e le lolotu.

O lenei fatuga fou o le telē masani ma o loo i ai anotusi o le Feagaiga Fou, vaefaamatalaga, ma filifiliga mai le Faaliliuga a Iosefa Samita.

O le Feagaiga Fou Faasipaniolo o loo maua ituaiga faavaa vaivai i faletusi autu o le Ekalesia po o le store. lds.org (aitema nu. 09215002).

Suiga i le Au Peresitene o le Eria a Amerika i Saute Saute

I le aso 6 Ianuari, 2013, sa faamalolo mai ai Elder Walter F. González mai le avea ai ma se tasi o le Au Peresitene o Fitugafulu ma ua suia ai Elder Mervyn B. Arnold e avea ma Peresitene o le Eria a Amerika i Saute Saute i Buenos Aires, Atenitina. Ua i ai se tofiga fou mo Elder Arnold i le laumua o le Ekalesia.

O loo avea pea Elders Jorge F. Zeballos ma Francisco J. Viñas ma fesoasoani i le Au Peresitene o le Eria.

“E momoli atu le agaga faafetai mo le auaunaga tuuto a nei uso ma talosia ia manuia o latou tofiga,” o se fuaitau lea mai se tasi a le Au Peresitene Sili.

Ua Olioli le Au Paia i Botswana i le Faavaega o le Uluai Siteki

I le masina o Novema 2012 toetiiti atoa le 900 tagata o le Ekalesia na aofaga potopoto i Botswana, Aferika, e molimauina le faatulagaga o le Siteki fou a Gaborone Botswana—o le uluai siteki i le atunuu.

O le Peresitene o le Eria a Aferika i Sautesasae o Elder Dale G. Renlund ma Elder Colin H. Bricknell, Fitugafulu Eria, na pulefaamalumu i le sauniga. Na tofia Clement M. Matswagothata e avea ma peresitene o le siteki, o Geoffrey Tembo na tofia e avea ma fesoasoani muamua, ma Oduetse S. Mokweni na tofia e avea ma fesoasoani lua.

“O le a avea le siteki ma se nofoaga o le sulufaiga, o se nofoaga e aoao ai, o se nofoaga o le lelei ma le saogalemu, o se nofoaga faatulagaina lelei, o se nofoaga o le agalelei ma le alofa, ma se nofoaga o le Atua,” na saunoa ai le peresitene Daniel Hall, peresitene o le Siteki a Roodepoort Aferika i Saute.

O LE LAVEAI I LUA MAINA

Saunia e Russell Westergard

I le taimi o le Taua i le Vaifagaloa, sa ou taitaia se au a fitafita i Kueiti. O le taimi lava na tatala ai le puipuiga, sa matou sailia tulaga tau o le fili ia mautinoa o le a matou saogalemu ma vaavaai mo soo se mea taua e maua ai ni faamatalaga e uiga i le fili.

Faatoa ou tuvae lava i se tulaga e fai ai faatonuga ae ou faalogoina loa se satini Peretania o fono avaavau mai, “Taofi! Aua nei e toe laa!” Na falo atu lo’u ulu mai lo’u lafitaga, ma ou iloa ai se tasi o a’u fitafita ua i ai i se malaia. Ua savali atu i se vaega taalaelae e piki se pepa o faamatalaga a o lea ua tu nei i le ogatotonu o se luamaina tele. Ina ua ia faalogoina le faataia atu a le satini, sa tu o ia ma iloa ai ua lamatia o ia.

Ao faapotopoto ai i le siui o le lua maina, sa mafai ona vaaia e le matou au le matua popole o le fitafita talavou ma ua gatete lona tino. Sa tatau ona vavave a matou gaoioiga ae e le mafai foi ona auina atu ni fitafita e aumai o ia e aunoa ma le lamatia ai o o latou ola faapea ma ia. E aunoa ma se talanoaga po o se faatuatua, sa amata ona matou talanoa atu i le fitafita, ma tauvalaau atu upu faamafanafana, faamalosiuga, ma faatonuga. Sa mafai ona matou vaaia le tafe ifo o loimata i ona alafau ma lagonaina le fefe i ana tali mai, ae sa amata ona faatoafimalieina o ia i la matou faamalosiuga.

Ina ua mavae sina taimi sa lava lona lototele e toe tilotilo ai i tua i le ala sa sau ai, ma sa ia fai mai na mafai ona ia vaai atu i ona tulagavae




Sa le mafai ona matou o e aumai le fitafita sa punitia, ae sa mafai ona matou faamalosiuina o ia, patipatia ana taumafaiga ma olioli i lona manumalo.

tau le iloa i le oneone. Faatasi ai ma la matou faamalosiuga, sa amata ona ia toe solisoli malie lona ala. O le tuu lemu ifo o ona vae i ona tulagavae taitasi na sau ai, sa ia savali ese mai le lua maina, ma faapalasi mai i o matou lima sa faatalitali atu a o faia lana laa mulimuli. Sa feei atu le anoano o fitafita sa i autafa ma le olioli a o matou toe faafeiloaia o ia. Sa suia loimata o le fefe i ataata ma opo.

E feoloolo lava i tatou na tutu i siui o se lua maina moni. Ae o le toatele o i tatou o e ua tuua le elelee saogalemu faaleagaga ina ia punitia ai i lua maina o le olaga. E pei o lena fitafita talavou, atonu e lagona foi e i latou le tuulafoaiina, fefefe, ma le le mautonu. Ae o lena fitafita e lei tuulafoaiina lava o ia. Sa i ai sana ‘au i autafa e patipatia ma faamalosiuga atu ia te ia, o uo na manaomia lona toe foi mai ma e lei fiu lava. Sa i ai ia te ia ni taitai sa ofoina atu se taitaiga ma le faamalosiuga. O ia le tagata na tatau ona savali ese mai le lua maina, ae sa matou tutu faatasi e fesoasoani ia te ia ia maua le malosiaga e faia ai. O le faaiuga, sa matou patipatia lona laveai i le alofa moni ma le olioli.

E mafai foi ona maoae ia laveai faaleagaga. Pe tatou te aapa atu o se aiga, o ni uo, po o se uarota po o se paranesi, e mafai lava e a tatou taumafaiga ona faia se esesega. O upu faamalosiuga i le taimi e tatau ai ma le taitaiga sa faasaoina ai le ola o le fitafita. E faapena foi, e mafai ona tatou fesoasoani e laveai isi mai mala o le pogisa faaleagaga e ala i le ofoina atu i ai o le faamalosiuga ma le taitaiga e toe faafoi mai ai i latou. A tatou faia lena mea, o le a tele lo tatou olioli —e le gata mo se taimi i lenei olaga ae faapea foi i le faavavau (tagai MF&F 18:15). ■

O Russell Westergard e nofo i Virginia, ISA.



ATA NA TUSIA E ROBERT T. BARRETT

IOANE TEILA

E fiafia **Ioane Teila** e **pese**. A o i ai i le Falepuipei i Karefasi, sa talosagaina e Iosefa Samita Elder Teila e usu le pese “Se Tagata Mativa Faanoanoa” (*Viiga*, nu. 16). Na faafanafanaina le Perofeta e le pese a o lei maliu o ia. Sa i ai Ioane Teila i le taimi na maliu Faamaturu ai, ma e ui lava ina faafa ona fanaina o ia, ae sa faasaina lava lona soifua. Na ia tauaveina se **uati i lana taga** lea na nuti i le taimi o le Faamaturoina. A o auaua ai i le Ekalesia, sa faasa’osa’oina e Ioane Teila le tele o **lomiga a le Ekalesia** ma sa na ia faapaiaina le **Malumalu o Logan Utah**.



○ *matua atamamai, o e mananao ia manuia a latou fanau, o le a aoao atu mataupu faavae o le tagolima ma le faalagolago o le tagata ia te ia lava. O le “Tausiga o Fanau ia Maufetuuna’i,” i le itulau e 10 o lenei lomiga, o loo faamanino atu ai faapea o fanau manuia e latou te faafetaiaia lelei luitau ma suiga, ma latou te taliaina le faamatalaga faapea o le toilalo atonu e muamua atu i le manumalo. O le tusiga i le itulau 20, “O Le Ola Ai i Mataupu Faavae o le Faalagolago o le Tagata ia te Ia Lava,” o loo “aoao atu faapea o lo tatou olaga faalagolago o le tagata ia te ia lava, e faateleina ai lo tatou gafatia ia ave ma sui mo le lelei.*

